

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

32 pes

Namba 1,358

Wik stat long Fonde Julai 6, 2000

70t

Ol ripot long palamen

pes 2

Ol kopi groa egensim gavman

pes 3

Morobe Gavman mekim ol senis

pes 9



Narapela plis fos em bikpela hevi tru, Wakon i tok

BOGENVIL i gat plis fos bilong em yet bai ol arapela provins tu i laik mekim wankain. Plis Komisina John Wakon i tokaut.

Mi bilip dispela tingting bilong Bogenvil i kamapim plis fos bilong em yet bai opim dua long ol arapela

provins tu i laik kamapim provinsal plis fos bilong ol yet, Mista Wakon i tok.

Em i tok plis fos i mas wankain tasol long olgeta hap bilong Papua Niugini.

Insait long ol toktok bilong ol

Bogenvil lida, ol i laik lukautim ol yet long planti arapela wok we ol i laik kamapim long provins. Tasol wok bilong Difens fos na Foren Afeas tasol bai i stap aninit long bikpela han bilong Nesenel Gavman.

i go long pes 3

Kopi indastri i pret long han bilong politiks

KOPI Indastri long Papua Niugini i no laikim tru Gavman i putim han bilong em i kam insait long senisim ol lo we i lukautim ron bilong kopi indastri long Papua Niugini.

Ol i tok sapos dispela i kamap bai i gat bikpela hevi o bagarap tru i kamap insait long kantri.

Ol i mekim dispela toktok bihain long sampela toktok i kamap olsem Gavman i laik bihainim tingting bilong Fud na Agrikalsa Ogenaisesen (FAO) konsalten long kamapim rifom o senis long lo bilong Kopi Indastri Kopresen (CIC Act 1991).

Ol i tok taim dispela rifom i kamap em bai bagarapim tru dispela K500 milien indastri na planti pilai politiks tru bai kamap.

Dispela em bikpela toktok tru ol lain insait long kopi indastri i mekim taim ol i givim toktok bilong ol long ol Minista na ol bikman bilong Gavman insait long konsaltetiv Implimentesen na Monitoring Kaunsil (CMIC) long Hailans Rijnol Forum we i kamap long Hagen siti long Tunde dispela wik.

Ol lain husat i makim kopi indastri i bin givim strongpela toktok bilong ol bihain long sampela toktok kamap olsem Gavman i laik bihainim dispela tingting bilong FAO long kontrolim olgeta bikpela diwai krop indastri long PNG olsem Kopra, Kakau, oil pam na kopi. Dispela i min tu olsem Gavman yet bai makim husat man long kisim wok olsem siaman o bos bilong ol dispela indastri long kantri.

Long Tunde apinun ol bikman

bilong kopi indastri i bin givim petisen bilong ol i go long Minista bilong Trensport na Sivel Eviesen na ekting Minista bilong Nesenel Plening Bart Philemon long tok egensim dispela senis. Dispela petisen i go long Praim Minista Sir Mekere Morauta.

Ol i laik kopi indastri i stap em yet na noken senis bikos Gaman i ken bringim politiks i go insait na bagarapim indastri bilong ol pipel.

Planti ol lain long kopi indastri i tok olsem moa long 1 milien pipel insait lng PNG i kisim strong long kopi indastri na Gavman i mas noken tru traim long ronim daun dispela bikpela indastri we i save bringim moa long K500 milien i kam insait long kantri olgeta yia.

Ol lain i makim kopi indastri insait long smolholda, blokholda, plentesen na ol ekspota na prosesa i tok strong egens long dispela long wanem rifom o senis.

Ol i no laikim tu wankain asua Gavman i mekim pinis long ol arapela indastri na tu long Kakao na kopra i kamap long kopi.

Wanpela bikman insait long kopi indastri na Jenerel Menesa bilong Natgro Menesmen long Mt Hagen i tokim CMIC miting olsem dispela ripot o toktok bilong FAO konsalten i mekim long senisim lo bilong CIC Act 1991 bai putim kopi indastri long wankain hevi arapela indastri i bungim pinis. Mista Sharma i tok olsem taim indastri i lusim dispela indpendens em i gat bai i lukim politiks i go insait na bai gat moa hevi long mani bilong kopi ekspot.

i go long pes 3



Wewak kisim pis keneri • Nesenel gavman, Is Sepik Gavman na ol lain i makim Angco kampani i sainim agrimen long sanapim dispela atun faktori long Wewak, Is Sepik provins. Angco i bung wantaim Starkist Sea Foods bilong Amerika na FCF Fisheries bilong Taiwan long kirapim dispela faktori. Wanpela moa atun kampani, Bumblee Bee na Is Sepik gavman bai stap insait tu long dispela bisnis. Na nem bilong dispela kampani em South Seas Tuna Corporation. Thomas Negints, siaman bilong Angco i tok kampani i lusim pinis K5 milien long dispela wok. Em i tok taim faktori i op bai ol i prosesim 200 metrik tan atun long wan wan de. Long namba tri yia bai faktori i mekim moa wok i go inap long 400 o 500 metrik tan. Bai i gat tupela hap long dispela projek. Namba wan hap bai kostim \$US16 milien na namba tu hap kostim narapela \$US16 milien gen. Dispela projek bai kamapim K35.2 milien long wan yia. Kampani i tok tu olsem dispela projek bai kamapim moa long 1,200 wok bilong ol pipel.

Nestlé MILO IKEN WOKIM GUTPELA SAMTING LONG YU

PLIS RIPO

Nesanel Kapitel Distrik:

Ol pipel i stap long Touaguba Hills long taun i kisim tok lukaut long plis long was gut long wok- about bilong ol long nait na bik moning.

Bos bilong ol plis long NDC John Marru i wokim dispela tok lukaut bihain long ol raskol i bin fos na kisim wanpela haus meri bilong wanpela Malesia famili long dispela wik.

Bihainim tu dispela samting, ol plis bai wokim planti patrol long Touaguba Hills eria long dispela taim.

Mista Marru i tok ol raskol i bin brukim haus bilong wanpela Malesia famili na kisim haus meri husat i bilong Morobe. Bihain ol bin painim dai bodi bilong meri ya long hap maunten klostu.

Ol plis ripot i tok ol bin bagarapim na kilim dai meri.

Long wankain taim tu, ol raskol i bin katim wanpela sekyuriti gad wantaim naip, paitim em wantaim wanpela hap ain na sutim em long han wantaim gan.

Mista Marru i tyok ol plis i wok long laikim komyuniti sapot wantaim komyuniti polisings.

Morobe:

Plis Minista Mathias Karani i tok promis olsem wanpela pemanen plis patrol bai i save beis long Bulolo Haiwe insait long Morobe provins.

Dispela em long hap rot namel long Wau/Bulolo na Menyamya Haiwe.

Minista i tok dispela em bikos raskol pasin long dispela hap i wok long go bikpela.

Long dispela taim, ol raskol i wokim planti holap long ol ka na dispela i mekim ol PMV draiva long kisim wanpela petisen i go long minista long wokim samting.

Long Mande Mista Karani i bin tokim samting olsem 50 PMV opereta i bin bung long Mumeng na holim ol toktok long stop wok olsem dispela haiwe patrol em bai beis long hap long lukautim haiwe we planti holap pasin i wok long kamap long en.

Mista Karani i no bin tok wanem taim tru ol bai putim dispela yunit na i stat wok.

Long wankain taim tu, minista i bin kisim wanpela petisen long apgetim haiwe. Na Woks Minister Alfred Pogo i tok em bai lukluk long en.

Nu Ailan:

Plis long Nu Ailan i sutim na kamapim bagarap long tupela raskol husat ol i bilip olsem i bin stap insait long birua bilong kilim dai wanpela plisman long Kavieng i no long taim i go pinis.

Plis ripot i tokaut long nem bilong tupela olsem Clifford Daniel na Gibson Micah.

Ripot i tok tupela i memba bilong faipela rasok grup husat i bin sutim wanpela plisman na wokim tu ol arapela holap pasin long provins.

Provinsal Plis Komanda Bernard Orim i tok plis i wok long painim Clifford bikos em bin ronawe long kalabus, kilim dai narapela man na karimaut ol arapela bikpela trabel.

Em i tok Clifford i bin ronawe long Bomana haus kalabus foapela krismas i go pinis na i stap hait yet taim em i wokim dispela birua long Kavieng taun.

Palamen nius wantaim WENCESLAUS MAGUN

Nakmai laik helpim ol pipel long ples

GAVANA bilong Wes Niu Briten, Clement Nakmai i tok wanpela bikpela astingting bilong em stat long taim em i win long ileksen i go inap long yia 2002, em bilong helpim ol pipel long ples.

Mista Nakmai i tokim ol niusman long palamen las wik olsem, em i gat tingting long rausim sosel poveti (hevi ol pipel i save bungim long sindaun na laipstail bilong ol). Dispela i min olsem em i gat laik long helpim ol pipel long rit na rait bai ol i ken stretim gut sindaun bilong ol long ples.

Em i tok bikpela namba bilong ol papa na mama na sampela pikinini i no save long rit na rait. Long dispela as ol i no inap long ronim bisnis, sanap long toktok long rait bilong ol insait long ol wok devel-opmen i kamap long provins.

Mista Nakmai i tok sapos i nogat ol gutpela famili bai i nogat gutpela sosaiti. Long dispela as, em i tok gavman bilong em bai traim long helpim ol famili long stretim sindaun bilong ol.

Long sait bilong provinsal gavman edministresen, Mista Nakmai i tok em i no inap kamapim nupela polisi. Tasol em i tok em bai stretim straksa o plen na kisim ol man i gat save long mekim gut wok.

Mista Nakmai i tok em i luksave olsem ol wok manmeri bilong gavman long WNB i no karimaut ol polisi na tu ol i no kisim gutpela trening long mekim wok. Em i tok em i gat laik long lukim olsem ol sevises ol wokmanmeri long gavman bilong em i givim i mas gat stendet i antap.

Mista Nakmai i tok em i ting long bringim ol sevise olpela gavman i promis long givim i go long ol pipel i go inap long Desemba. Bihain long dispela em bai bihainim plen em i kamapim bilong provins em i kolim 'Plen 2007'.

Wanpela bikpela astingting insait long dispela plen em long lukim ol pipel yet i

kamap papamama bilong ol projek. Long dispela we, ol bai lukautim gut ol sevise gavman i givim ol na lukim dispela ol sevise i helpim ol longpela taim.

Moa yet, Mista Nakmai i gat laik long bringim ol telepon sevise i go long ol ples na tu kamapim gutpela kostel siping sevise long provins.



• Nupela Gavana bilong Wes Nu Briten Clement Nakmai (Namel wantaim wara) i sindaun wantaim ol sinia publik sevans bilong provins bihain tasol long em i winim ileksen bilong rijinol sit long las mun. Foto: EDDIE SAUNDERS.

Mista Nakmai i tok em bai wok bung wantaim ol non gavman ogenaisesen insait long provins. Em i tok ol pipel bilong PNG i mas luksave long ol bus, graun, wara na lukautim ol dispela samting bikos laip bilong ol pipel i strong long ol dispela samting.

Em i tok em i luksave olsem i gat planti moa wok i stap long mekim. Ol wok em i gat laik long mekim em long wokbung wantaim Is Niu Briten provinsal gavman long joinim tupela provins wantaim haiwe.

Em i tok tu olsem em bai painim olgeta rot em i ken long kisim mani na ol arapela teknikal sevise i go long WNB long kamapim gutpela sindaun bilong ol pipel.

Mista Nakmai i tok em i gat laik tu long kamapim gutpela ples bilong bisnis long WNB olsem bai ol bisnis lain i ken go long WNB na kirapim ol bisnis long provins.

Em bai tokaut long plen bilong em long palamen Jong Julai 17, taim palamen i sindaun gen long kibung.

Sapos mani bilong ol memba i lus bai Woks Dipatmen i bekim

WOKS Minista, Alfred Pogo i tokim ol niusman las wik olsem em i pret Dipatmen bilong Treseri nogut i yusim mani bilong ol memba insait long olpela tras akaun bilong 'Woks Saspens Ausait Sevise' (WSOS) long wanem ripot Dipatmen bilong Treseri i givim ol em i no wankain olsem ripot ol yet i gat.

Mista Pogo i tok sapos i tru olsem

Dipatmen bilong Treseri i kisim mani insait long dispela tras akaun na putim i go insait long konsolideted reveniu, orait Dipatmen bilong em i mas bekim mani bilong ol memba.

Em i tok tu olsem bikos wok painim i go insait long WSOS tras akaun we ol i sapos long pinisim wok painim long mun Me tasol ol i no mekim yet, Prais Minista i bin givim tok

orait long Woks Dipatmen long statim ol nupela tras akaun bai ol memba i ken putim mani bilong ol i go insait na skruim ol wok ol i bin statim pinis.

Mista Pogo i tok wantaim dispela nupela tras akaun, ol memba long palamen na husat ol arapela lain i gat laik long putim mani i go insait long mekim ol wok i ken go het na putim mani long en.

ADB givim K157m long ol Hailans provins

ESIAN Developmen Beng (ADB) i givim K157,500,000 (US\$63 milien) i go long rot mentenens na riabilitesen bilong ol nesanel na provinsal rot insait long 5-pela Hailans provins. Dispela mani i no go long stretim Okuk haiwe, Minista bilong Woks Alfred Pogo i tok.

Em i tok ol 5-pela Hailans provins i putim K4 milien olsem mani bilong bungim wantaim ADB mani long kirapim ol rot mentenens long provins bilong ol.

Mista Pogo i tok long lukim olsem wok i kamap, gavman i makim wanpela menesmen tim o Hailans Rijinol Mentenens Grup (HRMG) i kirapim opis bilong ol long Hagen. Ol lain i stap insait long dispela HRMG em long wanpela menesa bilong Dipatmen bilong Woks na ol Konsalten.

Mista Pogo i tok stat long Ogas em i bilip ol projek bai stat.

Wol Beng bai givim K20m long stretim hailans haiwe

MINISTA bilong Woks, Alfred Pogo i tokaut las wik olsem Wol Beng bai givim K20 milien long stretim olgeta hailans haiwe stat long Makam maus rot i go pinis olgeta long Mendi.

Em i tok ol bai yusim hap mani long karimaut wok painim i go insait long hailans haiwe.

Nau yet Mista Pogo i tok ol i glasim pepa bilong ol konsalten husat bai karimaut dispela wok painim.

Mista Pogo i bilip wok bai stat long Ogas 2002.

Em i tok Woks Dipatmen i tingting long painim mani long pinis bilong dispela yia bilong stretim ol nesanel na provinsal rot insait long Oro, Morobe, Sentrel, Manus, Is Niu Briten, na Wes Niu Briten, Mista Pogo i tok.

Em i tok bai ol i makim wanpela Employa Projek Menesa (EPM) long helpim Dipatmen bilong Woks long karimaut ol menesmen na edministresen bilong dispela projek.

Em i tok tripela yia i go pinis ol i painim wanpela konsalten na ol i bilip ol bai painim wanpela kontrak long pinis bilong Julai 2000.

Mista Pogo i bilip ol bai painim dinau mani namel long 2001 na 2004 long karim aut dispela wok.

Hevi bilong ol rot bai i stap yet bikos nogat inap mani, Pogo i tok

HEVI bilong ol rot i bagarap insait long kantri bai stap yet long wanem i nogat inap mani insait long Dipatmen bilong Woks long karimaut ol nesanel rot mentenens, Minista bilong Woks, Alfred Pogo i tok.

Em i tok insait long K20 milien gavman i skelim i go long rot mentenens, ol i yusim K14.8 milien pinis long mekim ol wok. Olsem na i gat K5.2 milien tasol i stap bilong mekim ol rot mentenens long ol mun i kam yet long dispela yia.

"Dispela em i no inap. Mipela bai givim gut dispela mani long ol imejensi rot wok tasol," Mista Pogo i tok.

Em i tok tu olsem ol hevi bilong ol disasta i wok long kamap planti taim tu i kaikaim olgeta mani bilong Woks Dipatmen na olsem i putim Dipatmen long bikpela hevi. Long dispela as em i tok sampela provins bai i no inap kisim helpim long dispela yia.

Mista Pogo i tokaut tu olsem Dipatmen bilong Fainens na Treseri i

makim K5.2 milien long baim ol wok ol kontrakta i bin mekim long Bulolo-Mumeng, Bereina-Malalaua, na Ramu Haiwe.

Moa yet, em i tok, dipatmen i makim K4 milien long mekim ol mentenens wok long 5-pela hailans provins olsem hap mani gavman bilong PNG i putim i go long Asien Developmen Beng Program.

Mista Pogo i tokaut tu olsem Dipatmen bilong Woks i no save kisim mani stret bilong mekim ol wok. Em i tok taim Dipatmen bilong Fainens na Treseri i givim mani, olgeta mani i save go long Dipatmen bilong Nesanel Plening na Monitoring, na long taim bilong ol yet, ol i save givim mani i go long Woks Dipatmen.

Mista Pogo i tok em i no amamas long dispela pasin long wanem dispela pasin i stapim planti wok long kamap kwik taim Woks Dipatmen i no kisim kwik mani.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



Publishing Weekly, Thursday, for
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Ltd.

General Manager and Group
Editor in Chief:
Anna Solomon.
Acting Advertising Manager:
Jucko Oberleuter

Papers distributed by air
throughout PNG.
Available by air mail
subscription within
Papua New Guinea
and overseas

Editor of Wantok:
Yakam Kelo.

Email address:
word@global.net.pg

Advertising deadlines, Display bookings: Tuesday
midday. Camera ready copy: Wednesday midday
Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

Ol liklik kopi groa i no laikim gavman i lukautim kopi industri

TIMOTHY AIMS i raitim

PLANTI tausen manmeri insait long 5-pela hailans provins i bin tokim Gavman olsem ol i no amamas tru long Gavman bai mekim ol senis nabaut long lo bilong Kopi Industri Kopresen (CIC) we Gavman bai lukautim kopi.

Moa long wan tausen manmeri i kam long olgeta 5-pela provins bilong Hailans i bin bung long fran bilong Islander Hotel long Hageri aste long soim dispela bel hevi bilong ol i go long ol Gavman Minista na ol Hailans nesanel lida long taim bikipela bung bilong ol Hailans lida i bin kamap long Tunde dispela wik.

Insait long wanpela petisen moa long 50 mausman na komuniti lida i sainim i tok ol i no laikim tru Gavman bilong Sir Mekere i senisim ol lo bilong kopi industri.

Petisen bilong ol i go long Prais Minista Sir Mekere Morauta i tok, mipela klostu long 2 milien ol liklik manmeri kopi groa long ples husat i save hatwok tru long planim, lukautim na salim kopi i no amamas long harim tingting bilong Gavman long senisim mama lo we i lukautim Kopi Industri (CIC Act 1991).

Ol i tok nau politikis lain i wok long putim han bilong ol i go insait long ol kain kain wok na ol i pret wankain paul pasin we i bin kamap long NPF, POSF, Air Niugini na Telikom i kamap

long kopi indatri tu sapos gavman na ol politisen i lukautim kopi.

Ol tok gavman i mas sapotim kopi olsem bipo gavman i bin mekim long taim bilong kopi ras na taim prais bilong kopi long wol maket i bin go daun tasol gavman i putim mani i go insait long kopi stebelaisesen fan long strongim kopi prais long PNG.

Ol i askim gavman long mekim wok bilong ol stret long stretim ol rot, haus sik, skul na ol arapela sevis we i wok long bagarap. Sapos gavman i gat tingting long helpim ol pipel, em i mas stretim olgeta han rot na Okuk haiwe bikos em ol rot we ol liklik kopi groa i save bihainim long go salim kopi bilong ol.

Petisen i tok ol i sapotim tru tingting bilong olgeta wanwan asosiesen bilong Kopi Industri olsem gavman i noken tru rausim CIC aninit long dispela tingting we Food and Agriculture Organisation (FAO) i laik kamapim. FAO i laikim ol wok we i save go pas long laikai na ol krops i mas go aninit long lukaut bilong gavman.

Trenspot Minista Bart Philemon na Woks Minista Alfred Pogo i bin kisim dispela peitisen makim gavman long Tunde long Highlander Hotel long Hagen taun. Ol hailans lida olsem Masket langalio, Ludger Mond na ol Gavana wantaim tu ol provinsal edministreta na ol kaunsil presiden bilong hailans i witnessim dispela petisen i go long han bilong tupela gavman Minista ya.

PPP i sapotim Morauta Gavman na ol rifom program

YAKAM KELO i raitim

PIPELS Progres Pati (PPP) tu i tokaut olsem ol i sapotim Gavman bilong Sir Mekere Morauta na rifom program bilong em.

Lida bilong PPP na Minista bilong Tred na Industri Michael Nali i tokaut olsem PPP i sanap strong wantaim dispela Gavman na bai sapotim Prais Minista na ol rifom program we dispela Gavman wantaim ol pati insait long Gavman i kamapim.

Insait long bung bilong pati long las wik Fonde, Mista Nali i tokaut olsem PPP i bin helpim long sanapim dispela Gavman we Prais Minista Morauta i bin go pas long en long Julai las ya.

Mipela em insait tru bilong dispela Gavman na bai sanap strong wantaim long sapotim olgeta rifom program na ol wok bilong stretim gen ekonomi, ol institusen na politikel rifom we i sut long stretim gut ol institusen na politikel sistem bai i ken kamapim demokrasi na gutpela Gavman, Mista Nali i tok.

Mista Nali i tok PPP i sanap long wok bung wantaim dispela Gavman long mekim kamap tru ol tingting na wok Gavman i laik mekim kamap inap long 2002 nesanel ileksen.

Mista Nali i mekim dispela toktok bihain long Pangu Pati na Edvens PNG Pati (APP) i bin tokaut pastaim long sanap bung na wok klostu wantaim dispela Gavman long kamapim ol rifom program bilong Gavman long i mas wok. Na tu strongim long abrusim ol traim nabaut we i laik mekim guria long Gavman olsem vot i nogat bilip.

Pangu na Edvens PNG Pati i bin soim tu dispela toktok bilong ol taim toktok bilong Wol Beng long rurel developmen fan (EDF) mani we wanwan memba i save kisim i bin kamapim planti nois long ol memba long floa bilong palamen.

Lida bilong Pangu Chris Haiveta na APP lida John Pundari i bin sanap toktok wantaim Gavman long dispela toktok.



Bai I Kamap Bihain Long 4-pela Dei

NSO o Nesanel Statistikel Opis, ol lain bilong mekim senses, i laikim K10 milien moa long wokim 2000 Nesanel Senses.

Wanpela Gavman komiti bai i bung tete long Pot Mosbi long glasim dispela samting na tokim Gavman long helpim NSO o nogat.

Sekriteri bilong Plening na Monitoring Dipatmen Mista Camillus Midire bai i kisim dispela K10 milien hevi bilong senses i go long Gavman komiti miting bilong tete tasol Senses Direkta Mista John Kalamoroh i bin tokim em long dispela samting las wik.

Mista Kalamoroh, husat em i wokman bilong NSO, i tok olsem NSO bai i yusim dispela K10 milien long stretim tupela bikipela hevi bilong senses.

1. Sampela bilong dispela K10 milien bai NSO i yusim long peim 36,264 senses wokmanmeri husat bai i kauntim ol pipel long olgeta hap bilong Papua Niugini.

2. Bikipela hap bilong dispela mani bai NSO i yusim long hairim na chatarim ol balus, helikopta, spidbot, sip na ol trak na kar long bringim ol senses wokmanmeri na ol kago bilong wok senses i go long ol ples bilong wok na bihain salim olgeta senses pepa i go bek long Pot Mosbi taim senses i pinis.

Senses bai i stat long dispela Sande-namba 9 dei bilong mun Julai na pinis long neks Sarere namba 15 dei bilong mun Julai.

Long wik bihain long Julai 15, bai ol senses wokmanmeri i chekim wok bilong ol na sapos ol i abrusim sampela hap bai ol i go bek na mekim senses long ol dispela hap.

I tru hevi bilong K10 milien i stap yet tasol Mista Kalamoroh wantaim ol wokmanmeri bilong em i go het yet long pinisim olgeta wok na sambai long mekim senses.

Mista Kalamoroh i tok olsem olgeta manmeri pikinini i mas putim nem bilong ol long pepa bilong senses na givim senses toktok bilong ol long ol senses wokmanmeri.

Dispela bai helpim Gavman long plenim developmen, em i tok.

"Sapos ol pipel i no givim toktok bilong ol long senses. Gavman bai i no save olsem ol i stap na Gavman bai abrusim ol taim Gavman i laik skelim mani bilong developmen long ol wanwan ples," Mista Kalamoroh i tok.

"Plis i noken mekim dispela kain asua," em i tok aste long Pot Mosbi.

● Gavman bilong Papua Niugini na Gavman bilong Australia i sapotim 2000 Nesanel Senses.

Kopi industri i pret long han bilong politikis

i kam long pes 1

CIC seketeri, Eddie Bowoku i tokim CIMC miting olsem CIC i kontrolim gut industri wantaim sampela gutpela program bilong em long helpim ol kopi groa olsem freit subsidi skim, kredit skim na ol trening program.

Mista Bowoku i tok olsem CIC i ron gut nau bikos nogat politikis i stap na kampani i ron gut tru bihainim dispela lo i stap long 1991 CIC Act.

Mista Bowoku i tok Gavman i mas luktuk long stretim hevi bilong lo na oda na stretim ol rot na bris na bringim sevis long ol pipel long kantri.

Man husat i makim ol smolholda groa asosiesen (SHCGA) Ricky Mitio i tok Kopi Industri Kopresen i go pas tru long dispela wok bilong Praivetaisesen na Koprotaisesen. Olsem na wanem kain rifom em Gavman i laik mekim i mas noken tru go insait long kopi indatri.

Mista Mitio i tok olsem nau yet Gavman i wok long toktok long Praivetaisesen na Koprotaisesen. Tasol CIC i go pas pinis na kamapim bodi bilong em yet bihainim stret dispela lo bilong Praivetaisesen na Koprotaisesen. Gavman i mas lukim CIC olsem wanpela gutpela piksa.

Mista Mitio i tok olsem histori i soim pinis olsem politikis bai bagarapim industri na mani bilong ol pipel long stebelaisesen fan bai bungim hevi.

Narapela plis fos em bikipela hevi tru, Wakon i tok

i kam long pes 1

Mista Wakon i tok mama lo (seksen 199) i tok long i mas gat wanpela plis fos tasol insait long kantri aninit long kontrol bilong Nesanel Eksekutiv Kaunsil (NEC) we Minista i go pas long en. Tasol dispela i no stapim kamap bilong ol risev na oksilari plis.

Mista Wakon i tok i gat oksilari plis i stap pinis long Bogenvil we Australia na Nu Silan Gavman i helpim long wok bilong ol. Ol i statim trening pinis long ol bikiples we i stat long Bana distrik long Jun 9 na bai trening i kamap tu long Tonu na Buin long mun Ogas. Plen i stap pinis long sanapim oksilari plis long Wakunai na Tinputz na taim i gat inap mani, bai ol i mekim dispela, em i tok.

Mista Wakon i tok plis fos i strong long i mas gat ol plisman long Bogenvil. Tasol maski planti bikipela hat taim, ol pipel i stat long soim rispek long ol oksilari plisman na wok bilong ol i wok long kamap gut we ol pipel i stat long ripotim ol hevi na trabel long ol.


Em i tok long nau yet ol trabel lain i kisim bikipela sas i go kalabus long Kerevat long Is Nu Briten provins na ol lain i kisim sotpela taim i go kalabus long Buka.


Mista Wakon i askim Koreksenal Sevis Dipatmen (CIS) long noken sanap tasol. Ol i mas go het na kirapim wok bilong ol bek long Bogenvil ailan.

Em i tok em i gat bilip bai gutpela sindaun na amamas bai kamap gen long Bogenvil bikos i gat strong bilong bung wantaim i stap namel long ol pipel long Bogenvil.


Ekting Komanda bilong PNG Difens Fos, Komanda Carl Malpo i tok long rausim olgeta soldia long Bogenvil ailan bai no gutpela tru. Bikos i gat ol trabel yet we ol BRA paitman i wok long pretim sindaun bilong ol manmeri long ailan.

Komanda Malpo i tok tu olsem i gat ripot olsem ol Bogenvil lain i wok long brukim boda (solwara) i go long hap-sait bilong Solomon Ailan. Tasol ol ami i nogat ol gutpela masin na pawa bilong holim o stapim dispela hevi.





NIUGINI AILAN NIUS



Ol Baining lida no laikim ol wanpisin i salim graun

OL BAINING lida insait long Is Nu Briten bai kisim i go long kot ol lain bilong ol husat i wok long salim ol hap graun bilong wanpisin bilong ol.

Long nau, ol lida i mekim ol wok painim maut long painim stret husat ol lain i wokim dispela pasin bikos ol i no kisim gutpela tok orait na ol wok long salim ol hap hap graun bilong wanpisin i go long ol ausait lain.

Thomas Kalas em wanpela Baining lida i tok olgeta Baining graun i bilong ol wanpisin grup na ol wan wan man i nogat rait long salim ol hap graun i go long ol arapela lain. Sapos em i laik wokim dispela, em mas tok-save long ol hauslain na sapos ol i givim tok orait long en, em i ken go het na salim.

Mista Kalas i tok ol

wan wan man bilong Mali, Uramat, Kairak na Keket wanpisin i wok long salim ol hap graun i go long ol ausait lain wantaim nogat gutpela toksave long wanpisin hauslain.

Em i tok ol bai kisim ol lain ya i go long kot na kot yet bai givim mekim save i go long ol.

Mista Kalas i tok i gat lo i stap we i lukautim tumbuna graun long ol lain husat i laik salim nabaut graun na i no bihainim lo na olsem ol dispela lain husat i wokim dispela bai kamap long ai bilong kot long stretim samting ya.

Em i tok ol lida i bihainim dispela rot bikos ol lain lukautim graun bilong ol Baining pipel na ol tumbuna lain husat i kamap bihain.

Helt, edukesen na yut long Not Bogenvil klism K202,700 helpim long Oglo

Veronica Hatutasi i raitim

FORES Minista na Memba bilong Not Bogenvil Michael Ogio i givim K202,700 long helpim ol skul, sios, ol yut na helt sevis insait long Peit na Tonsu eria long Buka distrik.

Dispela em hap mani long Rurel Eksen Program (RAP) fan bilong Minista Ogio we em bin prosenim long ol lida insait long Gagan bung long Buka long las wiken.

Twelve-pela elementeri skul long Not Bogenvil ilektoret i bin kisim K2,000 (wan wan) taim wan wan long ol bot siaman bilong ol komyuniti na praimer skul i kisim K5,000.


Mani we Minista i givim long ol skul ya inap long K89,000.

Minista i bin baim na givim ol musikel instramen olsem Yamaha gita, kibot, ol bilding metiriel bilong sios, ol spots ikwipmen na givim i go long ol yut, skul na sios.

Minista i bin baim tu ol trofi, ol sil, ol bal, ol net na givim i go long ol lida insait long ol komyuniti eria bilong yusim long ol pilai resis long Not Bogenvil ilektoret.

Minista Ogio i bin prisenim tu K10,000 i go long ol yut bilong baim ol samting long wokim faivpela sios bilding long eria.

Long Sarere, Mista Ogio i bin prisenim narapela sekmani inap long K89,000 bilong go hetim ol yut, sios, meri na spots projek long hagiwe eria long Not



• Siaman bilong Joanes i sekanim memba bilong em Michael Ogio wantaim smail. Dispela long wanem memba Ogio i mekim promis olsem em stretim ol skul. Dispela kiasrum long beksait bilong tupela man i hap pinis na dispela helpim bilong memba nau bai lukim ol piknini i skul gut.

Bogenvil.

Ten tausen (K10,000) long dispela em i katim long Malasang klinik.

Long dispela wik Tunde, em bin prisenim K20,000 i go long Lonahan Komyuniti skul bipo em i kam bek long Mosbi.

Mista Ogio i bin singautim Woks na

Plening Dipatmen long redim ol plen bikos em i laikim bai ol i wokim tupela etpos long eria.

Em bin askim ol tu long lukluk long ol bris na rot long eria bikos ol i bikpela samting long wanem dispela bai helpim ol fama long karim ol kakau, kopra na ol arapela maket kaikai i go long Buka.

WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA VIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Ol Buka siefs kisim tok long wok bung wantaim

FORES Minista na memba bilong Not Bogenvil Michael Ogio i bin tokim ol pipel bilong ples Gagan long Buka Ailan long lus tingting long ol bel kros na pait namel long ol yet na wok bung wantaim na ol i ken kisim gut ol sevis.

Minista Ogio i bin wokim dispela toktok insait long wanpela seremoni bilong pogivim wanpela arapela na kamapim bel isi pasin (rikonsiliesen) ol bin holim long Gagan long las wiken.

Ol siefs na pipel bilong ol Kaunsil of Siefs eria olsem Peit, Tonsu na ol liklik ailan

olsem Petats, Pororan, Matsungan na Nova na Kahule eria long Not Bogenvil ilektoret i bin bung long ples Gagan long dispela sekan na bel isi pasin seremoni long namba wan taim insait long siksipela krismas.

Dispela seremoni ya em Minista Ogio na ol lidaman i bin kamapim bikos ol laikim ol pipel long lus tingting long ol pait na belkros ol i gat na ol sevis olsem helt, edukese, gutpela rot na bris na ol arapela sevis moa i no go gut long ol pipel. Bikos long pilai politik we wanpela eria i tok narapela eria tasol i wok long kisim ol

helpim na sevis moa long narapela, ol hevi i kamap na ol ples lain i no kisim gut sevis. Dispela ol bel kros i save kamap namel long ol siefs, ol nesenel na provinsel lida, na ol Lokol Level Gavman lida.

Bikpela wari we ol siefs i bin bringim insait long seremoni ya em luksave bilong ol yangpela long ol bikman na atoriti we i wok long bruk daun wantaim tu ol planti arapela hevi moa i wok long kamap insait long komyuniti i sut long ol yangpela long dispela taim.

Ol siefs na pipel i bin laik save tu watpo gavman i laik stapim ol Palamen bung long

Januari inap long mun mun Julai neks ya.

Dispela eria i save givim strongpela sapat i go long Minista Ogio na ol bin askim memba ya long kamaut na tok klia long ol sapota bilong em sanap bilong em long dispela samting na tu wanem ol sevis em i givim long ol pipel stat long taim em i kamap olsem wanpela palamen memba.

Minista Ogio i bin tokim ol pipel long noken bel kaskas na pait moa bikos taim ol i mekim olsem, ol yet i wok long bagarapim ol.



Bai ileksen long Wes Nu Briten i go gut

ILEKTOREL Komisn i amamas long bai i elkesen insait long Wes Nu Briten we ol i tok em bin go gut tasol wantaim nogat bikpela meknais.

Bai ileksen i bin kamap tupela wik i go pinis na Clement Nakmai i bin win long en wantaim 8155 vot long kamap olsem Rijinel memba na Gavana bilong Wes Nu Briten.

Ilektorel opis hetkota long Mosbi i tok ol amamas olsem ol wok long dispela bai ileksen i bin go gut tasol.

Opis i amamas long gutpela helpim bilong ol provinsel ilektorel opisa, ol provinsel lida, ol kendidet, ol ples na komyuniti lida long redim gut provins na ol pipel na gutpela wok bung wantaim i bin kamap long mekim dispela bai ileksen i go gut tasol.

Bikpela tok tenkyu i go tu long Provinsel Edministreta John Maela husat i bin go pas long ol lain wokman bilong em na ol bin lukautim gut ol ilektorel opisa long sait bilong lojistik na gutpela wok bung wantaim long mekim stap long provins i gutpela.

Opis i tok tru i bin gat liklik meknais i kamap tasol dispela i no bikpela samting bikos ol gutpela samting i kamap long mekim wok i go gut i winim ol.

Twenti kendidet i bin sanap bai ileksen insait long Wes Nu Briten we sampelas biknem lain insait long provins i bin sanap long em.


Opis i tok tu olsem wankain samting tu long bai ileksen long Is Nu Briten we ol bin holim long sem taim.

Dispela bai ileksen i bin kamap long painim man long kisim ples bilong Gesel memba Nakikus Konga husat i bin risain long sia bilong en long dispela yia. Olpela Primia Sinai Brown i bin win long dispela bai ileksen we sevenpela man i bin sanap resis long en.


Wanpela samting tasol we ilektorel opis i no bin amamas long en em sampela rejista vota long Gasel i no bin vot.

Mak bilong ol vot we ol kendidet i kisim long win long Wes Nu Briten em Clement Nakmai-8155 vot, Isikar Matage- 7919, Joseph Tasuvasa 6731, Isidor Teli -2463, John Dako-2431, David Sui-3400.

Long Is Nu Briten, Sinai Brown i bin pulim 4412 na win, Henry Ningo i kisim 3796, Stanis Lingur i kisim 3,696, Ereman Tomete i kisim 2629 na Binam Kakap i kisim 2114 taim narapela tupela kendidet i pulim daunbilong long 2,000 vot mak.



SEPIK NIUS



Ol kaunsela tok lukaut long memba

FELIX RAMRAM i raitim

I GAT tok lukaut ol i mekim pinis i go long Memba na Minista bilong Koreksenel Sevises Micah Wes, olsem em bai kisim bikipela taim nogut i kam long Lokol Level Gavman presiden insait long ilektoret bilong em. Bihainim ol senis we bai RAP mani bilong memba bai i stap long lukaut bilong ol LLG na ol presiden.

Dispela tok lukaut i bihainim tasol ol ripot i tok olsem opis bilong memba insait long ilektoret bai i no inap moa long kisim na tu givim tokorait long ol aplikesen na submisen ol lain i salim long memba long askim helpim mani aninit long Rurel Eksem Progrem Fan o RAP bilong Vanimo Grin Memba.

Wanpela lain kaunsela husat long ol i bilong Grin Riva na Amanab LLG, kaunsela Sikpa Yamke bilong Wod 17 insait long Grin LLG i go pas long ol. I bin holim wanpela 2 aua miting wantaim ol opisa bilong Vanimo Grin ilektoret opis na autim bel hevi bilong ol.

Ol i tokaut olsem klostu olgeta LLG presiden insait long distrik i gat ol hait politiks tingting bilong ol yet i stap. Na ol bai yusim dispela sans long yusim RAP mani bilong Vanimo Grin memba long strongim wok politik bilong ol yet.

Kaunsela Yamke na ekskaunsela Inau Wani bilong Amanab i sutim tok long ol presiden olsem ol i slek lain na i no save long wok bilong ol. Na ol i mas risain long opis, sapos nogat bai ol kaunsela bilong ol i kamapim vot i nogat bilip long ol. Ol i go het na i tokaut tu olsem planti taim tru ol presiden bilong ol i wok long giaman ol olsem i nogat mani. Olsem na ol i no kisim K50 wan wan mun alauens bilong ol moa long 10-pela mun. Na tu ol presiden i no save singautim kaunsel miting long longpela taim.

"Tasol taim mipela yet i kam long Vanimo, mipela i lukim ol presiden i haiarim ol haia ka. Na planti taim ol i no yusim stret ol dispela ka long mekim wok tru bilong ol pipel," ol kaunsela ya i tokaut.

Ol lida ya i tokaut olsem ol i givim bikipela sapot tru long ol

toktok bilong narapela kaunsela, Albert Kukupen. Husat i tokaut olsem dispela ol mani we i mas bringim ol sevis i go long ol pipel long ples, ol lain antap i no yusim gut.

Ol skul, ed pos, ol rot, ples balus na ol narapela moa we i save givim sevis i go long komyuniti i wok long go bagarap olgeta. Nogat alauens bilong ol kaunsela na nogat kaunsel miting ol presiden i save singautim.

6-pela kaunsela ya i singautim Vanimo Grin Memba na Minista bilong CIS long putim olgeta hevi antap long ol LLG presiden bilong Vanimo Grin ilektoret wantaim eksekutiv bilong ol sapos ol i mekim rong disisen na pipel i karim hevi.

Mipela nau i askim Vanimo Grin Memba long redi long rausim dispela ol mani na opim wanpela tras akaun. Na putim ol mani ya we wanpela komiti bai go pas we memba yet i ken lukautim edministresen bilong dispela mani", ol kaunsela i tok.

Lambu Tales, Malolo, i bung long pinisim hevi

MATHEW PAIYAU i raitim

OL bikman na pipel bilong Lambu Tales, Malol, Wes Kos Aitape, i bin bung long las wik Fraide long kamapim wanbel bihainim bikipela kros pait namel long tupela long Epril.

Long dispela hevi, ol i bin yusim gan na ol strongpela samting long pait we tupela sait wantaim, i bin kisim bagarap long katres. Sampela bilong tupela sait wantaim i bin go long Raihu haus sik wantaim bikipela bagarap.

Bihain long dispela kros pait, tupela grup wantaim i bin sindaun wantaim bikipela pret. Ol pipel na famili i no bin fri, long muv nambaut long mekim ol wok bilong ol.

Vilis Kot Mejistret na mausman bilong Lambu, Luke Rawo, i tok. "Ol kaikai, pik na samting bilong sekan nau i stap hia i gat as. Yumi mas lukluk bek long wanem samting i bin kamap. Em i wanpela samting nogut tru i bin kamap long yumi."

Mista Rawo i tok long taim bilong dispela hevi, ol manmeri i bin sindaun wantaim bikipela pret. Na ol i tingting strong long ol i mas painim we long stretim dispela hevi na luksave olsem em i no ken kamap gen. "Dispela bung wantaim dispela ol kaikai bilong wanbel sekan i bihainim dispela strongpela tingting bilong ol," em i tok.

Mista Rawo i askim tu long kot oda long stopim ol pipel long noken holim ol strongpela samting bilong pait. Em i tok "Ol pipel i mas lainim pasin bilong stretim ol hevi long stretpela pasin."

Richard Sarim, Tales mausman i tok ol komyuniti lida i mas wok bung wantaim long stretim ol pipel long pasin nogut bilong ol. "Dispela ol pasin i save bagarapim sindaun bilong ol manmeri na i save kamapim belhat we inap kamapim bikipela hevi," em i tok.

Mista Richard i askim Mista Rawo long tupela i mas wok bung wantaim long bringim gutpela senis i kam insait long tupela komyuniti wantaim.

Aitape Distrik Kot Mejistret, Fredolin Kambibel na Ekting Distrik Edministreta, Martin Selmatin na Ekting Plis Stesen Komanda, Mark Kamies, i bin givim tu toktok bilong ol.

Ol autim amamas bilong ol long lukim tupela komyuniti i kam bung wantaim gutpela hamamas long kamapim wanbel sekan. Ol i tok i gutpela long lukim olsem ol pipel yet i luksave long wanem ol hevi i wok long bungim ol bihainim dispela kros pait bilong ol.

Ol i tok ol pipel i mas lainim na holim pasin bilong rispektim na laikim narapela arapela. Dispela bai i helpim long daunim tingting nogut long arapela olsem dispela hevi we i kamap long ol.

Ekting PSC, Mista Kamies, i tok "Pait wantaim ol birua samting, kalabus bilong en i bikipela tru."

Distrik Mejistret, Mista Kambibel i tok pasin bilong sutim ol wanlain i nogut tru. "Yu no sem long sutim ol lain bilong yu yet, yu no sem long dispela? Bikheth bilong yu bai bringim plis (plis fos) i kam long ples. Yu laik soim strong bilong yu gavman bai i soim strong bilong en", Mista Kambibel i tok.

Em i tok em i wokim pinis wanpela oda long strongim dispela kastam wanbel sekan na i wetim plis long wokim pepa long go wantaim dispela oda. "Dispela em i kastam tru na yumi mas rispektim na holim dispela mak bilong pis," Mista Kabibel i tok.

Tasol Ekting Distrik Edministra, Mista Selmatin i tok, yumi mas lainim long stretim ol hevi bilong yumi yet.

"Kam bilong ol plis i save kamapim planti hevi. Bihain long ol i go pinis, ol pipel i save sindaun wantaim belhat na belhat long narapela arapela long bagarap ol i bin kisim long ol plis. Dispela inap mekim sindaun bilong komyuniti i go bagarap olgeta," Mista Selmatin i tok.

Mista Selmatin i tok em i lukim planti manmeri long Malol nau i wok long go long taun long salim bisnis olsem kaukau na kopra. Dispela em i gutpela mak i soim tingting bilong ol pipel i go strong long mekim ol gutpela wok long helpim sindaun bilong ol.

"Noken westim gutpela taim bilong yupela long wokim ol hommeid gan. Mekim yupela yet yusful long ol gutpela wok olsem wok bisnis.

Bihain long ol toktok mausman bilong tupela grup, Mista Richard Sarim na Mista Luke Rawo, i bin go pas long ol pipel long sekan long makim dispela wanbel sekan.

Rausim rifom sistem long Sandaun, lida i tok

WANPELA Sandaun lida i gat laik long lukim olsem ol i mas rausim rifom sistem insait long Sandaun. Bikos dispela sistem i no wok gut insait long provins.

Olpela Deputi Meya bilong Vanimo Eben Lokol Level Gavman i givim tingting olsem taim rifom i kamaut long senisim olpela provinsel gavman sistem 7 o 8-pela yia i go pinis. Sandaun provins inap nau i no lukim wanpela gutpela wok kamap insait long provins.

Insait long wanpela pas i kam long Wantok, olpela Vanimo Deputi Meya Hubert Labio i singautim olgeta siaman bilong ol LLG insait long Sandaun long bungim olgeta kaunsela bilong ol na paitim ol tingting na toktok na kamapim ol petisen na salim i go long Praim Minista na NEC. Long luksave long hevi provins i gat

wantaim rifom, na rausim na bringim Sandaun i go bek long olpela provinsel gavman sistem. "Mi skelim olsem, Nesenel Eksekutiv Kaunsel i wok long yusim tasol mipela ol LLG long abrusim ol hevi. Ol pipel i sutim pinga long mipela ol wod memba bilong ol LLG wantaim ol toktok olsem mipela i no mekim gut wok bilong pipel na i no save bringim sevis i go insait long komyuniti.

"Mipela ol wod memba o komisina i no save kisim RAP mani. Dispela mani i stap tasol long han bilong ol Nesenel Palamen memba. Na planti long ol nesenel palamen memba bilong Sandaun i no save tilim gut RAP mani bilong ol. Antap long dispela, ol i pretim ol hevi i kamap long provins na ol i save hait tasol i stap long Pot

Mosbi. Na hau ol i spenim mani bilong pipel, ol i no save tokaut long pablik, em i tok.

"Na mipela ol kaunsela o wod memba i save sindaun klostu tru insait long komyuniti 24 aua long wan wan de. Na pipel i save putim olgeta hevi antap long mipela, taim ol nesenel palamen memba i hait i stap long Pot Mosbi", olpela Vanimo taun meya i tok.

Hubert Lambio i tok, long longpela taim Sandaun i no lukim kaikai bilong rifom sistem insait long eben na rurel eria tu. I go wantaim nogat mani ol nesenel palamen memba i givim i go long provins long karim aut ol wok insait long provins. Olgeta wik, mun na yia ol helpim na sevises i no go insait long ples we pipel i stap.

Mista Lambio i tok, rifom sistem i no pinisim

o stapim ol gavman opisa na ol memba long paulim pablik mani, nogat tru. Em i tok, rifom sistem ya i givim moa pawa long ol memba wantaim ol gavman opisa long provins na distrik. Wantaim tu ol LLG presiden long yusim pablik mani long laik bilong ol yet. Na turangu i nogat gutpela sevis gavman i bringim i go long ol pipel long ples.

"Olsem na mi singautim olgeta LLG insait long Sandaun long singautim miting na pasim tokorait wantaim ol siaman bilong ol LLG na raitim wanpela petisen i go long Praim Minista na Nesenel Eksekutiv Kaunsel. Na tokim ol long rausim rifom sistem insait long Sandaun. Na bringim bek olpela provinsel gavman sistem i kam bek", Mista Lambio i tok.

WIN! WIN! WIN!

TOYOTA HILUX 4WD TO BE WON!

AND 25 PEOPLE TO WIN K1,000 EACH

DRAWN ON 15th SEPTEMBER 2000

SEND IN ANY 3 EMPTY WRAPPERS OF HI-WAY HARDMAN OR HI-WAY BEEF IN AN ENVELOPE WITH YOUR NAME AND ADDRESS TO: EMTV P.O. BOX 443 BOROKO, NCD.

Paradise TOYOTA

HI-WAY BEEF 4 BISKETS

HI-WAY HARDMAN Strongpela Bisket! 4 BISKETS


Paradise BEEF THE BIGGEST! 140g NET 4 BISKETS



SAUTEN



RIJON



Popondetta haus sik bai gat nupela londri

WOK long bildim haus bilong wasim ol klos bilong Popondetta Jenerel Haus sik bai stat long dispela mun.

Bilding ya bai kostim K35,000.

Ol ripot i kam long Oro Provins i tok memba bilong Ijivitari Simon Kaumi i givim mani bilong sanapim dispelas haus bilong wasim klos bilong haus sik.

Siaman bilong haus sik bod Arthur Jawadimbari long dispela yia i bin raitim wanpela pas i go long Memba bilong Sohe na Edukesen Minista Dokta John Waiko na Mista Kaumi long askim ol long mani bilong wokim dispela bilding.

Mista Jawadimbari i tok em i namba wan taim wanpela memba bilong Oro i givim bikpela hap helpim mani ya we i no kam long Rurel Eksen Program fan (RAP).

Londri o haus bilong wasim klos bai i gat long en hevi duti wasing masin na draia. Gavman bilong Australia long intenesenel helpim grup bilong en, AusAID, i bin givim ol dispela masin i go long Popondetta Haus sik long dispela yia.

Long longpela taim, haus sik ya i no bin gat gutpela ples long wasim ol klos long en. Ol bin wok long yusim wanpela rum klostu long sterelaisim yunit long wasim ol klos tasol dispela i no bin gutpela tumas long wanem em i egens long helt lo.

Wasing masin na draia i bin kostim K100,000.

Long taim Mista Kaumi i prisenim sekmani ya, em bin tok haus sik ya i bilong olgeta pipel long provins na em i bikpela samting long lukim olsem haus sik em i sevim gut ol. Na em bin tok em bai helpim haus sik long givim gutpela sevis i go long ol pipel bilong em long Oro.



Ol i welkamim ol bikman . Philip Aravure praimer skul insalt long NCD i bin gat wanpela seremoni long amamasim pinis bilong ol nupela haus tisa na kiesum we Praim Minista Sir Mekere Morauta i bin stap long en. Ol skul pikinini i putim ol gutpela tumbuna bilas na welkamim Praim Minista i go insalt long dispela seremoni. Aninit: Sir Mekere kamap long skul.



Ol plis i no painim yet husat i kukim Oro sensus opis

OL WOK painimaut long Popondetta Sensus opis pele i wok long go het tasol ol no painimaut yet husat i wokim dispela.

Em i hat long plis long kari-maut tu wok bikos long hevi bilong trenapot.

Ol ripot i kam long provins i tok ol i askim Oro administresen long givim helpim long salt bilong trenapot.

Provinsel Pils Komenda Paul Monama i tok ol wok painimaut i go het na plis i stap kwalt long dispela taim.

Ol bai stretim ol Oro rot neks yia

HELEN REI i raitim

Ol bai stretim ol rot long Oro provins long neks yia, ol atoriti long provins i tok.

Woks Minista Alfred Pogo i bin tokaut olsem las mun insalt long wanpela wokabaut em bin wokim i go long Oro provins.

Tupela em Popondetta-Kokoda na Oro Be rot.Edvaisa bilong Plening na Implimentesen Sarea Meakoro i tok Minista Pogo i bin mekim komitmen olsem ol mas silim dispela tupela rot bikos em ol nesenel rot ya.

Mista Meakoro i tok Oro-Be Afore rot em i wanpela bikpela rot bikos em bai joinim provins wantaim Sentrel na Milen be provins.

Em i tok dispela em i hap long 10-pela yia plen bilong provins long stretim ol rot na bris samting.

Long Sande, Mista Pogo i bin go lukluk raun long Afore na long Sande, em bin go long Kokoda. Mista Meakoro i tok Kokoda Rot bai kostim K21 milien taim Afore bai kostim K18 milien.

BOROKO

FOODWORLD

AT GORDONS

GLOBE CORNED BEEF TAPER 340gr

K2.79

INO DIA TUMAS ABUS LONG POT MOSBI

Tablebird Kwikkai 900 gr

K5.25

Tablebird Twin Pack

K11.80

Roots Rice 10 kg

K12.63



Roots Rice 1 kg

K1.37

Weet Bix 375 gr

K3.45

Wopa Biscuit 125 gr

K .50

Flame Plain Flour 1 kg


K1.11

Maggi Noodles 85 gr

K .50

Planti moa kaikai prais i go daun long en!

Ph: 325 7566, 325 0863 Fax: 325 7096



HAILANS NUIS



Papagraun laikim kom-pensesen long skul graun

TIMOTHY AIMS i raitim

OL sumatin long Maunt Hagen Sekenderi Skul i no bin skul long las wik Mande bikos long kros bilong kom-pensesen long graun we skul i sanap long en.

Ol pipel bilong Kokglam i bin strong long skul i mas pas inap long hevi bilong baim graun i stret pastaim we 12-pela kris-mas olgeta ol toktok i wok long kamap yet.

Siaman bilong ol asples Nelson Kerua i tok ol i bin karim

dispela hevi i go long Provinsal Gavman long planti taim i kam. Na Provinsal Gavman i save tokim ol long wetim Len Taitel Komisina na ol i wet longpela taim i kam.

Mista Kerua i tok dispela askim bilong ol i bin longpela taim na ol i laik mekim dispela eksen long pusim Len Taitel Komisina long kam toktok wantaim ol.

Ol asples i givim tupela wik long Provinsal Gavman na Edukesen Divisen long kisim Len Taitel Komisina i kam na stretim dispela hevi wantaim ol.

Sapos nogat bai ol i pasim skul.

Mista Kerua i tok ol asples i nogat tingting nogut long mekim trabel o bagarap long ol tisa na sumatin na ol samting bilong skul. Tasol ol bai kisim o kamap papa long ol samting we i stap long skul graun sapos i nogat wanpela toktok i kamap wantaim gavman na lens opis.

Long dispela wik skul i stat gen na ol sumatin i go bek long klasrum na skul bihain long Edukesen Divisen i tok ol bai toktok wantaim Len Taitel Komisina insait long dispela taim ol asples i askim long en.

Mobail Skwat 10 redi long Sauten Hailans

WANPELA spesel plis skwat i pinisim trening na i redi long go long Sauten Hailans provins long strongim wok bilong lo na oda long hap. Plis fos i redim dispela skwat bihain long Sauten Hailans provins i bin bungim planti hevi long sait bilong lo na oda long dispela yia we planti pait na raskol pasin i wok long kamap planti. Ol i kolim dispela spesel skwat em MS 10.

Plis Komisina John Wakon i tokim ol dispela lain skwat long i mas mekim stret wok bilong ol long strongim lo na oda na i noken mekim nabaut abrusim mak bilong wok we

ol bai karimaut.

Mista Wakon i tok pastaim ol plis-man i bin kisim ripot nogut olsem ol i save wok aninit o bihainim ol lida bilong provins. Olsem na em i no laikim dispela pasin i kamap moa.

Mista Wakon i tok ol plisman i mas mekim wok bilong ol yet na wanpela politisen o lida i noken grisim ol mekim wok bihainim laik bilong ol.

Em i askim ol plisman tu long lukaut long dispela kain pasin we inap kamap na ol i mas holim strong lo na bihainim gut wok bilong ol stret na noken guria long gris o toktok bilong husat lida.

Pawa saplai program bilong Westen Hailans i ron isi yet

Program bilong pulim pawa lait i go long ol distrik na ples long Westen Hailans provins i no inap kamap hariap long dispela yia, Edministreta bilong provins Dokta Thomas Webster i tokaut.

Dokta Webster i tokaut olsem wok i no bin kamap hariap bikos PNG Electricity Commission i no inap long mekim olgeta wok ya.

Em i tok Provinsal Gavman i givim ol sapat long mani na ol arapela helpim tu tasol wok i no kamap hariap bikos long dispela hevi bilong Elkom.

Wanpela pas bilong Sief Enjinia bilong Elkom Mista G. Hoffmeister i tokim Dokta Webster olsem Elkom bai karimaut tasol wok sevei na disain long 11-pela projek na arapela wok bai praivet elektrikol kontrakta husat i gat mani na ol mesin bilong mekim dispela wok bai mekim ol dispela wok. Dispela pas i kamap long Mas 27, 2000.

Dokta Webster i tokaut Elkom i singaut pinis long ol kontrakta kampani na ol nem i kamap pinis. Olsem na Elkom bai tokaut long wanem kontrakta kampani bai mekim dispela wok long mun Ogas. Na olgeta wok inap stat long mun Novemba.

Bai ol i sanapim bikipela na liklik

voites pawa lain long 11-pela eria insait long provins we Elkom i ken mekim ol sota lain tasol.


Ol projek we i gat luksave pinis em long; Ogelbeng Pit, Kotna Ambuga, Ulya Kurkur, Koibuga Paglum, Ogelbeng Minimp, Tambul Tombikul, Mungulump Stesin na Keta mogla, Anglimp Kurki, Kindeng Rokump na Kagamuga Kelua.

Em i tok mak olsem K5 milien i go long dispela program bilong pawa saplai.

Dokta Webster i tok dispela program bilong wokim pawa saplai i go insait long komyniti em bilong pulim interes bilong ol manmeri long wokim gutpela haus na stretim gut laipstail bilong ol. Na em i wanpela rot tu long daunim hevi bilong lo na oda insait long komyniti na provins.

Em i tok olsem taim ol manmeri i gat gutpela na naispela haus, wanem kain hevi i laik kamap, ol bai sanap strong long stretim hevi long gutpela we bikos ol i no laik long birua i kamap we inap bagarap gutpela haus na ol samting bilong ol.

Dispela em wanpela projek we i stap insait long 5 Yia Program bilong Provinsal Gavman, eking jenerel menesa bilong Enjiniaring Divisen, Arnold Koim i tok.



Bodi banis bilong bipo • Dairekta bilong Orchid Lods long Enga provins, Peter Piaowen (raithan) i soim wanpela bodi banis ol lain long Kandep i save yusim long taim bilong pait long banisim ol egensim ol spia na bunara bilong ol birua lain. Foto: TIMOTHY AIMS.



CENSUS 2000 ADVERTISEMENT

Hagen So redi long kamap long mun Ogas

BIKNEM Hagen So bai kamap long Ogas 19 na 20 long dispela yia.

Maut Hagen Kalsarel So Komiti siaman Simon Kuk i mekim bikipela tok amamas long Maunt Hagen Samba ov Komes long soim sapat na interes bilong ol long sapatim Hagen So long dispela yia we em i wanpela bikipela de bilong komyniti.

Mista Kuk i tokaut tu olsem long las mun Westen Hailans Provinsal Edministresen i opim na strongim gen West an Hailans Turism Promosen Atoriti long go pas long ol turis program insait long provins we Hagen So em wanpela bikipela program bilong ol.


Mista Kuk i tok ol i makim pinis wanpela komiti bilong go pas long dispela so long Kagamuga So Graun. Na dispela so tu bai pulim tingting na amamas i go bungim bikipela de bilong 25 krismas bilong independens long Papua Niugini.

Mista Kuk i tok Hagen So i no wanpela so bilong ol Hagen manmeri tasol, em i wanpela bikipela so we i save pulim manmer i kam long olgeta hap provins na ovasis kantri tu. Olsem na Hagen So em i wanpela bikipela so bilong planti lain tru.

Gavana bilong Westen Hailans provins Pater Robert Lak i tokaut tu olsem Gavman bilong em bai sapatim dispela so na mekim i kamap wanpela bikipela na naispela so tru we bai igo bungim tu bikipela de bilong 25 krismas de bilong independens long Papua Niugini.



MADANG NUIS



Madang nius wantaim WENCESLAUS MAGUN

PNGFA givim laisens long Hea Cho

LONG wik i go pinis, mamba bilong Bogia, Bernard Mollok i bin kamapim sampela toktok long palamen we i sut i go long wanpela kampani bilong Korea, Hea Cho (PNG) Limited long winim kontrak long go katim timba long Kumil TRP eria insait long Bogia distrik, Madang provins.

Mista Mollok i askim Minista bilong Fores, Michael Ogio sapos em i stret long gavman i givim laisens bilong katim diwai long wanpela TRP eria (Kumil

TRP) sapos narapela kampani i kisim laisens pinis long katim diwai insai long dispela sem TRP eria.

Wanpela wok painim Wantok i karim aut i soim olsem Papua Niugini Forestri Atoriti i bin givim laisens long Hea Cho (PNG) Limited.

PNGFA i bin givim tok orait long Hea Cho (PNG) Ltd, long Disemba 29, 1999, long go het na mekim wok bilong en insait long 12 mun stat long Disemba 29, 1999 bihainim ol lo insait

long Timba Pemit bilong katim diwai long PNG, salim i go long arapela kantri na mekim ripot.

Ripot bilong PNGFA i tok dispela laisens em i kondisinel.

Aninit long dispela laisens, Hea Cho (PNG) Ltd, i ken katim ol fores prodak, trenspotim ol trenspot prodak, salim ol fores prodak, baim ol fores prodak, maketim ol fores prodak, prosesim ol fores prodak, gredim ol fores prodak na mekim ol arapela wok olsem kampani i tokaut insait aplikesen bilong ol.



• Menesing Dairekta bilong Kambang Holdings, Joe Inara wantaim ol hetman bilong Luteran Sios i stretim toktok wantaim ol ples lain bilong Mindre, ples we Hailans Pasifik i laik sanapim nikel na kobal faktori long en. Luteran Sios i papa bilong dispela hap graun. Foto: WENCESLAUS MAGUN.

Hea Cho Kampani i no baim olgeta takis long Madang

PRAIM Minista Sir Mekere Morauta i tok IRC i saspending wanpela sinia opisa na IRC wantaim ol plis bai sasim em long brukim sampela lo bilong larim Hea Cho Kampani i baim liklik mani long rausim ol mesin bilong ol long Madang bik bris.

Sampela ripot i soim olsem long Novemba 5, dispela kampani i bin bringim sampela mesin bilong timba projek i go lusim long Madang bik bris.

Sir Mekere i tok kastoms opis i no bin givim tok orait long rausim ol dispela mesin long Madang bik bris inap 6-pela mun bihain long Me 9.

Sir Mekere i tok ol i mekim dispela long abrusim gavman long kisim ol dispela mesin long wanem sapos ol mesin i stap long brik bris long 6-pela mun, gavman i ken kisim na salim ol.

Sir Mekere i tokim palamen olsem long mun Me 10, IRC hetkwata i kisim toksave olsem 19 paket bilong ol hevi mesin bilong wok long timba projek i lusim Madang bik bris.

Sir Mekere i tok long dispela de, Komisina Jenerel i givim oda bilong karim aut 24 hawa wok painim i go insait long dispela hevi.

Wok painim i soim olsem dis-

pela kampani i bin askim wanpela sinia litigesen opisa bilong IRC. Dispela kampani i baim em long givim tok orait long larim ol i kisim ol mesin bilong ol i go.

Sir Mekere i tok i gat ol arapela IRC opisa long dispela taim na tu bilong bipo i bin helpim long mekim dispela paul pasin.

Em i tok kampani i bin kisim tok orait long kliarim ol mesin bilong ol yusim wanpela beng sekyuriti long freksen bilong impot duti veliu, dispela pasin em IRC i no mas bihainim ol laikim long kain trenseksen i kamap.

Sode rausim wokman bilong IRC long Hea Cho hevi

KOMISINA Jenerel bilong Internal Revenu Komisen, David Sode, i tokim Wantok olsem em i rausim sampela wokman bilong em tasol i no moa long faipela bikos long sampela paul pasin i bin kamap long baim takis we Hea Cho Kampani i bin mekim long Madang bik bris.

Mista Sode i tokim wantok olsem opis bilong em i karim aut yet wok painim i go insait long dispela hevi na inap long taim ol i pinisim olgeta wok painim em i no redi long autim olgeta toktok long dispela hevi.

Las wik Fonde, Praim Minista

Sir Mekere Morauta, i tokim Palamen olsem IRC i rausim wanpela sinia Internal Revenu Opisa wantaim sampela opisa bilong IRC na ol plis bai sasim ol long pasin IRC i bilip ol i brukim lo bilong kisim takis long Hea Cho Kampani long Madang.

Madang gavman tok orait long Hea Cho long stap long Daigul

MADANG Provinsel Gavman i tok orait long Hea Cho (PNG) Ltd long go stap long Daigul, Bogia distrik na mekim wok bilong ol.

Insait long wanpela pas Madang Edministreta, Clant K. Alok i raitim i go long Siaman bilong Hea Cho Kampani (PNG) Limited, long mun Me 9, 2000, Madang Provinsel Gavman i givim tok orait long Hea Cho Kampani long go sindaun long sampela taim tasol long graun bilong gavman, posen 163 na 183 - we ol i makim bilong ol ami long Hatzfeldhaven (Daigul), Madang Provins.

Insait long pas we Mista Alok i sainim i tok olsem dispela kampani i ken sindaun long dispela graun long wanpela yia tasol stat long de em i bin salim dispela pas i go long ol.

"Long wankain taim, Lens Brens, Madang Edministresen i helpim long toktok long lusim na givim posen 165 na 166 i go long kampani bilong yu na senisim ol dispela posen long Agrikalsa i go long Industrial Lises," pas bilong Mista Alok i tok.

Em i salim kopi bilong dispela pas i go long Ekting Edvaisa bilong Lens long Madang, Provinsel Pisikel Plena bilong Lens long Madang, Distrik Edministreta bilong Bogia, na Rijinel Dairekta bilong Noten Rijen bilong Lens Dipatmen.

Mista Alok i tok tu olsem em i no bin stap insait long pasin bilong givim tok orait long baim liklik takis i go long Intenel Revenu Komisen bilong

larim kampani i kisim ol mesin bilong ol long Madang bik bris i go long Daigul.

Em i tok olsem edministreta bilong provins, em wantaim gavman bilong Madang i gat laik long lukim ol kampani i kam long provins na bringim developmen.

Mista Alok i tok sapos ol kampani i gat laik long developim ol risos long Madang provins i bihainim stret ol lo bilong PNG, em i no lukim wanpela as long stapim ol long kam insait long Madang na mekim ol developmen.

Mista Alok i tok tu olsem Madang gavman i amamas long Hea Cho Kampani long wanem dispela kampani i gat tingting long kamapim daunstrim prosesing.

Em i taim taim Hea Cho Kampani i kamapim daunstrim prosesing, ol bai mekim pinis prodak long diwai o timba long Madang na salim dispela i go long arapela kantri.

Mista Alok i tok, taim ol kampani i kirapim daun strim prosesing long Madang, prais kampani bai baim diwai long ol lokol pipel long prais i antap moa long prais nau i stap.

Em i tok dispela bai bringim eded veliu long ol papa bilong diwai long ol eria we i gat fores prodak.

Long dispela as, Mista Alok i tok em i no lukim wanpela asua long Madang Provinsel Gavman long givim tok orait long Hea Cho Kampani long go sindaun long Daigul.

Hevi bilong Papir Divelomen Koporesen

PAPIR Divelomen Koporesen i bilip sampela paul pasin i bin kamap long pasin bilong givim tok orait long Hea Cho Kampani long go katim diwai long Kumil.

Wanpela pas Wantok i kisim i tokaut olsem klostu long pinis bilong 1997, Bismark Industris i stap long katim ol diwai bikos prais bilong ol timba long wok maket i go daun.

Pas i tok sampela taim long Februari 1998, wanpela mamba bilong Papir Divelomen Koporesen, Jack Kokon i bringim Hea Cho i kam insait long Kumil TRP.

Long wankain taim 6-pela bilong

11-pela mamba bilong bod bilong Papir Divelomen Koporesen i stap yet wantaim Simon Saiyat na ol arapela i go bung wantaim Jack Kokon.

Pas i tok long stat bilong 1999, Nesenel Fores Sevis i rausim LMA long Bismark Industris.

Pas i tokaut long ol kot i bin kamap namel long Jack Kokon na NFS menesing dairekta wantaim Hea Cho kampani.

Pas i tok long Oktoba 9, 1999, insait long wanpela miting long Ulingan, NFA i go het long givim Laisens Namba L21 long Hea Cho (PNG) Limited.

Sir Sailas no sainim MDC na SML bilong Ramu Nikel projek yet

HIGHLANDS Pacific Limited i tok ol i amamas long tokaut olsem Papua Niugini Gavman i tok orait las wik long Mining Divelomen Kontrak (MDC) bilong Ramu nikel projek long Madang provins.

Menesing Dairekta bilong HPL, lan Holzberger i tok, dispela tok orait i opim rot bilong pinisim las pepa wok em bilong kisim Spesel Mining Lis (SML).

Em i tok Gavana Jenerel, Sir Silas Atopare i no sainim yet MDC na SML.

Mista Holzberger i tok tu olsem HPL wantaim Oregon i wok long painim tu narapela patna husat i gat mani long wok bung wantaim ol long kirapimdispela projek.

Mista Holzberger i tok wok bilong main em i ron 9-pela mun bihain, tasol dispela i no bikipela wari tumas long wanem ol bikipela pepa wok we kampani i wetim gavman long givim tok orait long ol, em i kamap pinis.

Em i tok kampani nau i mas painim samting olsem K2 bilion long kirapim dispela projek.

Mista Holzberger i tok mani bilong kirapim dispela projek bai kam long ol mani ol sea holda i putim i go insait long kampani na narapela hap HPL bai kisim dinau long ol beng.

Las wik Praim Minista Sir Mekere Morauta i tok Nesenel Eksekutiv Kaunsel i tok orait long Mining Divelomen Kontrak bilong Ramu nikel projek long Madang.

Em i tokim palamen olsem kabinet i edvaisim em tu long givim wanpela Spesel Mining Lis long HPL long Ramu projek.

Sir Mekere i tok Ramu projek bai bringim planti sevis na gutpela samting i kam long kantri. Em i tok kos bilong kirapim projek i sanap long \$US850 milyon. Gavman bai kisim samting olsem K280 milien long wan wan yia inap long laiptaim bilong dispela kampani (30 o 40 yia). Ramu bai kamapim K1 bilien long foren revenu long wanpela yia.

Na em i tok Ramu bai givim 5 pesen gros domestik prodak, na kamapim 2500 wok. Samting olsem 1000 wok manmeri bai wok ful taim

Lae Nius

Ol Morobe siaman i senisim sia

YAKAM KELO i raitim

MOROBÉ Provinsal Gavman i senisim sampela siaman i go long nupela wok o ministri bilong ol long dispela wik Tunde.

Provinsal Eksekutiv Kaunsil (PEC) i mekim disisen long tokaut long nupela senis we 9-pela siaman i senisim ministri bilong ol long dispela wik. Nogat wanpela siaman i lusim wok bilong ol. Ol i senis tasol i go long narapela wok. Ol siaman husat i senisim ministri em:

Gavana Luther Wenge - Siaman kabinet, Komyuniti Developmen Komiti na Lika Laisensing.

Deputi Gavana Smith Cornelius - Komes na Industri

Patrick Baša Human Risos na Developmen

Bob Dadae - Edukesen na Minista i helpim Gavana

Utika Sisereta - Lens Mains na Pisisel Plening

Tali Kasip - Fiseris na Marin Risoses

Rogen Aigel - Fainens na Implimentesen

Giukta Nakalip - Fores na Envaromen

Jacaraia Kapisa - Relijon (sios wok)

Basuk Erewiong - Woks na Infrastraksa

Ol arapela siaman nem bilong ol i no kamap em ol i holim yet olupela wok bilong ol we ol i bin holim long bipo.

Kaunsil presiden bilong Hube

Baseng Zango tasol i bin lusim posisen bilong em olsem Fores na Envaromen long mun Mas bilong dispela yia. Nau em i stap tasol olsem asembli memba.

Morobe Provinsal Gavman i gat mak olsem 15 siaman bilong siaman long lukautim ol wok ministri. Na em i gat total long 38 memba bilong provinsal asembli.

Morobe Provinsal Eksekutiv Kaunsil (PEC) i bin oraitim pinis long givim K260,000 i go long wok bilong lotu we i sut long helpim ol wok na progrem bilong wok lotu na misin i go het strong insait long provins.

Insait long dispela mani ol i kolim 'Miti Grent' (Miti em tokples Yabim long autim gutnius), ol yut, sios mausman na mama grup i ken raitim pas long kaunsil presiden bilong ol wanwan na askim long helpim mani bilong mekim wok bilong ol wantaim.

PEC tu i bin oraitim long helpim ol mama na grup bilong ol insait long agrikalsa wok. Kabinet i bin oraitim mani mak long K10,000 long ol meri insait long Morobe provins i ken kisim long mekim wok bilong agrikalsa long wanwan ples na distrik bilong ol. Ol i ken askim long dispela mani long kaunsil presiden bilong ol wanwan.

Morobe Provinsal Gavman i laik soim tru 25 yia independens bilong Papua Niugini olsem na em i wanbel long givim helpim long salim biknem Duadua Tieta grup bilong Lae i go long wanpela bikpela drama pilai long Cairns, Australia long mun Septemba. Dispela bikpela pilai long Australia bai kamap long taim PNG i makim 25 krismas bilong independens long Septemba 15 na 16.


Namba wan Primia bilong Morobe Provins, Pama Anio i dai bihain em painim sik

Namba wan Primia bilong Morobe provins taim Morobe i kisim Interum Provinsal Gavman long 1978 i dai long Mande nait dispela wik long Angau haus sik long Lae bihain long em i bin sik sampela taim i kam.

Pama Anio i bin go pas long Morobe provins olsem Primia insait long interim Provinsal Gavman taim lo bilong kamapim Provinsal Gavman sistem insait long Papua Niugini i bin stat. Em i Primia long 1978 i kam inap long taim Interim Provinsal Gavman i go insait long ileksen bilong kamapim stret Provinsal Gavman sistem aninit long Ogenik Lo. Provinsal ileksen i bin kamap long 1984 we Utula Samana i kamap Primia bilong Morobe provins.

Pama Anio i bilong ples Bosadi long Morobe Saut Kos na em i bin wanpela strongpela lida long go pas long sanapim pos bilong provinsal gavman sistem i kamap na sanap long em.

Mista Anio i bin mekim planti wok insait long provins long 27 krismas olgeta. Long 1953 Mista Anio i bin mekim namba wan wok olsem pablik sevans olsem welfea opisa. Em i bin kamapim bikpela soka asosiesen long Lae nau ol i kolim Lae Futbol Asosiesen (LFA) long 1958 na kamap presiden bilong LFA. Em i bin mekim planti wok tru long kamapim Bugandi hai skul bilong ol man long 1962 we em i kamap olsem siaman bilong perens na sitisen asosiesen long 8-pela krismas olgeta. Long 1969 na 1970, ileksen i makim Mista Anio long kamap Iektoret Konstitusen Komiti we wok bilong ol em long lukluk insait long ol hevi bilong distrik bandri na ol bikpela wok developmen long Lae siti. Long 1971 ol i



• Leit Mista Pama Anio.

makim em i go insait long Lae Eria Atoriti we bihain ol i senisim nem i go Lae Taun Atoriti na bihain Lae Siti Atoriti. Em i sevim kaunsil long 9-pela krismas olgeta long 1971 inap 1980. Em i bin kamap Lod Meya

bilong Lae siti inap tupela krismas.

Long 1977 ol i makim Pama Anio olsem memba bilong Provinsal Asembli we em i makim Lae Siti Kaunsil na kamap interim Primia bilong provins long 4-pela krismas olgeta.


Long makim bikpela rispek bilong ol long dispela biknem lida oilong Morobe provins, Morobe Gavana Luther Wenge, Edministreta Aine Sengero na olupela politiksman Utula Samana i go pas long stretim ol wok na rot bilong lukautim bodi i go inap bodi i go daun long graun.

Long Mande neks wik bai ol i planim bodi.

Mista Anio i gat 9-pela pikinini we tupela i lukaut pikinini. Meri bilong em i dai long 1997.



• Pama Anio i sindaun wantaim famili bilong em long haus. Dispela em long taim em i bin Primia bilong Morobe.



• Ol elementri skul pikinini long ples Isan long Kabwum distrik i winim mambu nas mekim musik taim ol skul i mas long wanbel de bilong ol long Jun 14 dispela yia. Foto: YAKAM KELO.

Plis bai patrol long Bulolo haiwe

Plis Minista Mathias Karani i tokim ol pipel bilong Bulolo iektoret olsem em bai salim wanpela fultaim plis patrol grup long ron insait long Wau Bulolo haiwe na Menyamyay rot.

Mista Karani i mekim dispela toktok bihain long em i bungim ol PMV asosiesen lain long Mumeng stesin long Mande dispela wik we ol i givim petisen long soim bel kros bilong ol long ol raskol pasin we i wok long kamap planti long rot na bagarapim

ron bilong ol PMV na ol pasindia manmeri long rot.

Plis Minista Mathias Karani i no tokaut yet long wanem taim tru bai em i salim dispela haiwe patrol lain i go long statim wok bilong ol.

Ol pipel tu i givim wanpela petisen bilong stretim gut haiwe rot bilong ol na Mista Karani i tok em bai givim dispela petisen i go long Minista bilong Woks Alfred Pogo long kisim na lukim.

PHONE: (675) 472-3912 **FAX:** (675) 472-3919

IMPACT SIGNAGE PNG

Any Size, Any Shape, Any Amount

- COREFLUTE SIGNS
- METAL SIGNS
- BUMPER STICKERS
- T-SHIRTS
- STUBBY COOLERS
- BILLBOARDS
- BUNTINGS
- POINT OF SALE

IMPACT SIGNAGE

FOR ALL YOUR PRINTING NEEDS

P.O. Box 3705, Lae, M.P. 411 Papua New Guinea - Email: impact@global.net.pg

Hagen welkamim Bisop Douglas William Young (SVD)

WENCESLAUS MAGUN i raitim

MOA long 2000 manmeri na pikinini i bin bung long pilai graun bilong pop long Hagen siti long witnesim odinesen bilong helpim bisop bilong Hagen asdaiosis, Bisop Douglas William Young long las Sande.

Siaman bilong Katolik Bisop bilong Papua Niugini na Solomon Ailan, Bisop Stephen Reichert (OFMCAP), Asbisop bilong Hagen asdaiosis, Michael Meier, Gavana bilong Madang, Jim Kas, Gavana bilong Simbu, Pater Louis Ambane na Gavana bilong Hagen, Pater Robert Lak i bin bung wantaim long selebretim dispela bikpela pestode.

Planti ol pater, bruda, seminarian na ol sista i bin kamap tu long dispela santu misa.

Pastaim long Pop Jon Pol II i makim Pater Young olsem helpim bisop bilong Hagen asdaiosis long helpim Asbisop Michael Meier (SVD), bisop Young i bin stap olsem het tisa bilong dipatmen bilong Papua Niugini Konsens long Divine Word yunivesiti long Madang.

Bisop Young i bin wok tu long Wabag daiosis long planti yia bipo long ol SVD i askim em long go tis long DWU.

Bisop Young em bilong Australia tasol i luk olsem ol Wabag i kisim em olsem pikinini bilong ol.

Long taim bilong odinesen bilong em, Bisop Young i tenkim olgeta bilip manmeri long welkamim em long wok olsem helpim bisop bilong Hagen asdaiosis.

Em i tenkim tu ol lain i bin redim rot bilong em long go long Hagen na moa yet olgeta lain husat i mekim bikpela na liklik wok long selebretim dispela odinesen

bilong em.

Asbisop Meier i amamas long Pop i makim narapela yangpela bisop long helpim em. Em i tokim ol Katolik long Hagen olsem em i lapun pinis na i gutpela long Pop i makim wanpela yangpela man long kam helpim em long wok long Hagen.

Em i tok bai i gat planti bikpela hatwok i stap long telematim gutnius na bringim Jisas i go long ol bilip manmeri brukim wara, go antap na go daun long bikpela ol maunten na olsem em i gutpela long kisim wanpela yangpela helpim bisop.

Asbisop Meier i tok long wankain taim em bai go het long mekim wok bilong em.

Gavana Pater Lak i tokim ol pipel bilong Hagen long histori bilong Katolik Sios long Hagen. Em i tok i no olgeta man bai kamap bisop o gavana tasol olgeta i mas wok bung wantaim.

Wok bilong Katolik Sios long kamap nupela

BR PETER VANDER-VEIL (SVD) i raitim

KATOLIK Sios i gat planti kain rot na 'muvmen' long kamap nupela. I gat Karismatik, i gat Marit-Enkaunta, i gat Antiok na tu i gat 'Neo Katekumenet'.

Hia long PNG, stat long 1977, i gat wanpela rinyuel program ol i kolim 'Muvmen bilong Beta Wol'. Wanpela program insait long dispela muvmen ol i kolim Pes bilong Peris (NIP). Narapela em Peris Yut Muvmen (PYM), na nau long dispela taim i gat Nupela Pes bilong Daiosis (PRD).

Dispela ol program i gat tupela sait long en. Wanpela sait em bilong lukautim sol o spirisuel sait na narapela sait em bilong pastorel.

Bikos astingting bilong ol program em long kirapim tingting na laik bilong ol memba bilong Katolik Sios long tekpat na strongim komyuniti bilong ol, bai bilip bilong ol i strong na i karim kaikai. Na bai ol Katolik manmeri i ken go pas long ol narapela Kristen na manmeri bilong graun long mekim olgeta hap bilong graun i kamap gutpela.

Insait long Bisop Konprens bilong PNG na Solomon Ailan i gat 21 daiosis. Orait, 7-pela daiosis i kisim pinis wanpela bilong ol rinyuel program. Samting olsem 500,000 Katolik pipel i kisim tok na wok bilong dispela program!

Yu tingim yet het tok bilong selp stadi bilong Katolik Sios long 1973, olsem 'Yumi Yet I Sios?' Em nau, dispela tok i gohet moa yet!

I gat wanpela liklik grup i helpim dispela muvmen i gohet. Ol i kolim dispela grup, 'Komyuniti Animesen Sosis (KAS).

Dispela ol memba i gohet long wok bilong spirisualiti bilong komyuniti, bilong bung wantaim, bilong strongim wan wan memba bilong sios na bilong soim rot bilong tekpat

long wok bilong sios.

Tripela memba i mekim wok fultaim na ol i stap long Nesenel Tim. Ol i gat opis long Hagen. Narapela 15 memba ol i stap long Wewak, Madang na Hailans na Bisop bilong Daru Kiunga i memba tu.

Wan wan daiosis i gat pastorel tim bilong karim aut rinyuel program na insait long dispela tim (DTPA) i gat wanpela o tupela memba bilong KAS i stap.

I gutpela moa sapos sampela KAS memba i stap long dispela pastorel tim, bikos KAS memba i gat taim na spes long stadi na pre na bungim narapela KAS memba

komyuniti!

Wok bilong go het long dispela pogram em i no isi, bikos yumi manmeri i gat kain kain aidia na ekspirians, moa yet, ol lida na pater long ol peris.

Bisop i gat bikpela wok insait long daiosis long bungim olgeta pastorel woka, na bai program i ken go long wanpela mak na rot.

'Maski yumi narakain narakain, yumi ken bung wantaim,' em wanpela het tok, bilong bisop i stap long PNG KAS grup. Dispela tok i sut stret i go long wok bilong yumi wan wan.

Yumi wan wan i mas yusim

Olgeta pastorel woka na moa yet ol misinari, ol i mas go insait gut long sindaun bilong ol pipel. Nogut tok bilong God i no bungim tru laip bilong ol manmeri.

Las yia, long mun Jun, i bin gat wanpela tu wik woksop i bin kamap long Hagen, long helpim ol memba bilong ol pastorel tim bilong ol daiosis we rinyuel i go het.

Het tok bilong dispela woksop, 'Tok bilong God i olsem pikinini kaikai,' em i bilong tok klia long tingting bilong kalsa bilong PNG, bai wok bilong bringim Gutnius bilong God i ken go het na fit long pipel.

Orait, klostu nau long mun



• Bruda Peter VanDerVeil SVD i helpim ol pipel long karim wok bilong Katolik Sios long kamap nupela. Foto: Bruda Peter VanDerVeil (SVD).

long serim aidia na ekspirians long ol narapela hap bilong PNG na long wol.

KAS grup i save bung sampela taim long yia, na ol i gat sans long kisim nupela save long ol miting na woksop ol i save ogenaisim.

Bikos ol i save wokbung, dispela rinyuel program i kamap 'prektikel'. Nogut program i stap tasol long buk na long pepa! Na bai ol pipel tu i ken stap 'laip' insait long

wan wan presen bilong Holi Spirit na olsem tasol bai komyuniti i gat strong na i gat laip! Olsem tasol bai yumi kamap bodi bilong Krais na haus holi bilong Holi Spirit.

Orait, dispela wok bilong rinyuel i mas kamap long ples, insait long sindaun bilong pipel. Olsem na olgeta kain Gutnius na Wok Aposel yumi mekim, em i mas kamap insait long kalsa bilong pipel.

Julai, bai i gat narapela woksop i kamap long strongim ol pastorel tim bilong daiosis, bai ol i go het long mekim rinyuel wok insait long daiosis na peris. Wanpela pater na narapela tisa meri bai i kam long Rom na go pas long dispela tri wik woksop.

Sapos yu laik save moa long KAS na MBW, rait i go long Nesenel KAS Dairekta, P.O. Box 54, Mt. Hagen.

Sande Julai 9 em spesel de bilong ol kalabus

SANDE Julai 9 em i wanpela spesel de bilong ol kalabus long wol, namba tu siaman bilong ol Katolik Bisop long PNG na Solomon Ailan, Asbisop Karl Hesse (MSC) i tok.

Em i askim ol Katolik long PNG na SI long beten long ol lain i stap long kalabus long dispela de na long bung wantaim Pop Jon Pol II long go aut na helpim ol brata na susa long kalabus wantaim ol famili bilong ol.

"Ol Katolik Bisop i askim olsem, insait long beten bilong ol long Sande Julai 9, ol Katolik bai tingting long ol kalabus lain na long ol sori pasin i bin kamap we i lukim ol i go long kalabus," Asbisop Hesse i tok.

Em i tok long dispela taim ol gavman long olgeta hap bilong graun i kisim askim long stretim ol haus kalabus bai i kamap ples bilong ol man long stap insait long en.

"Mipela ol bisop i sanap strong long sapotim ol institusen long PNG na SI long go het long painim rot bilong mekim ol kalabus lain i mekim wok, na painim rot bilong helpim ol kalabus lain long stretim laip bilong ol yet olsem bai long taim ol i lusim kalabus na go bek long sosaiti, ol i ken kamap ol gutpela memba bilong sosaiti," Asbisop Hesse i tok.

Em i tok ol Katolik bisop i sapotim pop long askim ol gavman long dispela taim long daunim taim bilong kalabus long ol kalabus manmeri.

"Mipela i askim tu olsem long Sande Julai 9, ol bilip manmeri i mas beten long ol famili bilong ol kalabus lain, long ol wok manmeri bilong ol kalabus na long ol famili bilong ol," em i tok.

Em i tok pop i askim ol kalabus lain long yusim gut laip bilong ol. Pop i tok, ol lain i stap long kalabus i noken ting olsem laip bilong ol nau i pinis long wanem ol i stap long kalabus. Ol i mas luk-save olsem laip bilong ol long haus kalabus tu, em i taim bilong ol long bungim God. Em i taim we ol i ken givim laip bilong ol i go long God long trupela pasin wantaim daun pasin. Em i taim ol i tok sori na baim ol rong ol i mekim bipo pinis. Em i ken kamap olsem taim we ol i ken kirapim pasin bilong bilip long Jisas Krais.

"Long olgeta ol lain i stap long haus kalabus, ol lain ol famili bilong ol i stap long haus kalabus, na long ol famili i wok wantaim ol kalabus manmeri, Sios i ofaim prea na olgeta gutpela toktok i go long yupela long Jubili Selebresen long Julai 9, 2000," Asbisop Hesse i tok.

Kristen mas beten long ol kristen bilong Indonesia

OL kristen bilong Moluccas long Indonesia i askim olgeta kristen bilip manmeri long beten long ol long dispela taim, taim i gat pait namel long ol wantaim ol Muslim.

Insait long wanpela pas ol i salim i kam long Wantok, ol kristen bilong Moluccas long Indonesia i tok, moa long 1000 laip bilong ol i lus insait long dispela pait. Ol i tok tu olsem ol i lusim planti tausen haus na ol arapela samting.

Ripot i kam long Moluccas i tok, moa long 1000 paitman bilong Muslim i bin kam wantaim ol bikpela masin bilong pait long pinisim olgeta kristen long Moluccas.

Ripot i kam long Pater Titus Rahail, peris pater bilong Tobelo na parson Z. Dungir i tok long Fonde Jun 19, samting olsem 5000 Muslim paitman i bin go long wanpela kristen ples bilong Duma long Halmahera ailan na kilim 176 pipel na bagarapim 137 pipel. Dispela namba i karamapim ol meri, pikinini na ol lapun. Ripot i tok olsem ol i holim pas 10-pela meri na 20 pikinini na kisim ol i go. Ol Muslim paitman i kukim 292 haus.

Ripot i tok long Jun 12, 2000, sampela 1000 Muslim paitman i bin go daun long Malintang maunten na kilim ol pipel bilong Galala na Hatve Kecil ol ples i stap ausait long Ambon siti. Ol i kukim 30 haus na wanpela haus lotu bilong Katolik Sios.

Long Jun 21, 2000 ol Muslim paitman i atekim Tantui ples na kukim wanpela Katolik na Protesten haus lotu wantaim sampela haus na tu het kwata bilong Brimob.

Ripot i tok nogat wanpela nius long Indonesia i tokaut long ol dispela pasin nogut i bin kamap.

WANTOK

NIUSPEPA BILONG YUMI OL PAPIA NIUGINI STRET

KOPI em strong tru bilong planti tausen manmeri long hailans ria sampela provins tu long nambis. Ol ples manmeri i save laki long taim bilong kopi bikos em taim ol bai i gat mani bilong baim ol samting ol i laikim na tu sevim mani bilong baim skul fi bilong ol pikinini bilong ol. Olsem na gavman i mas was gut tru long dispela na lukautim gut bisnis bilong kopi. Ol toktok bilong senisim kopi industri i go aninit long lukaut bilong gavman i mas gat gutpela as bilong mekim kopi i kamap olsem wanpela bikpela helpim bilong ol pipel long ples.

Kopi i bilong ol liklik manmeri long ples stret

Sapos nogat gutpela as, larim kopi industri i stap olsem bikos ol pipel i wok long kisim gutpela helpim tude long kopi industri.

Nogut ol kain kain hait tingting na paul pasin we i kamap pinis long planti arapela bisnis han bilong gavman olsem Telikom, POSF, NPF, na arapela moa i kamap long kopi industri.

Kopi em bilong ol grasrut pipel tru tru na em i bun na strong bilong ol. Olsem na noken tasim nating nating. Nogut ol grasrut pipel i bungim hevi long kain kain senis we i nogat trupela na gutpela as long ol.

Lo bilong kopi industri i gutpela tru long ol kopi groas asosiesen yet i save makim ol bod memba i go long lukautim na ronim wok bilong kopi industri. Na sapos gavman i tekova long dispela wok, ating bai olgeta pren na poroman bilong ol politiks lain bai lukautim wok bilong kopi na han bilong ol politiks bai i go insait na pulim ol samting nabaut na ol liklik kopi groa i no inap save. Noken mekim nabaut long bisnis bilong ol liklik manmeri. Bikos kopi i stap, na ol liklik manmeri i gat mani long poket.

Torokina laikim helpim bilong Japan

VERONICA HATUTASI i raitim

OL TOROKINA pipel long wes Bogenvil i laikim bai helpim program bilong Japan i go long Bogenvil bai go long ol.

Memba bilong Torokina long Bogenvil Pipels Kongres Steven Suako long makim ol pipel bilong em i putim singaut i go long Bogenvil Gavana John Momis long skruim helpim program bilong Japan i go long Torokina Distrik.

Mista Suako i wokim dispela singaut bihainim ol plen we Gavana Momis i bin mekim wantaim Gavman bilong Japan long kisim helpim long ol na kirapim ol sampela projek long helpim ol pipel taim ples i wok

long kamap orait bihainim hevi we i karamapim ol long long-pela taim.

Mista Suako i bin tok ol pipel bilong Torokina i laikim helpim wantaim mani bikos nogat gutpela wok developmen i kamap long eria bilong ol. Na tu Torokina eria i bin bungim hevi long Wol Wo 2 bikos bikpela pait i bin kamap long hap. Ol soldia bilong Amerika, Australia na Nu Silan i bin beis long hap long karimaut pait wantaim ol soldia bilong Japan.

Olsem na Mista Suako i askim strong Gavana Momis long givim praoriti i go long ol pipel bilong Torokina aninit long helpim we Gavman bilong Japan i givim long ol program long Bogenvil.



• Joe Tanvasa wantaim sapota bilong em Luke Poka. Joe i kam namba 3 long Wes Nu Briten rijinol sit bai ileksen. Foto: Eddy Saunders.

Westpac donetim K5,000 long Salvo Red Sil Apil

RED Sil Apil program bilong Salvesen Ami long PNG i kisim helpim long Westpac Beng bilong karimaut ol sosel welfea program insait long siti na kantri.

Manesing Dairekta bilong Westpac Simon Millett taim em i prisenim K5,000 sekmani i go long Leftenen Stanley Warapen husat i makim Apil Fan i bin tok 2000/2001 apil bai stat long dispela mun na em i askim ol bisnis haus na ol wan wan man long givim donesen bilong ol bihain long ol i lonsim program ya.

Dispela donesen i kisim mani mak we Westpac i givim long dispela ya inap long K11,000.

Ol Red Sil donesen Apil we i bin stat long las ya Julai na i kam inap long nau inap long K220,000. Mak ya i klostu bungim taget mak bilong 1999/2000 apil we nau i pas.

Mista Millett husat i tresera bilong Red Sil Apil taim em i tok tenkyu long planti ol bisnis haus na ol wan wan man we long ol ya i go pinis i save givim donesen i go long Apil i bin askim ol long go het na sapotim apil gen long dispela ya.

Ol ken givim kontribusen bilong ol long kaunta long ol Westpac Beng sevis senta.

Mista Millett i tok Apil bilong 2000/2001 bai i kisim moa sapot taim ol i holim Salvesen Ami Red Sil Apil Golf de long Ogas/Septemba na Lowndes Lambert PNG i ogenaisim.

Mista Millett i bin tok wok bilong Salvesen Ami long PNG na wol em i gat bikpela luksave long en bikos em i save mekim bikpela wok long sait bilong sosel welfea. Long PNG yet, ol program na projek we Salvesen Ami i save karimaut em long ol komyuniti helt wok, riabilitesen na ruel developmen trening, senta long Mosbi we i lukautim ol mama na pikinini i bungim hevi na marit i bruk na ol i hogat hap long stap long en, literesi na ruel developmen trening program, vokesenel trening, sosel welfea na imejensi sevis.

Mista Millett i bin tok Westpac Beng bai go het long sapotim Salvesen Ami long resim mani bilong karimaut ol program bilong em long PNG.

Yu save tu? I gat Marasin long winnim sik Lepra?



Ol i kolim dispela marasin,
"Pawa Marasin"

Ol sinek bilong sik lepra i no inap hait long dispela
"Pawa Marasin"

Sapos yu gat mak long skin, Askm wanpela Helt workman long sekim!

Straik bai laspela rot

HELEN REI i raitim

OL TISA insait long kantri bai striaik sapos olgeta narapela rot we ol i lukluk long en i no wok.

Bihainim singaut bilong ol tisa long kisim 60 pesen pei i go antap long dispela taim, ol toktok i wok long go het wantaim ol atoriti na Papua Niugini Tisas Asosiesen (PNGTA) na gavman long traim stretim dispela wari.

Jenerel Seketeri bilong PNGTA John Hosea i tok Asosiesen bai go het long pait long 60.52 pei i go antap tasol sapos ol no kisim sampela gut-pela bekim long en, ol bai kisim wari i go long Industriyel rejistra long kisim tok orait long striaik o holim stop wok.

Tasol dispela bai wet yet inap long ol i lukluk long olgeta narapela rot.

Mista John i tok ol tisa wok long singaut long 100 pesen pei rais tasol Nesene

lone men Komiti (NMC) i askim long 60.52 mak.


Mista John i tok Komiti i luksave long wari bilong ol tisa na ol i sapatim ol.

Tasol em i tok singaut we ol tisa i tok ol bai striaik long stat

bilong tet tem i no gut-pela bikos dispela bai dispela i bagarapim ol toktok we i wok long kamap long dispela samting.

Em i tok tu olsem singaut long 100 inap long 200 pesen pei i go antap bilong ol tisa i antap tumas.

Em i tok Tisa Yunien long dispela taim i wok long holim wanpela sabmisen bilong ol tisa we ol bin singaut lojg 55.52 pesen pei i go antap long 1995 na 1999. Sabmisen nau i stap wantaim gavman long glasim, skelim na wokim samting long em.



• SKRUIIM SAVE LONG JAPAN! Ol sumatin i laik save moa long Japan na ol i lukim ol buk na ol arapela samting long Kait So we i bin kamap long Travelodge long Mosbi. Planti sumatin long ol skul insait long Nesene Katipel Distrik i bin go long en. Foto: ISSAC IKUAVI.

Rijenel bung i lukluk long rot bilong daunim sik TB

OL HELT saveman bilong Pasifik rijen insait long wanpela bung bilong ol long Noumea, Nu Kaledonia i laik kirapim strongpela politikel komitmen bilong kisim helpim long skruim ol wok bilong daunim sik TB long rijen.

Samting olsem 60 pipel i kam long 20 Pasifik Ailan kantri i stap insait long bung.

Wol Helt Ogenaisesen Seketeriet bilong Pasifik Komyuniti i kodinetim dispela woksop na ol lain husat i stap long bung i karamapim ol nesene TB program manesa, ol helt profesenel i makim ol kantri bilong ol, ol bikman i makim Yunaitet Nesens, WHO, Saut Pasifik Komisnin na ol arapela rijenel ejensi.

Ol lain i bung long rivyuwim sik TB insait long rijen na painim rot long daunim dispela sik long nesene na lokol level.

Ol riport i tok long bung ya, ol bin lonsim "Stop TB initiative in the Pacific" o Rot long stapim sik TB long Pasifik na tu tok orait long narapela program we ol bai skruim na dispela em long "Pasifik Ailan plen bilong stapim sik TB long rijen.

Dispela bung bai strongim tu ol wok bung namel long ol kantri insait long rijen na tu wantaim ol intenesenel patna long ol wok i sut long daunim sik TB.

Hap kona i givim skul toktok long sik HIV/AIDS Namba foa hap

Wanem em ol samting we inap long manmeri i kisim sik HIV/AIDS long en.

Ol i save kolim ol dispela samting long "riski bihevia". Em ol kain pasin we i ken putim man na meri long situesen we ol i ken kisim HIV/AIDS binatarg long en. Sampela long ol em :

- Sapos manmeri i save slip wantaim moa long wanpela patna wantaim ol kain manmeri husat i marit o nogat.

- Yusim ol drag olsem mariwana na ol strongpela dring we i paulim het bilong manmeri na tingting bilong ol ino stret na ol ken wokim pasin i no stret wantaim ol kain man.

- Slip wantaim ol kain man na i no putim kondom o gumi na ol arapela rot bilong lukautim manmeri taim ol i slip wantaim.

- Serim ol deti nil i gat binatang nogut long en na tu ol arapela sap samting.

- Holim blut na ol

arapela wara long bodi taim manmeri i no werim o putim ol glavs long han, moa yet sapos wanpela i gat bruk long skin.

- Slip wantaim man o meri husat i gat sik STD pinis o susu wara i kamaut long pispis eria bilong en. Sans long kisim sik HIV/ADS em i bikpela long dispela grup.

- Pasin we ol yangpela pipel i laik eksperimen na ol i slip nabaut bipo long ol i marit, moa yet ol yangpela (teenagers) ya i wok long kamap olsem bikpela manmeri olsem ol skul manki. Sapos ol yangpela i karimaut dispela pasin em bai stap long haia risk o rot we em bai bungim binatarg bilong sik HIV/AIDS.

LUKAUTIM YU YET BILONG LUKAUTIM NEKS JENERESEN O OL LAIN HUSAT I KAM BIHAIN LONG SIK HIV/AIDS.

Wes Nu Briten Sios Helt Sevis kisim K138,000 long gavman

FRED RAKA i raitim

WES Nu Briten Ekting Gavana Francis Auram long las wik Trinde Jun 21 i bin givim K138,000 i go long Sios Helt Sevis insait long provins. Katolik Sios i bin kisim bikpela hap mani inap long K74,000 bikos em i papa long planti ol helt institusen long provins. Angliken Sios i bin kisim K42,000 na Yunaitet Sios i kisim K20,000. Luteran Sios i bin kisim K5,000.

Dispela em ol haf peimen tasol i go long ol wan wan Sios husat i bin putim askim bilong ol long ol Provinsel gavman long en.

Program ya i bin stat yet pastaim olsem program we Provinsel Gavman i save givim helpim i go long ol Sios helt sevis. Narapela hap mani bilong program em ol bai peim bihain taim long namba tri kwata long dispela yia yet.

Taim ol i wokim baset long dispela yia, ol no bin putim dispela program long en tasol provinsel eksekutiv kaunsil i bin wokim disisen long skruim gen program ya anit long Nu Briten Pam Oil Tras Fan (NBPOL).

Long presentesen, Mista Auram i bin i bin luksave long lidasip bilong foma leit Gavana Bernard Vogae na namba tu bilong em Isidore Teli long statim dispela program long helpim ol pipel bilong Wes Nu Briten. Taim em i autim tok tenkyu i go long NBPOL em bin tok dispela mani bai helpim tru ol Sios Helt woklain long karimaut ol program.

Long presentesen tu, Mista Auram i bin tokaut olsem bikos long disisen bilong Provinsel Eksekutiv Kaunsil, mani we NBPOL i givim bai helpim long peim ol wok manmeri long Sios helt Sevis. Talasea Distrik i bin kisim K100,000. Wankain tu long Kandrien we i bin kisim wankain manimak long en. Narapela disisen we PEC i mekim bai helpim long fandim Helikopta Medikol Imejensi wantaim mani inap long K50,000.

Bilong makim ol sios, Pato Niba bilong Yunaitet Sios i bin makim maus bilong ol brata sios na tok tenkyu i go long Provinsel gavman bilong helpim ol Sios long go hetim wok insait long ol komyuniti na tok wok patna namel long gavman na ol sios bai go gut na strong moa yet.

Planti famili laikim marit sakramen

HELEN REI i raitim

SAMTING olsem 400 pipel bilong Wewak Katolik daiosis i kisim sakramen bilong Konfirmasio insait long las tripela wik, Bisop Raymond Kalitsz (SVD) i tok.

Bisop Kalitsz i tok 150 bilong dispela 400 pipel i kam long Karau eria long Marianburg peris long Is Sepik provins.

Katolik daiosis bilong Aitape i amamas long lukim olsem i gat gut-pela namba bilong ol Katolik long Vanimo i soim bikpela laik long holim pas sakramen

bilong marit.

Insait long daiosisn Yukaris kongres long Vanimo, 85 papamama i putim long alta insait long taim bilong mekim promis, olsem ol bai strongim ol pikinini bilong ol long statim famili laip bilong ol wantaim sakramen bilong marit.

PAPUA NEW GUINEA'S SILVER JUBILEE

School Essay Competition



About the Competition

Category 1:	ALL STUDENTS IN GRADE 3 & 4.		
Essay Topic:	"Who was the Prime Minister 25 years ago?" Tell us more about him.		
Essay Length:	200 Words		
Prizes:	1st prize: K300.00	2nd prize: K100.00	3rd prize: K50.00
Category 2:	Level 1 ALL STUDENTS IN GRADE 5 & 6 Level 2 ALL STUDENTS IN GRADE 7 & 8		
Essay Topic:	"What is Independence and what it means to me?"		
Length of Essay:	500 words minimum		
Prizes:	1st prize: K500.00	2nd prize: K250.00	3rd prize: K125.00
	awards to each level		
Category 3:	Level 1 ALL STUDENTS IN GRADE 9 & 10 Level 2 ALL STUDENTS IN GRADE 11 & 12		
Essay Topic:	"How would you see PNG's Growth in the next ten (10) years?"		
Essay Length:	1000 words minimum		
Prizes:	1st prize: K1000.00	2nd prize: K500.00	3rd prize: K250.00
	awards to each level		

Send entries with full contact details including the name of your school and current grade to:
National Events Secretariat
Moreaua Haus, P.O. Box 639, WAIGANI, NCD.

Entry into the competition will be deemed as acceptance of the terms and conditions. The Judges' decision will be final.

All entries to be received by 25th August, 2000 no later than 4:00pm on the date.

Winners will be notified by the National Events Secretariat.



Bereina kisim yut spot kos

YUT SPOT RIPOT

PNG Spots Komisn i bin holim wanpela spesel spots kosa insait long Bereina, Sentral provins las wik.

Nesenel kodineta yut spots, Scott Vavine i tokim Wantok olsem dispela kosa ya em long traim helpim ol spot lida long Bereina long kamapim strongpela spot.

Em i tok PNG Spots Komisn i helpim Bereina long holim dispela kos bihain long kodineta bilong spot Emmanuel Oa i askim ol.

Mista Oa i askim ol long wanem ol i laik dispela trening program long helpim na kamapim gutpela spot straktsa long ples.

"I nogat gutpela spots straktsa

long ples tasol planti mani o spot lida i laikim tru dispela kosa i mas kamap," Mista Oa i tok.

Mista Vavine i holim dispela kos long kamapim gutpela spots straktsa na tu makim ol komiti long lukautim wok bilong spot.

Em i tokim ol lain husat i kamap long kos olsem pasin bilong gutpela klab o ogenaiesen bai strong sapos i gat gutpela spot straktsa long viles level. Sapos nogat gutpela straktsa asosiesen bai i no inap wok gut.

"Nau insait long kantri planti spots asosiesen na tu klab i no ran gut bikos i no gat gutpela straktsa," Vavine i tok.

Em i tok amamas long Mista Oa na ol komiti bilong em long kisim dispela taim long go pas long stretim kos ya.

Bereina Volibal Asosiesen i gat 8-pela klab na ol wanwan i putim tripela tim long wanwan divisen.

Soka kodineta wantaim PNG Spots Komisn Tim Gawot tu i go holim soka kos long Heboa na Mainohiana Hai Skul.

Oa i wari long wanem Bereina Lokel Level Gavman i gat mani tasol ol i no helpim long kamapim dispela kain samting long viles level.

Deputi administreta bilong Bereina Mista Raga i tok em i kisim wari bilong ol na em bai traim lukluk long sampela wei long helpim.

Samting olsem 40 ol lain manmeri i bin kamap long dispela kos na kisim Trukai Yut Spot Lidasip setifiket.

Pari White winim Anda 17 taitel bilong lig kanivel

JUNIA RAGBI LIG RIPOT

PARI White i winim Coca Cola Anda 17 ragbi lig kanivel bilong Sauten rijen long las wiken.

Ol boi long Sentral i memeim stret ol sais 28 bilong Alotau 30-4 long gren fainel i kamap long Sande long Kone Tigers oval.

Wanpela dairekta bilong PNGRFL John Wagambie i tok dispela tonamen em i gutpela long helpim developmen bilong ragbi lig insait long kantri.

Em i tokim ol sapota, papa mama na tu spons olsem dispela kain tonamen em long helpim ol yangpela long pilai strong. Dispela em wanpela kain sans we ol junia pilai i ken tingting sapos ol i pilai gut, ol bai gat sans long lukim arapela senta.

Mista Wagambie i mekim dispela toktok taim em i amamas long lukim ol liklik senta olsem Alotau na Kerema i kamap long sempionsip.

Wagambie em wanpela olupela pilai bilong Kumul na tu kosa i stap

nau olsem siaman bilong ol selekta i tok olsem em i sori tru olsem ol lain long Pot Mosbi i no stap long dispela junia sempionsip.

Em i tok dispela em i no asua bilong ol junia pilai, em i asua bilong ol junia lig administreta.

Long wankain taim, Mista Wagambie i mekim bikpela tok amamas i go long sponsa, Coca Cola Amatil, junia developmen opisa Joe Tokam na PNG Junia Ragbi Futbal Lig long holim dispela tonamen.

Dispela sempionsip bai stap long raun robin sistem.

Long Sarere, Alotau i winim Pari White 12-8 na Kerema wilwilim ol lain Pari Black. Tasol long seken gem, Pari Black i nekim Alotau 28-4, na Pari White na Kerema dro 4-4.

Na long Sande, Pari White winim Pari Black 30-8 na Alotau autim Kerema 12-8. Olsem na Alotau na Pari White i stap long fainel.

Gem ya i wansait stret bikos difens bilong Alotau i no surik i go antap long stapim ol Pari White.

Ol fowat i strongim gem

KIUNGA LIG RIPOT

OL FOWAT i wok long go pas long kamapim strongpela gem insait long Kiunga ragbi lig resis long Westen provins.

Long Sande, Moses Kuman i go pas long helpim Airports Norths long wilwilim ol Rusa Cowboys 34-16, tu tupela brata Peter Anis na Eric Anis helpim Kiunga Tigers long sotim win bilong Kiunga Storms 24-8.

Loko Genia, huka bilong Waliya i go pas long helpim tim bilong em i nekim sempion tim, Niwaf Raiders 24-12.

Long dispela gem namel long Norths na Cowboys, Kuman na kepten bilong em John Gunua i go pas long fowat na bagarapim tru sindaun bilong Cowboys. Ol i kamapim planti sans long beklain long skoa.

Kuman yet i putim tupela trai long helpim Norths long win.

Cowboys i bekim trai bilong Norths taim Ware Potang na huka Basem Birug i kamapim gutpela pila na ol i skoa.

Tupela brata, Jacob Kain na Bobby Kain i kamapim gutpela kombinesen we rait winga Simon Denem na riser fowat Jack Matu i skoa. Ausait senta Dominic Elias i kikim tupela konvesen.

Insait long namba tu hap, ol fowat bilong Norths pilai strong tru na winim planti graun long ol beklain long skoa.

Arapela gutpela samting bilong Norths em tupela senta Chris Mel na Dominic Elias i putim wanwan trai na Jacob Kain i kikim konvesen bilong Elias.

Cowboys i bekim ol poin i kam long hapbek Clifford Kambaki husat i skorim wanpela trai na kikim tupela gol.

Waliya i stat lukluk olsem em i gat laik tu long pilai insait long fainel taim ol i winim sempion tim, Niwaf Raiders.

Loko Gena na lok fowat Channel Mapo i kamapim strongpela gem na i no surik long hevi fowat bilong Raiders na brukim difens bilong ol taim ol i atek.

Ples bilong pilai i drai tru na dispela i givim bikpela sans tru long Waliya long larim ol beklain bilong ol i fri long skoa.

Gilbert Mulake, Yaeti Bekili na Stanley Waisama i putim wanwan tri na Gena na Michael Justin i skorim foa poin.

Raiders husat i save kamapim gutpela gem tasol dispela i no kamap long las Sande. Patrick Namaioik, Unam Elia na Jeff Jakis tasol i putim wanwan trai bilong Niwaf Raiders.

Tupela brata Peter Anis na Eric Anis i bagarapim tru gem plen bilong Fly Storms long win.

Koiari statim raun 9

KOIARI LIG RIPOT

KOIARI ragbi lig bai statim namba 9 raun long dispela wiken we ol strongpela tim bai salensim ol yet.

Namba wan gem bai stap namel long Crystal Eels na Trek Warriors. Eels i sindaun long namba foa ples na em bai salensim Warriors husat i stap long namba tri ples.

Eels husat i lus las wiken bai traim long winim stret dispela gem long wiken. Ol maliau welwel bilong Sirinumu i gat sampela ol gutpela pilai olsem Willie Soge, John Kohu, Steven Edene na Ako Toina long fowat long winim graun.

Las wik bal i no ran gut bikos tupela pilai olsem Wasa Sibiya na Ivan laerei i malolo gut.

Tupela pilai olsem Gima Koeari na Geyer Kendi i mas traim na toktok long kamapim na bihainim gem plen bilong ol. Kosa lamua Maina mas traim na yusim sampela inta-senis tektiks long noken yusim ol fowats tumas.

Trek Warriors i gat wanpela biknem pilai bilong Dobo Warriors na tu Vipers Patrick Belesi. Belesi bai yusim inta siti eksperien bilong em long traim daunim ol birua bilong em sapos em i kisim gutpela sapot.

Belesi bai poromanim Douglas Aoti na Knox Eddie.

Long fowat Joshua Billy, Kevin Korave, Taisen Kora, Koivi Arogo na Jethro Rabie bai stretim ol difens bilong oposisen na setim ol beklain. Dispela gem bai wanpela gutpela gem stret na wanem tim i gat gutpela na strongpela difens bai win.

Las yia primia Hooks Tigers bai skorim namba tu win egensim Sirinumu Owl Panthers (OP)

Long bikpela gem, Sogeri Choice husat i stap namba wan bai traim strong bilong IBS Pukpuks. Pukpuks i silip tasol long namba tu ples na redi tasol long winim namba wan ples sapos sindaun bilong Choice i bagarap.

Choice i no lus yet na ol bai tingting long reko-tim wanpela gutpela win stret long dispela wiken.

Tasol kosa bilong Pukpuks Peter Teine husat i wanpela olupela pilai bilong Sogeri Choice i save long stail na trik bilong ol.

Long ol B gret, Crystal Eels bai daunim Trek Warriors, Hooks Tigers katim nek bilong Sirinumu OP's na Sogeri Choice bai lek han long ol Pukpuks.



• Susa bilong Difens ya i kam long stait long traim stilim bal long pilai bilong Togelu insait long Pot Mosbi Wimens Kompetisen las wiken. Foto: ISSAC IKUAVI.




I WIKEN WOKIM GUTPELA SAMTING LONG YU

• TST Kempa (2) i salensim Chemcare Pharmacy Sparrows long division tu bilong Pot Mosbi netball kompetisen.

• Namel lephan: Straika bilong Telikom Nelly Taman i givim siksti na abrusim fulbek bilong Yunivesiti long primia wimens soka gem bilong Pot Mosbi. Telikom win 2-0.

• Daunbilo lephan: Aipas Dona Ou i sindaun na holim Maskot bilong XI Paralimpik long Australia. Nem bilong Maskot em Lizzie. Ou i stap long PNG tim long pilai long Australia.



• Namel raithan: Reserve gret gem namel long Post Pumas na Defence long Pot Mosbi ragbi lig long Sande.

• Daunbilo raithan: Soka gem namel long Nomads na Cyclone insait long namba wan divisen soka resis long Pot Mosbi las Sarere . Nomads win 1-0.





Enga Mioks i win yet long inta siti resis

SP KAP RIPOI
ENGA Mioks i winim Goroka Lahanis 7-6 insait long namba faiv raun bilong SP Kap inta siti ragbi lig resis long Sir Danny Leahy oval.
 Dispela em wanpela bilong tupela inta siti gems i kamap Isten Hailens long wiken. Long namba wan gem, Mendi Muruks bagarapim sindaun Pot Mosbi Vipers 22-10.
 Insait long arapela gem, Rabaul Guria i winim Simbu Warriors tu long sem skoa 22-10 na Lae Bombers nekim Waghi Tumbe 8-0.
 Gem namel long Mioks na Lahanis i wanpela strongpela gem tru. Tupela tim wantaim i kamapim gutpela na strongpela gem wanpela

ol gutpela takol i kamap long tupela sait wantaim. Ol boi asples, Lahanis, i tingting long bagarapim sindaun bilong Mioks tasol ol boi Enga i spendim bikpela bas fe, olsem na ol i mas win.
 Raymond Karl, Robert Tela, Tuksy Karu i wok long go pas long ensin rum bilong Mioks long helpim boi i win.
 Gavana bilong Enga Peter Ipatas i spendim bikpela mani long helpim Mioks i kamap wanpela strongpela tim insait long inta siti. Tasol em i guria stret olsem Mioks nau i go pas long poin lata.
 Vipers i rekotim namba tu lus bilong ol. Long wik antap, ol i lus long Lae Bombers na las wik tasol ol i lus long Mendi Muruks.
 Siaman bilong Pot

Mosbi Vipers Isacc Lupari na ol selekta nau i mas tingting gut long makim wanpela strongpela tim. Ol sapota bilong Vipers i les pinis long kisim ol kainkain eskyus.
 Dispela wiken, Vipers, bai sambai tasol. Na Mioks bai bungim Muruks long Wabag na Tumbe tu bai salensim Mt Hagen Eagles Mt Hagen.
 Goroka Lahanis bai salensim Rabaul Guria long Kokopo na Simbu Warriors bai bungim Lae Bombers long Kundiawa.
 Poin lata nau i sanap olsem Enga Mioks 10, Rabaul Guria 6, POM Vipers 5, Lae Bombers 4, Mendi Muruks 4, Mt Hagen Eagles 4, Goroka Lahanis 3, Simbu Warriors 2 na Waghi Tumbe 0.

Bombers winim Tumbe long bikpela ren

SP KAP RIPOI
LAE Bombers i winim Waghi Tumbe 8-0 insait long wanpela gutpela gem bilong SP Kap inta siti resis long wiken. Gem ya i bin kamap long Lae Rugby League oval.
 Ples bilong pilai ya i no gutpela tumas tasol tupela tim i traim hat tru long kamapim gutpela gem bilong ol sapota.
 Bikpela ren i bin kam daun na i givim hat taim stret long ol boi Waghi Tumbe.
 Ol Bombers i putim wanpela trai long namba wan hap, na bihain long namba tu hap, ol i putim tupela trai na ol boi Tumbe i no skorim wanpela trai.
 Dispela em i namba foa taim ol boi Waghi i lus. Ol i no winim wanpela gem liklik na ol Waghi Tumbe menesmen i tingting nau long lukluk na skelim asua bilong ol.
 Tumbe i gat wanpela gutpela kosa tru long Gabriel Kiluwa tasol sampela samting i mas asua olsem na ol i no win.
 Ol boi Westen Hailens i kamapim gutpela pilai long skorim trai tasol ol i no painim

spes long skorim trai.
 Kosa bilong Lae Bombers Joe Katsir i amamas tru bikos nau em i painim gutpela kom-binesen long hapbek na faiv-et long winim ol gem.
 Kepten bilong Tumbe Daniel Ape, Peter Dai na Masa Kumuyie, Bernard Otto, Philip Samson na Ezekiel Ben i kamapim strongpela gem long traim winim namba wan poin tasol ol Bombers i blokim ol.
 Bombers i wok long painim hat traim ol i stap long territori bilong Tumbe bihain long ol boi olsem Kevin Yaka, Paulu Motoro na Michael Moses i wok long pilaiim bal hariap long eria bilong ol.
 Tumbe inap skorim sampela poin sapos Mah Wuz i kikim dispela 5-pela penalti insait long 10 mita mak long namba wan hap bilong pilai.
 Insait long 25 minit, pilai i wok long senis taim Gilbert Joseph na Timothy Timeous i wok gut long helpim Bombers long skoa.
 Fowat bilong Kumul bipo Tony Dai, Simon Pegu, Cedric Belo, Eddie Mark, na Tino Hombi i kamapim gutpela gem stret long winim bikpela graun

long helpim beklain bilong ol long skoa isi.
 Insait long wanpela kain stail pilai, Timeus i tromoi wanpela gutpela bal i go long Yak na em i setim Theophile Keheno long putim trai. Eddie Mark i no kisim gut konvesen na skoa i stap 4-0.
 Ol boi Waghi i traim olgeta trik tasol Bombers i tok wet pastaim. Pilaia olsem Wanungu Kila, Joe Kali na Tobias Kul na fulbek James Meninga i kikim planti ol gutpela bal long tainim ol Bombers i go bek long difens.
 Arapela trai bilong Bombers i kam long huka Daniel Lukas na dispela i surikim skoa i go long 8-0.
 Ol boi Westen Hailens i gat sans taim winga Peter Kaima i kikim wanpela graba kik na Tony Dai bilong Bombers katim na stapim bal. Sapos nogat, Tumbe bai gat sans yet long skoa.
 Insait long arapela gem, Mendi Muruks winim Pot Mosbi Vipers 22-00, Mioks autim Lahanis 7-6 na Rabaul Guria winim Simbu Warriors 22-10.



2 DEI DEMO SEL FONDE NA FRAIDE JULAI 6 & 7 2000.

YU MAS HARIAP LONG OL DISPELA PRAIS... NOGUT BAI YU MIS AUT!

Ela Motors long olgeta hap long PNG bai wokim traipela 48 aua maraton sel.... Go lukim ol na givim prais bilong yu!

NARAKAIN KAR LONG NARAKAIN PRAIS STRET!

RINGIM OL HOT LAIN BILONG MIPELA NAU :

Ela Motors
 **TOYOTA**

OLGETA HAP LONG PAPUA NIUGINI

LAE : PH 4722322 • KOKOPO : 9829100
RABAU : 9821988 • MADANG : 8522188
MT HAGEN : 5421888 • WEWAK : 8562255
KAVIENG : 9842788 • KIMBE : 9835155
TABUBIL : 5489060 • VANIMO : 9739060
BUKA : 9739017 • ALOTAU : 6410100

EM6811



MILO IKEN WOKIM GUTPELA SAMTING LONG YU

Warriors daunim pawa bilong Brothers



• Tupela pilaia bilong Gerehu United i dabolim pilaia bilong Brothers. Ol Brothers win 54-4. Ol foto: ISSAC IKJAVI.

PRL RIPOT

DOBO Warriors i kamapim wanpela gutpela gem na winim Toyota Brothers 22-16 insait long Pot Mosbi ragbi lig resis long Sande.

Ol boi Koiari i minim tru long win na ol i kamapim wanpela strongpela pilai stret na blokim gut tru Brothers.

Lus bilong Brothers nau i givim wei long Souths long kisim namba wan ples gen. Souths i wilwilim stret Gulf Oil Trust Wests 76-20.

Gem namel long Brothers na Dobo Warriors i no kamap gut tumas bikos referi i no mekim gut wok na tu sampela sapota i kamapim pait wantaim lainsmen.

Wanpela sapota husat i kamap long namel long fil, ol sekyuriti dok i kaikai han bilong em.

Samting olsem 15 minit i stap, Dobo Warriors i wok long go pas long poin 14-12, Brothers i wok long karim bal long go putim trai tasol

bal i lus na lainsmen i tok nok-on.

Dispela nok-on i luk rong long ai bilong planti man olsem na ol opisal bilong Brothers na sapota i paitim lainsmen.

Gem ya i gat planti ol liklik asua na Dobo Warriors i daunim skoa i kamdaun liklik taim Norris Selu i trikim ol Brothers na putim trai aninit stret long golpos.

Fulbek Boli Boli i kikim skoa na ol boi bilong em i stap bihain long tupela poin tasol.

Ol Warriors i skorim arapeal trai bihain long ol i kamapim gutpela gem long 10 mita eria bilong Brothers na setim winga Beri Soge long skoa.

Em i putim trai na Dobo Warriors nau i go pas long skoa.

Brothers i traime olgeta stail bilong em. Insait senta Peter Kamane i lusim bal long takol tasol em i pas long lek bilong em.

Ol boi Brothers i tingting long liklik asua i kamap na

Warriors i no westim taim na Joe Bana i setim kepten Obet Batia long skoa. Warriors i stap nau long 18-12.

Brothers i no giv ap. Ol i pilai strong yet na Bruce Thomas i putim arapela trai bilong Brothes long surikim skoa i go long 18-16.

Warriors i no wari. Ol i daunim het na pilai tasol na winga Simon Numapo, liklik brata bilong siaman bilong PNGRFL, John Numapo, i putim las trai bilong Warriors na ol i autim Brothers 22-16.

Ol pilaia bilong Brothers husat i taitim bun em Jeffrey Haba, Selu, Tom Johns, Damson Baeka na Paulus Wembri.

Wanga, Kamana, Moses Matau, Seniko, Thomas na Catship Aesamo i pilai strong tru long Brothers.

Insait long arapela gem, Royals fefitim Gerehu United 20-0, Tarangau winim Hawks 26-12, Post Pumas autim Defence 20-10, Waliya rausim trausis bilong Magani 27-24.

.Orogen Skul Soka salens bai kamap bihain

SKUL SOKA RIPOT

NESENEL 2000 Orogen Skul Soka Salens nau bai kamap long namba tri tem skul holide long mun Septemba.

Presiden bilong Mosbi Skul Soka na tu tonamen dairekta Channel Kakahe i tokim Wantok olsem dispela soka salens i sapos long kamap long neks wiken tasol nau surik i go long Septemba.

Mista Kakahe i tok dispela soka salens i bihainim tasol holide bilong ol skul mangi we long namba tu tem i save

gat tu wik holide. Tasol nau Edukesen Dipatmen i senisim olsem na bai nogat nau.

Arapela samting tu, ol ogenaisa i stapim gem bikos planti ol skul mangi i save kamap long ol komyuniti skul na i gat soka tim. Sapos ol i go het, ol lain long intanesenel skul tasol bai pilai.

Kakahe i tok em i salim bikpela toksave i go pinis long olgeta skul insait long kantri olsem tonamen ya bai i no inap kamap inap long tem tri holide.

Nau tonamen bai kamap

long Septemba, Mista Kakahe i askim tu ol arapela senta long painim tim na salim i kam long Pot Mosbi long dispela salens. Ol tim i redi pinis, em i askim ol long noken giv ap, tasol tren inap long tem tri na tu painim planti mani long kam spin long Pot Mosbi.

Tonamen bilong dispela yia i pulim pinis Finschhafen (Morobe), Lae (St Mary), Star Mountain (Tabubil), Alotau, Kerema na Pot Mosbi yet. Arapela senta i soim laik em Manus, Namatanai, Kimbe, Wewak na Vanimo.

Wirui Siens dro wantaim Yakobis

ELVIS MATHEW i raitim

TUPELA biknem tim insait long primia kik resis bilong Wewak soka Wirui Seins na Yakobis i dro 1-1. Dispela gem i bin kamap long Prins Charles Oval long Sande.

Wirui Seins em i wanpela nupela nem tasol pes bilong ol pilaia i no nupela. Dispela long wanem strongpela na biknem tim ol i kolim Posinu i senisim tasol nem igo long Wirui Seins. Insait long dispela pilai, tupela wantaim i dro 0-0 long pinis bilong namba wan hap bilong gem.

Tupela tim wantaim i putim kamap ol gutpela stail bilong pilai. Ol beklain, midfil na winga bilong tupela tim wantaim i pilai strong tru long lukautim na kontrolim bal. Tasol bikpela asua na hetpen i bin stap long ol straika bilong tupela sait wantaim long skoarim gol.

Ol straika bilong Wirui Seins i painim hat tru long skoa bikos ol beklain bilong Yakobis sanapim ol strongpela difens na banisim maus bilong golmak bilong ol. Wankain tasol ol beklain bilong Wirui Seins i no givim isipela taim long ol straika bilong Yakobis. Nogat. Ol i gat tingting na laik tu long win na ol i pasim olgeta liklik hol na stretim ol straika bilong Yakobis long kisim kolwin bilong Winjama nam-bis.

WEWAK SOKA RIPOT

Tupela tim wantaim i bin i gat samting olsem wanpela o tupela gutpela sans long skoa insait long namba wan hap bilong gem. Ol boi bilong bikpela manki ya, Peter Tiko, i bin i gat wanpela gutpela sans long 19 minit bilong pilai insait long namba wan hap. Gutpela gol tru i sapos long kamap long dispela naispela ausait kik bilong namba 19 bilong Yakobis. Sapos boi bilong Tiko i daunim i kam daun liklik moa umben bilong Wirui Seins i sapos long solap. Tasol namba 19 i hapim tumas bal na bal i go sapim tasol antap ain ba bilong gol mak na i go ausait.

Wirui Seins tu i bin i gat wanpela sans bilong ol tu long namba wan hap bilong gem. Dispela sans bilong Wirui Seins i bungim wanpela straika bilong ol insait long 25 minit bilong pes hap bilong gem. Straika bilong Seins i kisim bal long beklain eria bilong Yakobis na trikim beklain bilong Yakobis na i go insait long skoa. Em nau, em wantaim golkipa bilong Yakobis tasol. Na yu save wanem? Em i kirap na krangi liklik tasol na putim bal stret long han bilong goli bilong Yakobis.

Ol boi long Yakobis i brukim midfil bilong Wirui Seins na i laik i go skoa

tasol Peter Kaunsil Yapi wantaim ol boi bilong em long beklain bilong Wirui Seins i senisim ol na tok nogat long ol. Wankain samting na i kamap long hapsait. Yakobis na Wirui Seins i paitim tri lip kas i go i kam na Yakobis i brukim kiau insait long 15 minit bilong sekan hap bilong gem.

Dispela gol bilong Yakobis i kamap long hatwok bilong namba 9. Em i kisim bal long beklain eria bilong Wirui Seins long lep wing na em wanpis i katim kona i go long golmak bilong Wirui Seins. Olsem na wanpis man em i kisim bal i go na brukim kiau.

Dispela gol bilong Yakobis i kirapim bel na tingting bilong Wirui Seins. Na Seins i traime olgeta kain rot long setim na yusim straika bilong ol Brain Bravo Siria long bekim gol bilong Yakobis. Tasol beklain bilong Yakobis i tok nogat na nogat olgeta long Wirui Seins. Dispela naispela na gutpela gol bilong Wirui Seins i kamap taim namba 5 bilong Seins i kisim bal long saitlain i kam na setim long wanpilai bilong em Otto Nanguromo na em i sutim bal nating tru i go insait long mak bilong Yakobis.

Gol bilong Nanguromo i mekim Wirui Seins i dro (1-1) wantaim Yakobis long ful-taim.



Straika bilong Rapatona Peter Moyap i blokim Peter Kamane bilong PS Yunaited long golpos.

PS United dro wantaim Rapatona

PS United i kamapim wanpela gutpela gem na dro 1-1 wantaim Rapatona long primia kik resis bilong Pot Mosbi soka las wiken.

Boi ros ya, Alphonse Mautau i skorim dispela gol long levelim skoa. Mautau i kisim wanpela isi bal i kam long wan pilaia bilong em Baddy Galava na trikim ol beklain bilong Rapatona na skoa.

Gem namel long tupela tim, Rapatona na PS United i no kamap olsem wanpela strongpela gem.

Insait long 30 minit bilong namba wan hap, nogat wanpela gol i kamap. Orait ol boi Rapatona i tingting planti tru na ol skorim wanpela gol.

Gol ya i kam long stail

mangi ya, Francis Moyap. Boi Manus ya i wok long kamapim paia tru long Bisini soka graun. Sapos Rapatona pilai, na yu laik lukim Moyap i skorim gol long kainkain eria bilong fil, orait kam lukim.

Rapatona i putim planti ol gutpela pilaia long fil olsem Keith Norrie, John Naghan, Peter Punau husat i save sapotim Moyap, tasol beklain bilong PS Yunaited i blokim olgeta rot bilong ol.

PS Yunaited i gat sampela gutpela sans tasol ol straika bilong ol i no tingting gut long skorim gol. Dispela dro bilong Rapatona nau i surikim stret ol olsem namba wan long poin lata. Dispela gol bilong Moyap

PMSIA RIPOT

i stap 1-0 inap haptaim. Gol bilong PS Yunaited i kamap long namba tu hap bihain long kosa Stalin Jawa i mekim sampela strongpela toktok long ol pilaia bilong em.

Bihain long dispela gol, ol difenda bilong PS Yunaited i opim ai stret na save kwiktaitim long rausim wanem ol bal i kamap klostu long mak bilong ol.

Insait long arapela gem, Cosmos i nekim Kurti Andra 2-0, Defence winim SP Brewery 1-0, Tawala winim Wikila Tarangau 3-2 na Blue Kumul rausim trausis bilong ol boi Guria 3-2.



MILO IKEN WOKIM GUTPELA SAMTING LONG YU

Wansolwara:

Ol Ripot long Solomon Ailan hevi:

Solomon Ailan:
Solomon Ailan i gat nupela Praim Minista. Nem bilong en em long Mannasseh Sogavare.
Em bin win long tupela vot taim em i kisim 23 vot na man i kamap namba tu long en i bin kisim 21 vot.
Mista Sogavare i pikinini bilong wanpela Seven De Etventis Pasto na olsem ol arapela brata na susa bilong em, mama i bin karim em long Oro Provins, PNG long 1955.
Em bin holim wok olsem Oposisen lida long gavman bilong foma praim minista Bartholomeo Ulufa'alu husat i bin risain tupela wik i go pinis bihainim hevi we Solomon Ailan i stap long en.
Tupela narapela brata bilong em i wok olsem ol SDA Pasto na ol i kamap olsem man PNG na wantaim ol famili bilong ol, ol i stap long kantri.
Ilekse bilong Mista Mannasseh i strongim hop long stretim dispela hevi we kantri i

stap long em moa long 19-pela mun pinis.
Em bin tok nupela gavman bilong em bai wok hat long painim rot bilong stretim hevi na gutpela sindaun na bel isi pasin i ken kamap gen long kantri na tu long tupela grup husat i stap long pait.
Em bin tok gavman bilong em bai kisim kantri i yunait na kamapim bel isi pasin.
Ol Malaita Igel Fos paitman i bin belhat long hevi i kamap bihainim kros long graun we ol Guadalkanal pipel i gat long ol Malaita pipel. Long laspela 19 mun, Isatabu Fridom Muvmen grup bilong Guadalkanal i belhat long ol Malaita pipel husat ol i tok i pulap sindaun long graun bilong ol (Gaudalkanal) na tu tekova long ol wok long gavman na praivet sekta na ol yet asples papagraun i sindaun lukluk tasol olsem ol ausait lain long graun tru bilong ol.
I kam inap nau, samting olsem 20,000 Malaita pipel i ronawe i

go pinis long ples bilong ol long Malaita. Na samting olsem 60 pipel i dai pinis long en.
Long kik bek long ol IFM, ol Malaita lain tu i kirapim pait grup bilong ol na long Jun 5, tripela wik i go pinis, ol i kirap na redim plis stoa we ol i save putim ol gan samting na kisim ol na bihain gen holim kalabusim Praim Minista. Na hevi i go bikpela moa i kam inap nau.
Foren Minista bilong Australia Alexander Downer taim em i welkamim gutpela go het bilong ileksen i askim strong nupela gavman long wok gut na pait namel long tupela birua grup bai pinis. Na gutpela gavman na gutpela sindaun i ken kamap bek long kantri.
Mista Sogavare i tok promis olsem em i laik stretim dispela hevi bipo long Krismas taim. Em bin tok promis tu olsem em bai gimiv amnesti long ol pait grup sapos ol i lusim ol samting bilong pait.

Solomon Ailan Gavman tokaut long nupela kabinet

Praim Minista Mannasseh Sogavare i tokaut long nupela 14 mamba kabinet we bikpela samting bai em i lukluk long en em long nesanel yuniti, bel isi na sekan pasin.	Ol bai tokaut long narapela faivpela minista bipo long pinis bilong dispela wik. Deputim Praim Minista Allan Kemakeza em ol i makim em long lukau-	tim ol wok long kamapim bel isi pasin namel long tupela birua grup. Ol nupela mamba i bin autim tok promis bilong ol long dispela wik Mande.	Foma Praim Minista Bart Ulufa'alu i bin ofaim long helpim gavman insait long ol wok bilong edresim o stretim hevi sapos gavman i askim em long.
---	---	---	---

Nius long Fiji hevi:

Foma Praim Minista bilong Fiji Sitiveni Rabuka i askim strong ami long sanapim kwiktam interim gavman na putim presa long ku lida George Speight i lusim Praim Minista Mahendra Chaudhry na 26 arapela politikel hostej we em na lain bilong em i holim olsem kalabus long Fiji Palamen haus, stat yet long Me 19.
Mista Rabuka i tok militeri i ken daunim hevi long sait bilong politiks sapos em i makim interim gavman long ranim kantri.
Em i tok wari we ol i gat long nau em long ol hostij tasol sapos Komanda Frank Bainimarama, bos bilong ol ami i makim interim gavman pasin we ol i holim ol politisen hostij bai i no moa

kamap olsem politikel isu. Sapos Komanda i hariap na makim presiden, dispela bai slekim wari.
Long nau ol ami i wok long tok-tok long husat tru ol bai makim ol interim presiden bilong Fiji.
Wanpela nem we ol i lukluk long en em long Laisenia Qarase husat i wanpela beng wokman we ol i ting bai kisim ples bilong Presiden Chaudhry.
Piksa bilong Presiden Chaudhry na ol arapela Fijian Indian politisen we ol i holim ol kalabus i bin kamap long televisen. Ol i stap kalabus long sikspela wik nau na ol ripot i tok ol asples Fiji lain we ol i holim ol kalabus i stap long narapela hap taim ol Fiji Indian lain tu i stap

long narapela hap yet bilong ol. Piksa i bin soim tu ol Speight sapota bilong bikpels Fiji i raunim na gadim ol lain we ol i holim ol kalabus i stap.
Long wankain taim tu, militeri kaunsil i bin bung long toktok long wanem samting ol bai wokim long stretim dispela hevi we i stap long kantri nau moa long sikspela wik.
Ami i wok long toktok long laik mekim samting long traim kisim ol hostej. Tasol long wankain taim tu, ol ripot i kamap olsem ami negosieta Filipino Tarakinikini i wok long toktok long slekim kefiu o taim tambu we ol bin putim long Fiji long namba wan wik bilong hevi long mun Me yet taim ol trabel i stat.

Lukaut! Noken pretim ol dispela sap hon animel



• Meri Mongolia i kisim milk long dispela ol gout bilong em long gras eria we em i lukautim ol long Gachuurt, 30 kilomita longwe long Ulaan Baatar, kapitel siti bilong Mongolia. Piksa i kam long Weekend Australian niuspepa.

Nupela takis sistem i kamap long Australia

Australia:
Generel Seils Takis Praim Minista John Howard wantaim bos bilong ol Myers supamaketa stoa, Coles Myers taim nupela takis ol i kolim long GST i kam insait long Australia.
Planti toktok we i sapotim na egensim GST takis i bin kamap long maus bilong pablik long Australia taim gavman bilong John Howard i wokim disisen long kisim dispela takis i go insait long kantri. Sampela i bin lukim GST olsem em no gutpela bikos ol bin lukim olsem prais bilong ol samting long stua bai go antap. Tasol olsem olgeta samting, GST i gat ol gutpela na nogut sait long en.




Long Sarere Julai 1, ol pipel bilong Australia i bin lukim nupela GST takis i go insait long kantri. Planti i bin pret olsem pe bilong ol samting long stoa bai go antap.
GTS em nupela takis sistem we ol i kamapim senis long prais bilong ol samting bikos ol bai go antap long sampela mak.

Sekim Prais taim!
• General Seils Takis Praim Minista John Howard wantaim bos bilong ol Myers supamaketa stoa, Coles Myers taim nupela takis ol i kolim long GST i kam insait long Australia. Piksa i kam long Weekend Australian niuspepa.
Sampela gutpela samting we GST i kamapim em long welfea na famili pei bai go antap.
Pablik long Australia

bai glasim rot we GST i go long en na sapos em bai kamapim hevi o wanem samting insait long ol wik, mun na yia i kam.

20t
WANTAIM VAT
Hubba Bubba
NOKEN PEIM MOA

LAIIPSTAIL



• *Grass sket palai antap ...*

Meri ya em wanpela danis meri bilong Tutu Beach Tieta Grup i kamapim wanpela danis we i soim stall bilong dispela tieta grup. Dispela kain samting i gutpela long holim yet pasin tumbuna bilong yumi we i wok long bagarap wantaim kainkain nupela tingting na wel bilong laip ol waitman i karim i kam insait long kantri.



• *Lephan Antap:* Sumatin bilong Philip Aravure praimer i autim wanpela singsing bilong Momase rijon taim praim minista Sir Mekere Morauta i go lukluk raun long skul bilong ol.

• *Lephan daunbilo:* Ino olgeta wanpela man inap pilaim dispela ukelele bilong ol Tahiti olsem bagaman ya, em brata bilong bosman bilong Rising Star Studios, Wari Vele.

• *Raithan daunbilo:* Sif Saund enginia na wanpela musik man tu bilong Rising Star Studios Basil Greg i kilim skin stret long opening bilong Rising Star Studio long las wik. Dispela nupela studio i laik lukim olsem ol man bilong pilai musik i mas kisim gutpela bekim long kain musik ol i save kamapim bikos ol i save mekim bikpela hatwok na ol i mas kisim gutpela bekim long dispela wok ol i mekim.

Oi Poto: ISSAC IKUAVI.



Balus em rot bilong ol maunten na bus lain

MASTA WAI i raitim

OL pipel insait long bikbus na maunten ples long Papua Niugini i save laki bikos ol liklik balus i save ron long hap bilong ol long karim kago na pasindia i go kam long taun o arapela provins.

Planti hap bilong Papua Niugini i stap long bik bus na longwe hap tru long ol taun na stesin. Planti i stap antap tru long ol bikpela maunten we ron i hat tru long wokim long ol ka i ron long en.

Long hap bilong Hailans, i gat planti maunten na na ol longwe ples tru olsem Karimui na Solt Nomane long Simbu provins, Bundi na Raikos long Madang provins, planti maunten na bus ples long Erave na Tari eria long Sauten Hailans provins, Marawaka long long Isten Hailans provins, Garaina long Morobe provins na planti arapela provins moa.

Planti ples i no klostu long bikrot o nambis bai isi long go kam long taun long baim ol samting bilong stua o salim ol kaikai na samting bilong gaden long maket.

Planti ol liklik balus kampani ol i kolim Ted Level Airlines olsem Milne Bay Airways (MBA), North Coast Aviation (NCA), Kiunga Airways, Airlink, Nationaire na arapela moa ol liklik balus kampani tu i save ron na pundaun long planti bus na maunten ples bilong Papua Niugini.

Mi bin ron pinis long Kiunga

Airways na North Coast Aviation (NCA) na mi klia long ron bilong dispela tupela balus. Na ol pailot bilong ol dispela balus mi save tok tok wantaim ol na mi painimaut olsem ol i bin ronim ol balus long planti bus na maunten ples bilong Papua Niugini long longpela taim i kam.

Ol ples lain tu i save gut long ol dispela pailot na ol i save tok, lapun bilong dispela hap ya, em i save ronim balus olgeta taim long hia na em i save. Sapos yu nupela man na balus i pundaun long wanpela bus ples balus o antap tru long het bilong maunten, bai tewel bilong yu i surik nogut tru. Tasol ol asples yet bai sindaun isi bikos ol i save olsem pailot ya i no nupela man long dispela hap.

Yu ken luksave tu olsem ol dispela liklik balus i no nupela balus. Ol i olpela na nois bilong ol i save bikpela tru na ia bilong yu bai pas taim yu stap insait long baus. Ol sait sait bilong balus tu bai mekim nois na guria nabaut na gutpela tingting bilong yu bai sot liklik. Inap taim balus i go pundaun gut na yu krungutim graun nau, bai bel bilong yu i gutpela na yu bai pulim gut win.

Balus fe i no wankain long balus fe bilong ol bikpela balus olsem Air Niugini. Em i save kos bikpela mani liklik long kisim yu go long ples bilong yu. Sapos yu ron long Air Niugini balus i go long Lae bai i kos olsem K201. Na sapos yu ron long liklik balus i go long Lae bai

kos samting olsem K250.

Planti bus ples i gat ol nupela haus kapa, simen haus, ain pos, ol raba bilong pulim wara. Ol skul na haus sik i gat ol nupela kapa na simen na palang samting. Ol dispela samting i kam long balus. Na kos bilong baim balus long karim ol dispela samting i no liklik. Ol i baim bikpela mani long balus i karim ol dispela samting bilong haus, skul, haus lotu na klinik.

Tasol i nogat narapela rot moa long ol dispela kago na saplai i go long en. Ol pipel bilong dispela hap i save yusim dispela rot tasol olsem na ol i save long en.

Long taim nogut olsem bikpela ren o bikpela win, ol dispela liklik balus i no ken ron. Ol i mas stop wok inap gutpela taim na ol i mekim wok gen.

Long nius yumi harim pinis olsem sampela liklik balus i bin bungim birua long Wes Nu Briten provins, Isten Hailans provins, Garaina long Morobe provins na dispela wik tasol yumi harim nius olsem wanpela liklik balus i bungim birua long hap bilong Kerema long Galp provins. Narapela tripela birua em olsem i gat hevi long bodi bilong balus olsem na ol i bungim birua. Dispela long bus bilong Kerema em ol ripot i no kamaut yet long as bilong birua. Long ol dispela birua em ol pasindia wantaim pailot i dai.

Maski dispela kain nius nogut i kamap, tasol ol bus manmeri na ol

maunten ples manmeri bai go long wanem rot long karim ol kago bilong ol i go kam. I nogat narapela rot bikos i nogat rot ka o solwara i klostu long sip i karim ol samting i go long ol.

Long wokim ples balus insait long ol dispela longwe na bus ples, i no isi wok long mekim. Ol manmeri long ples i mas wok wantaim long brukim graun na na stretim ples i kamap gutpela. Sapos ol haus i stap long dispela hap, ol i mas rausim bikos ples balus bai sanap long en. Na olgeta manmeri bai givim bel long mekim wanem samting ol i mas mekim bikos em wanpela rot tasol bilong ol.


Planti ol liklik ples balus em gavman i bin helpim ol pipel long sanapim. Planti em nesenel memba i bin wok klostu wantaim ol pipel bilong ol long sanapim. Na arapela em sios i wokim o ol bikpela kampani husat i laik mekim wok long ol dispela ples i sanapim. Olsem na i gat kain kain han o lain i mekim kamap planti ples balus insait long ol bus ples bilong Papua Niugini. Taim ples balus i kamap pinis, ol wokman bilong Sivel Eviesen bai i go na sekim sapos ples balus i orait long balus i ken go pundaun long en.

Long ol maining ples, bai ples balus i bikpela na gutpela tru, maski em i stap long bus ples. Bikos wok maining bai kamap na balus bai pundaun olgeta de long karim ol wokmanmeri, kago na ol


saplai bilong wok i go kam olgeta de. Yu ken skelim long ol maining ples olsem Moro long Sauten Hailans provins, Tabubil long Westen provins, Porgera, Tolekuma, Lihir na Misima. Ples balus bilong ol bai bikpela na gutpela moa long balus i pundaun. Na ol ples lain tu i save laki long yusim dispela ples balus bikos kampani i stap na mekim kamap dispela samting.

Planti pipel long longwe ples long bus na maunten i save ron tasol long balus. Tasol ol i nogat sans long ron long sip na spitbod. Taim ol i go stap long taun na i laik go long narapela ples we i stap long nambis, orait ol i ken go long sip na spitbod.

Skelim piksa bilong Papua Niugini olgeta olsem wanpela kantri, em i gat bikpela graun we maunten na bikbus i karamapim. Planti bikpela graun bilong Papua Niugini i stap long bikbus na maunten we ol asples lain i stap long en. Liklik hap tasol em yumi save olsem em ol taun na siti na ol wok we sevis bilong gavman i stap long en o gavman i wok long mekim wok long en. Ol i kolim ol dispela hap olsem graun bilong gavman bikos gavman i gat wok na i sindaun long en. Bikpela graun tru i stap yet we gavman i hat long mekim wanpela wok long en bikos ol i stap longwe long bikpela bus na ol bikpela bikpela maunten.



Pikinini pretim papa



BIPO BIPO tru, i gat wanpela man i stap na em i gat wanpela pikinini. Long taim papa bilong em i laik go long wanpela hap, pikinini bilong em tu i mas bihainim papa oltaim. Maski sapos long de o nait pikinini i man bihainim em yet.

Na long wanpela taim long nait, tupela wantaim i stap insait long hausman, na i gat gutpela mun tru i kamap long dispela taim. Olsem na long dispela taim papa i tingting long go painim kapul long bus, olsem na papa i kisim pikinini i go long bet.

Papa i ting pikinini i slip pinis, tasol nogat pikinini i no slip tru. Nau papa i kirap isi tasol na em i go ausait. Bihain nau pikinini bilong em i kirap na lukim papa bilong em i pas, olsem na pikinini i kirap na bihainim em i go.

Papa i no tingting long lukluk long bihain, oltaim na pikinini bilong em i bihainim yet i go. Tasol pikinini i no toktok long papa, bikos em i pret long em. Nau tupela i go kamap long bikbus tru. Nau papa i lukluk i go antap long wanpela diwai na lukim wanpela kapul i sindaun antap long han bilong diwai i stap.

Man, papa i pret nogut tru, tasol pikinini i no toktok long papa. Nogat. Papa i pret nogut tru nau em i tromoi spia na bunara bilong em i go daun kwik, na em i go long diwai. Papa i kam na bungim pikinini bilong em long namel nau na tupela

wantaim i go daun long diwai. ong taim papa i sanap long graun em i no wet. Nogat. Papa i ran i go pas, na pikinini gen i ren bihainim papa bilong em i go long hausman. Long taim papa i kamap i sut tasol i go long bet,

na pikinini tu i mekim olsem. Liklik taim bihain nau, papa i tok, man dewel i rausim mi kranki olgeta. Tasol sampela man i tok, nogat, em yu ran wantaim pikinini bilong yu. Olsem na papa i belhat na tok, em i no pikinini bilong

narapela man. Nogat. Em i pikinini bilong mi yet, olsem na mi mas kilim em i dai.

Taim papa i laik kilim pikinini, ol man long ples i kirap na brukim pait bilong papa na pikinini. Em tasol.



Nem: Soharto Manave
Krismas: 23 man
Adres: Kautu Div. 2 Kapiura, P.O. Box 451, Kimbe, WNBP.
Save laikim: Pop musik, pilai ragbi, raitim pas wantaim ol pren na serim samting wantaim ol.

Nem: Elaiza Noah
Krismas: 31 man
Adres: Kapiura Plantation, Bilomi Division One, P. O. Box 451, Kimbe, WNBP.
Save laikim: Tok pilai wantaim ol manki na ol mama tu. Benkim mani long benk, raitim pas long pen pren i go kam.

Nem: Januarious Kontera
Krismas: 25 man
Adres: lowara Refugee Kungim Camp, P.O. Box 151, Kiunga, Western Province.
Save laikim: Pilai sokabal na volibal, harim musik, tok pilai wantaim ol gutpela poroman painim wanpela pen pren manmeri long narapela provins na mi promis long bekim olgeta pas mi kisim.

Nem: Melkior Naa
Krismas: 25 man
Adres: MDC, P.O. Box 667
Save laikim: Pilai gita, pilai soka, wokim kanu, wok mani.

Nem: Max Wanix
Krismas: 19 man
Adres: P.O. Box 101, Kimbe, WNBP.
Save laikim: Pilai soka, volibal, raitim pas, ritim buk, senisim presen, go lotu na tok pilai.

Nem: Paul Wogi
Krismas: 30 man
Adres: P.O. Box 378, Kimbe, West New Briten Province.
Save laikim: Go lotu long Katolik sios, wokim gaden.

Nem: Moks Wakore
Krismas: 22 man
Adres: Yun Jung Do Intenesinel, Post Office Box 84, Kimbe, WNBP.
Save laikim: Go lotu, harim gospel musik, pilai soka, basketbal, volibal, pren wantaim narapela provins na mi bai amamas long bekim olgeta pas mi kisim.

Nem: Ben Wanix
Krismas: 19 man
Adres: C/- P.O. Box 101, Kimbe, WNBP.
Save laikim: Pilai soka, volibal, raitim pas long ol pren, go lotu senisim presen na painim gutpela poro long bihain taim.

Nem: Martin W. Thomas
Krismas: 23 man
Adres: Adventist, P.O. Box 125, Wau, Morobe Province.
Save laikim: Go lotu, gospol musik, Pathfinden Yut Kem. Stori wantaim ol brata na susa long Jisas, raitim pas wantaim pren.

Nem: Francis Kevin
Krismas: 27 man
Adres: C/- PNG Sport Commission, P.O. Box 1991, Lae, Morobe Province.
Save laikim: Harim musik, wokim gaden, mitim prens na painim yangpela meri long maritim.

Nem: Thomas Mek
Krismas: 17 man
Adres: C/- Dona Community School, P.O. Box 46, Minj, Western Province.
Save laikim: Pren wantaim narapela provins na sampela tu na i go kam long narapela hap na mi save pilai ragbibal na volibal na senisim presen na potu.

Nem: Joel Mark Mulik
Krismas: 30 man
Adres: P.O. Box 171, Madang.
Save laikim: Pilai soka ragbi tas na harim musik na go lotu long olgeta Sabat. Mi wanpela man bilong mi i save go lotu long SDA na mi laik penpren wantaim husat meri o man i save go lotu long SDA. Mi save amamas long bekim olgeta pas bilong yu husat i rait i kam.



Dia Lalplain
Kristen laip bilong mi i wok long bagarap bikos mi gat belkros long olupela gelpren bilong man, bilong mi. Bel bilong mi i no save gutpela long en taim mi tingim ol hevi we i bin kamap pastaim namel long mi na man bilong mi bikos long dispela meri. Sampela krismas i go pinis, mi bin kros wantaim man bilong mi long dispela samting na lusim haus. Nau mitupela i stap wantaim tasol mi save wari planti long bihain taim bilong mitupela. Mi save sem long tokim man bilong mi olsem mi save belkros tru long meri ya taim mi tingting long en o taim mi bungim em long sampela hap.

Mi wari tu bikos Baibel i tok em i rong long ol Kristen bilong belkros long narapela. Mi laik lusim pasin bilong belkros na kamap olsem pren wantaim meri na mi bin smail long en long las taim mi lukim em. Tasol mi no save long daunim na lusim pasin bilong belkros.

JELES

Mi gat belkros long olupela gelpren

Dia Pren
Planti meri na man long olgeta hap bilong wol i save bungim dispela hevi.

Yu no klia sapos man bilong yu i laikim yu tru na yu jeles long narapela meri ya. Planti man na meri husat i save gat dispela kain tingting i rong. Bikos long dispela kain pret-pasin na jelesi, ol no soim bikipela laik na lukaut long ol man o meri bilong ol na dispela i ken kamapim hevi we man o meri bai lusim wanpela.

Dispela samting i skruim hevi bilong yu moa yuet bikos olsem wanpela Kristen, yu save olsem em i rong long gat belkros long narapela. Tingting bilong yu i pas long no laikim em na yu pilim olsem em no stret long wokim dispela kain pasin. Bai yu senisim dispela kain tingting olsem wanem?

Nambawan samting em i moabeta long yu i luksave long sampela samting we i sut long yu yet. Na bikos yu tanim bel na givim laip bilong yu i go long Jisas, Baibel i tok yu stap long gutpela rot tasol yumi olgeta man em ol sin manmeri. Sin bilong yu i stap namel long yu na God. Bai yu wokim wanem samting?

Namba wan pas bilong John i tokim yumi olsem bekim long dispela i stap long sapta 1, ves 8 inap long 10. Yu mas luksave olsem yu sinman na askim God long lusim ol rong bilong yu. Tasol yu luksave long ron bilong yu na yu tokaut pinis long Papa God long dispela samting. Na God Papa i lusim tingting long sin bilong yu pinis na yu smail long meri ya.

Tasol bikos dispela pasin bilong hetim o strongpela tingting long no laikim em i stap

longpela taim pinis wantaim yu, em i kamap olsem wanpela hebit bilong yu. Na em i hat long lusim dispela hebit kwiktaim. Tasol sapos yu wok long traime lusim, samting bai i wok na yu kamap gutpela.

Baibel i tok "i gat belkros we i bihainim lo na yu no wokim sin long en". Kros i kamapim gutpela samting taim em i gat long en bel sori pasin long ol dispela husat i wokim rong. Inap yu tanim tingting bilong yu i go long preia olsem meri ya bai lusim ol sori bilong em long wanem em no moa prenim man bilong yu, na em bai painim ol nupela poroman.

Yu tok yu sem long toktok long man bilong yu long hevi we yu gat long olupela gelpren bilong em. Yu ting em i gutpela long tokim man bilong yu nau? Nogut man bilong yu i lus tingting pinis long meri ya na sapos yu kirapim ol toktok long en, moa hevi bai kamap. Na sapos em i tru olsem em wok long skruim toktok wantaim meri ya, em bai tokim yu o bai em kros tasol.

Stiatok bilong mipela long daunim hevi bilong yu em strongim tingting bilong yu olsem yu bai rausim olgeta tingting long en. Na sapos nogat, yu mas pait strong taim finging long en i kamap wantaim nupela tingting olsem "Bai mi mekim wanem samting long amamasim man bilong mi? Baimi kukim kaikai we em save laikim tumas? Bai mipela i wokim ol samting wantaim na dispela bai amamasim em o slipim bebi kwiktaim na tupela yet i ken stap wantaim long toktok, serim ol samting na slip wantaim.

LAIPLAIN



Morobe Provinsal Gavman

Morobe Provinsal Gavman em i was papa bilong Morobe Sevings na Lons Sosaiti;

• Em i givim mani long Sosaiti long karimaut wok olsem:

(a) Peim ol wokmanmeri long lukautim wok bilong sosaiti.

(b) Peim Opis Rent bilong Sosaiti.

(c) Peim ol arapela ekspens bilong Sosaiti olsem ol pepa bilong opis, opis masin na ol tebol na sia.

(d) Peim wok long bringim wok bilong Sosaiti we bai i ken kamap klia long ol manmeri long asples.

(e) Gavman bai peim wok long bringim na kamap benk klostu long ol asples.

Wok kamap long Sosaiti Stat long mun Mas 99 inap Mas 2000

Namba bilong ol memba long Ssoaiti 2,526. Sea mani ol memba bungim K802,000.00

Namba long ol dinau Sosaiti givim K1,671

Hap dinau mani stap long han bilong ol memba K 457,652.00

Strong bilong mani ol memba bungim K1,013,109.00

Sosaiti tokaut long wok bilong givim dinau:

Brukim ol dinau stat long man Jan 99 i go Mas 2000

(a) Ekonomik Developmen - 1020 lons K 371,365.00

(b) Sotel Developmen 425 lons K154,735.00. (c) Ol arapela wok- 226 lons K2,841.00

Bungim olgeta dinau Sosaiti givim long Mas 99 inap Mas 2000 K 618,941.00

Rausim bekim dinau long mun Julai 99 i go Disemba 99 (K 44,713.00)

Rausim bekim dinau long mun Januari i go Mas 2000

(K 116,576.00) Hap dinau mani stap long han bilong ol memba 457,652.00.

Morobe Sevings na Lon Sosaiti

Stia tok "A2000" na kaikai bilong tingting

Mipela ol Bod ov Dairekta bilong Morobe Sevings na Lons Sosaiti i makim pinis Edukesen Komiti. Tripela dairekta na Pablik Rilesen Opisa bilong Sosaiti i kamapim ol memba bilong dispela komiti. Dispela komiti bai mekim na karim aut wok long tok save na givim stia long ol memba. Bai o i mekim dispela wok na yusim redio, niuspepa na TV na tu ol bai yusim stia tok "2000" niuspepa bilong sosaiti long toksave na tu skulim olgeta memba na ripot long Morobe

provins.

Edukesen komiti bilong sosaiti i laik ol memba i mas kisim stretpela na gutpela tok klia long wok sosaiti i wok long mekim long dispela taim stat long Mas 1999 i kam inap long Disemba 1999. Toktok bilong stretim tu bel o tupela tingting bilong sampela manmeri i stap tu long Stia Tok pepa wantaim tingting o plen bilong ol wok bai Sosaiti laik wokim long yia 2000 na ol yia i kam bihain.

Projek na wok plen bilong yia 2000 na ol yia i kam bihain em long:

- Lukluk na bringim benk i go klostu long ol sosaiti memba isnait long ol wanwan distrik;
- Lukluk long helpim ol memba long helpim ol yet long kamapim na strongim wok long Sosel na Ekonomik Developmen long ol asples;
- Lukluk long skulim ol memba long stretpela pasin long ronim bisnis, bihainim pasin na astingt-

- ing bilong God hsuat i papa long olgeta hap graun na ol manmeri;
- Mekim moa wok long skulim ol memba long gutpela rot na stretpela pasin long kisim na bekim dinau;
- Lukluk long helpim ol Sosaiti memba long kamap gut ol Ekonomik projek bilong ol long Agrikalsa Komes na Bisnis Developmen.

Toksave long wok bilong mani long mun Januari i go Mas 2000

Mani i kam insait

Memba putim sia mani
Memba bekim dinau
Olgeta mani kam hait

K384,540.00
K116,576.00
K501,116.00

Mani i go ausait

Memba kisim sia mani
Memba kisim dinau
Olgeta mani go ausait

K 79,572.00
K349,238.00
K428,810.00

Ol polisi bilong sevings na lons Sosaiti

Hia em haphap polisi bilong Sosaiti long helpim ol manmeri husat i laik kamap memba.

Membasip

Membasip em i op long ol manmeri i stap long Morobe na ol manmeri bilong Morobe husat i stap long ol arapela provins.

- Fi bilong kamap memba

K 2.00

- Mak bilong mani long opim nupela akaun K20.00

Toksave long Sevings

- Memba bai kisim pasbuk.
- Pe didaksen long ol wokmanmeri.

Kisim dinau long wanem as?

- Baim skul fi.
- Kago bilong tred stua.
- Baim kopra, kakao na kopi.
- Kisim pis.
- Ol samting bilong wokim haus slip.
- Ol kos bilong planim ol daiman.

- Ol kos bilong baim ol ka na trak.

- Wokim kakaruk banis.
- Ol kain samting bilong wok didiman.
- Bekim ol dinau.
- Baim meri na kos bilong marit.
- Dokta na marasin samting.

Toktok bilong dinau

PLANTI askim na toktok i wok long kamap long pasin na we nupela Sevings na Lon Sosaiti long Morobe provins i wok long mekim. Planti i wok long amamas olsem ol i wok long pulmapim aplikesen pepa bilong kisim dinau na wan tu tasol ol i kisim mani na wokabaut i go long mekim wok bilong ol.

Ol i no save wet planti wik na mun na kisim dinau olsem ol i save mekim long ol bikpela benk. Tu ol bikpela benk i no save givim dinau long ol kastoma bilong ol sapos dinau mani ol i askim long en i wankain olsem mani ol i gat long benk.

Sampela i wok long askim long wanem taim bai Morobe Sevings na Lon Sosaiti bai apim mak bilong kisim dinau.

Ansa bai mipela givim long dispela tok piksa: I olsem: nau yet sapos memba i putim K600.00; em i ken kisim dinau long K600.00; na wanem taim bai sosaiti bai litimapim mak bilong kisim dinau; olsem Sevings i sanap long K600.00 na dinau bai sanap olsem K1,200.00 na antap moa long dispela mak long wan (1) tu wan (1).

Sosaiti i laik tok klia long ol memba na ol man na meri husat i laik kamap memba long Morobe Sevings na Lon Sosaiti, olsem:

(1) Sosaiti i wok long wokabaut yet long wok developmen o mekim ol wok long mekim na kamapim Sosaiti bai

kamap bikpela. Laip bilong dispela wok boi faipela yia, stat long dispela yia 2000 na bai i go pinis long yia 2005.

Long dispela taim Sosaiti bai lukluk na wok long lainim ol memba bilong em long luksave long gutpela pasin long kisim dinau bai famili "o" mama papa na ol pikinini bai ken kisim gutpela skul long dispela dinau mani papa "o" mama i bin kisim long sosaiti.

Sosaiti i mekim dispela tok long wanem lukluk long piksa bilong ol. Olpela sosaiti i no bin kamapim gutpela kaikai. Olgeta olpela sosaiti i bin dai pinis long wanem papa i bin save kisim dinau long laik bilong em yet na famili i no bin kisim kaikai long dispela dinau mani. Pasin nogut tu bilong dispela graun i bin pulap insait long ol dispela dinau ol memba i bin save kisim.

Long ol dispela pasin nogut bilong bipo; dispela nupela sosaiti bai glasim gut ol kain dinau ol memba i wok long kisim; insait long dispela taim bilong wok developmen.

(2) Sosaiti tu i bin lukluk long hevi bilong mani; kantri bilong yumi i wok long bungim long dispela taim.

Olsem na menesmen bilong sosaiti i no bin laik long hariap long putim mak bilong dinau i go abrusim mak bilong mani memba i putim long sevings akaun bilong em.

(3) Sosaiti menesmen i bin luksave tu; long hevi bilong ol olpela sosaiti long pasin bilong givim dinau we mak bilong dinau i bin abrusim mak bilong sevings long ol bikpela namba. Dispela pasin tasol long givim bikpela dinau long memba we sevings bilong em i no bin givim em gutpela as bilong strongim dispela dinau; i bin mekim na olgeta olpela sosaiti i bin pundaun na dai pinis.

(4) Planti memba long ol olpela sosaiti na planti moa memba long sampela bikpela sosaiti long dispela taim i wok long mekim pasin sin long ai bilong God; long kisim dinau long wokim samting olsem peim Skul Fi bilong pikinini; na ol go lusim mani long mekim narapela wok olsem "Hos Reis na pilai long Beting Shop."

Sapos sampela memba long dispela nupela sosaiti i wok long mekim dispela pasin; menesmen bilong sosaiti i mas givim yupela strongpela tok lukaut olsem God papa i wok long lukluk long pasin sin ol dispela kain memba i wok long mekim.

Dispela kain pasin sin bai brukim poket bilong ol na bai i nogat mani long bekim dinau bilong ol.

Blesing bilong God bai lusim man na meri husat i wok long giamanim wok mani bilong em yet.

Benk bilong Papua Niugini

Benk bilong gavman bilong Papua Niugini (Benk of PNG) em i olsem glasman bilong olgeta benk na haus mani bilong kantri. Em i bin tok orait long Morobe Sevings na Lons Sosaiti long kamap olsem benk na haus mani bilong ol manmeri bilong Morobe provins na Lae siti benk ov PNG tu i wok long glasim (audit) ol buk na wok bilong Morobe Sevings na Lons Sosaiti na em bin helpim Sosaiti tu long taim wanpela ka bilong ol wokman long yusim na mekim wok bilong sosaiti.

Toktok bilong stretim man i gat tupela tingting

Menesmen bilong Morobe Sevings na Lons Sosaiti i stap nau long han bilong tupela ekspirens opisa husat i bin wok wantaim Benk ov PNG na tu Federesen ov Sevings na Lons Sosaiti.

Mista Basanu em i Intarim Menesa na Mista Passingan em i Maketing na Pablik Rilesen Opisa Gavman i bin Juksave long tupela na makim ol long lukautim wok bilong Sosaiti, em tupela projek aninit long Komes Divisen long gavman bilong Morobe provins.

Tupela opisa i no bin menesa long ol olpela sosaiti long Morobe husat nau i slip i dai pinis. Mista Basanu i bin traim long helpim Lae Industri Sevings na Lons Sosaiti long kamap gut gen, tasol sik bilong dinau nogut i bin kilim idai olgeta wok.

Wok bilong Basanu na Pasingan long Federesen ov Sevings na Lons Sosaiti i kam inap long 1984 na 1985. Long dispela taim tupela i save glasim wok bilong ol sosaiti insait long Papua Niugini. Wok bilong wanwan Sosaiti long PNG i bin i stap long menesmen bilong

wanwan sosaiti yet na bod ov dairektas bilong ol

Pundaun bilong ol olpela sosaiti long Morobe provins na PNG i bin i stap long han bilong menesmen bilong ol yet. Mista Basanu i bin askim Benk ov PNG long pasim olgeta sosaiti long Morobe provins long 1986, ol olpela Sevings na Lons Sosaiti long Morobe provins bai stat long yia 2001.

Dispela em bai namba tu hap bilong kirapim nupela sosaiti long stretim ol olpela sosaiti long provins. Namba wan hap bilong dispela projek em nau Morobe Sevings na Lons Sosaiti i sanap pinis na mekim wok. Olsem na ol memba bilong ol olpela sosaiti na husat i wok long i gat tu bel long kamap memba bilong Morobe Sevings na Lons Sosaiti i noken sutim nating tok long Mista Basanu na Mista Passingan long bagarapim wok long ol olpela sosaiti.

Ol dairekta yet na ol memba husat i no bin bekim dinau bagarapim wok bilong ol olpela Sevings na Lons Sosaiti.

Pasin bilong sevings

As wok bilong Morobe Sevings na Lons Sosaiti em long kirapim tingting na helpim yu long sevim mani. Na sapos yu wantaim famili bilong yu i bungim o palnim sampela hevi, dispela mani yu sevim i ken helpim yu taim hevi i kamap. Ol kain samting olsem skul fi bilong pikinini na haus sik na ol marasin na wok bientis o haus slip em yu laik stretim na kamapim gut.

Dispela kampani yu wok long an inap helpim yu long katim pe long olgeta insait na salim stret long sosaiti.

Ol wokmanmeri bilong sosaiti bai i ken givim yu stia na gutpela tingting long sevim gut mani bilong yu. Wanem mani yu laik putim long sosaiti em stap long laik na tingting bilong yu yet. Gutpela pasin na tingting em long redim yu yet long kainkain hevi we bai i ken kamap long yu long bihain taim.

Morobe Sevings na Lons Sosaiti em i no bank. Em i wok bung tasol bilong ol manmeri husat i memba.

Dinau

Ol memba husat i soim gutpela pasin long redim em yet, em tasol inap long kisim dinau mani long sosaiti. Hamas dinau memba i laik kisim em i wankain tasol long sevings memba yet i bungim pinis long sosaiti. Yu noken tekewe sea na sevings bilong yu. Kisim tasol dinau na bekim long mak yu long yu inap. Larim sevings bilong yu i wok long sosaiti na yu i ken kisim dividen o win (nteres) mani.

Interes o liklik pe bilong bekim dinau em wan pesen long wanwan mun. Bilong wanwan yia em i 12 pesen (12 pesen).

Nau yet Memba Sevings na Lons Sosaiti i wok long givim planti helpim i go aut long ol pipel husat i wok long kamapim ol gutpela projek long ol komuniti insait ong Morobe provins. Ol helpim olsem lukautim na kamapim ol laipatok samting olsem kakaruk na pik, helpim i go long liklik tred stua na tu saposim long kamapim wanpela skul projek.

KANAGE

"Em
nau,
narapela wik
bilang mi ken"



Kanage em bilong Buka. Wanpela taim Kanage i go salim kopra bilong em. Kopra em wokim inap long 5-pela bek. Ol i go long taun. Ol i kamap long taun nau, na ol i go stret long CMB. Kanage i kirap na askim tambu draiva bilong em. Em hap tasol ya ol i save skelim kopra long en? Tambu draiva bilong em i kirap na tok, tambu ya longlong. Hamas taim ya kam skelim kopra long hia na ya no save yet. Kanage kirap na tok oh, sori tambu mi lus tingting ya. Longpela taim nau mi no wokim kopra na mi lus tingting pinis. Tasol samting tru pestaim bilong lapun Kanage long kam skelim kopra. Turangu tu i no save hau long skelim kopra.

Em nau bilong tupela i go antap nau long skel. Wanpela wokman bilong CMB i kirap nau na askim draiva. Kopra bilong husat. Draiva kirap na tok. Kopra bilong lapun tambu bilong mi ya sindaun baksait long ka. Wokman i kirap nau na askim lapun Kanage, nem bilong ya. Baga kirap na tok 5 bags. Wokman kirap i kilim lap stret long turangu lapun Kanage. Na tambu draiva bilong Kanage i harim tu na i sem nogut tru. Wokman i kirap gen na askim em ken. Hamas bek. Baga kirap gen na tok Kanage. Wokman ya i kilim stret lap. Lapun Kanage i lukim wokman i wok long lap na em tu i kirap na i lap. Samting tru wokman i wok long lap long em na turangu i ting olsem wokman ya i wok long lap nating. Na tambu draiva bilong lapun Kanage i no wanbel wantaim Kanage. Wokman i kirap askim em ken. Namba bilong bek. Baga i kirap gen na tok Solos. Wokman i kirap kilim lap stret gen. Tambu draiva bilong em i no moa toktok. I sem pipia nogut tru. Wokman i kirap askim em ken, ples bilong ya. Baga i kirap ken na tok 6262 em namba bilong kopra bilong em nau. Wokman i lap nogut tru gen. Na ya save tambu draiva bilong lapun Kanage i sem moa yet na kros bilong em i moa moa yet. Taim Kanage i wok long paulim tok pisin bilong en. Taim tupela i skelim pinis kopra bilong lapun Kanage tupela i go bek long ples. Lapun Kanage i kirap na i tok. Hei tambu noks bisi wes bilong 5-bek ya. Bai yumi tupela go spak nogut tru long ples. Tambu draiva bilong Kanage i

harim tok bilong lapun Kanage na em tok em stret mi laik harim kain tok olsem. Tupela kamap long ples na tupela spak nogut tru. Tambu draiva bilong Kanage kirap na tok na ya save wanem samting ya wokim long CMB. Man lapun Kanage ya wokim mi sem nogut tru long CMB long ai bilong planti man taim ya paulim tok pisin bilong

yu. Na nau bai mi pinisim gut tru kros bilong mi long ya. Tambu draiva bilong lapun Kanage i spak nogut tru nau. Baga i kirap holim pas lapun tambu Kanage bilong em long waitgras bilong em na paitim em nogut tru. Turangu waitgras pinis tu na em nogat strong moa. Long dispela taim tambu bilong tupela i bruk na tupela i no save kolim narapela long tambu moa.

Laxstone Maxwell Lahis Lihir Island

Kanage bilong Madang hap long Amele na em i go lotu long haus lotu long wanpela Sande. Lotu pinis na em i bin tingim wanpela meri detim em, na em i wokabout i go na Kanage i no bihainim bikrot stret, em i laik sotkat long bus rot, na em abrus na bihainim rot bilong ol pik. Na long rot bilong ol pik em papa bilong meri detim em ya, i putim trep long kisim pik. Na turangu wali Kanage i bihainim rot bilong ol pik i go na putim lek bilong em i go insait long trep na wantu trep kalap na apim wansait lek bilong Kanage i go antap na wanpela em hangamap kam daun. Kanage tu i pasim laplap tu na laplap i lus kam daun na karamapim pes bilong wali Kanage, na han bilong em i wok sikirapim graun i stap. Na tupela wil i wok long ron nating go kam i stap, na semtaim wanpela wel pik tu i bihainim rot bilong em i kam. Kanage lukim traipela wel pik na turangu em taitim skin na waya bruk na em tekov.

Tom Fulin Madang

Kanage i maritim wanpela meri bilong Hanuabada long hap bilong Papua. Na wanpela taim long nait, yanpela meri bilong em i askim lapun ya, na yupela save long tok tok bilong lapun, em i bekim olsem. A liklik kekeni, ya laik save long stail bilong lapun ya, ok, ya harim.

Nem bilong mi Kaulus Kanage, mi lusman bilong kafe insait long bus bilong Aitape na papa bilong mi Aye, em i bilong tamblo i stap long dambolo. Mama bilong mi sakim, karim mi long Nukum antap long Kurum.

Mi ting em i kaikai nafle na pasim het bilong mi wantaim paia

wud long ale. Rausim mi go slip long minate long painim meri bilong mi long Rawete.

Ha! Shit, mi kaikai taro wantaim paia na mi, man bilong raun, bilong wanem mi man bilong taun. Yu laik kraai orait yu kraai.

I no man of ron, yu no ting long raun, hey meri yu ken luksee, yu kaikai no pipia fo I am no taia.

I am Kanage, yu ting wanem a?

A Frank Madang

Kanage bilong ples Pillo ailan long Kandrien. Paps Kanage wantaim poroman bilong em mangi topras. Tupela stap long Kandrien wanpela yia olgeta long Arove ples. Na tupela kisim olgeta kain tok pisin bilong ol Arove pinis taim em laik tromoi tok pisin i go long mangi topras i rait na i rait olgeta. Tupela paps Kanage laik limlimbur long painim buai long kaikai na tupela i go long gaden buai. Tupela lukim wanpela as bilong buai i karim traipela buai stret. Orait paps Kanage tokim mangi topras bai kalapim dispela buai long tupela bai kisim na kaikai. Ok poroman bilong em i go kalapim buai nau kain tok pisin bilong paps Kanage ya em tromoi tok pisin long mangi topras olsem yu traim selim wanpela buai na lukim mit em i ret o i wait. Taim poroman bilong em i selim buai pinis em lukim singaut i go daun long paps Kanage na tok angel wanem kain buai ya i bulu. Topras laik stailim nek bilong ol kandre ya tasol paps Kanage em paul na sanap olsem diwai. Topras tromoi kain tok pisin krangi liklik bikos em tok ya buai i bulu.

R Mopili Kimbe

Masta Kanage bilong las ples Koyaa insait long Pangia, Sauten Hailans provins. Wanpela taim em pulim ol lain bilong en na i go wokim wanpela nupela gaden long bikbus Tangupane.

Ol i kirap long hap nait yet na i go kamap long dispela hap we ol i laik wokim nupela gaden na ol i stat long wok gaden i go i go inap long san i go daun, na long apinun stret ol i wokabout i kam long ples na yu tingim ol i no kaikai liklik tu long moning taim na hangre kilim ol wansait. Nau ol i kam kamap pinis long haus lain na Kanage siksti i go long stua bilong Eggo Gogo na kisim sampela rais na pis i kam na tokim Misis bilong em long kukim ol kaikai hariap tru bikos em i bagarap tru long hangre. Misis Kanage kukim pinis kaikai na askim Masta bilong em long skelim kaikai bilong ol long kaikai ol i sevim pinis na kaikai gut tru i stap.

Na i no long taim kandre meri bilong Kanage i go raun long Yoka maket na em tu i bagarap tru long hangre na tingting bilong em i sut

i go long haus bilong Kanage na wokabout i go na kamap long haus we ol lain i kaikai gut tru i stap long en. Kanage lukim kandre meri ya na em i kirap tokim em, mi sori tru yu tuleit i nogat sampela kaikai lep i stap bikos, mipela kirap long moning taim tru na i no kaikai na mipela i go wokim nupela gaden long Tangupane na mi kisim liklik kaikai long mak bilong mipela ol famili na em mipela kuk pinis. Em i min long tok skelim o sevim na kaikai pinis ya, nogat tok pisin bilong Kanage i popaia nau na em kirap tokim kandre meri olsem, mi kirap sutim lapun mama pinis, na bihain mi sutim ol pikinini na bihain tru mi sutim tambu meri ya sindaun long hap.

Na kandre, sapos yu kam kamap long taim stret em bai mi inap long sutim yu tu tasol i nogat sampela kaikai bilong mi long sutim.

Taim kandre meri harim kain toktok bilong kandre man Kanage, man skin gras bilong meri ya kirap na em tekov i go long haus bilong en na tingting planti long panim aut wanem mining bilong dispela toktok kandre man Kanage wokim long en.

Neks moning kandre meri singautim Kanage na tokim em olsem, aste toktok bilong yu ya mekim na het bilong mi i paul pinis na yu noken kolim mi kandre meri bilong yu moa, em mi pinis na pinis olgeta na noken na noken kolim mi kandre meri bilong yu.

Taim Kanage harim dispela toktok bilong kandre meri ya man, insait long bel bilong Kanage i paia na het bilong em raun olsem masin na amamas i no isi na lap i dai bikos nem kandre na kandre meri bai pinis long em.

Em kirap na tok, i orait kandre yu ken pinis long olgeta samting yumi bai i stap long Koyaa we mama i bin karim yumitupela long en. Na bihain Kanage putim han long baksait bilong em na wokabout i go long haus.

Ali Koremah Kainantu

Kaunsel Kanage bilong Sepik. Wanpela taim em go raun long Lae siti. Wokim soping bilong em na baim tu wanpela katen. Go sindaun long hap em save long en, na dring i stap. Pinisim 18-pela kalap long PMV bas wantaim ol samting na 6 peks. Ron long Makam Veli yet kam kamap long Wota Rais nau sampela pasindia go daun na sampela go antap. Kanage sindaun yet bilong go lukim Madang so. Kanage sindaun tromoi ai i stret long poro bilong em, holim sipsip na sanap wetim trafik long krosim rot. Bagaros Kanage holim 6 peks na kalap go daun. Go sekhan long poro na givim 6 lus ken. Poro tu i stori olsem em go raun painim mumut arere long wara ramu na mauten sait. Ok Tupela tok pilai

sekhan na kaunsel Kanage kalap long bas. Poro bilong Kanage amamas na tromoi hap toktok.

Bara kaunsel Kanage, tenkyu long 6 ya na nogut popaia long en bai plis retolim yu na senisim nus pes bilong yu, na sori bilong mi long yu bai mi kam rausim maus gras bilong meri bilong yu. Turangu ol lain insait wokim nois pes bilong yu, na sori wanbel em bel kaskas bik maus go bek. Semtaim tu braiva putim fes giya na bas i mov liklik.

Kanage singaut na bikmaus go bek. Yu ya, daunim dispela 6 na noken go painim mumut. Karim sipsip na go long haus stret, tokim meri bilong yu bai wasim sangana bilong yu na yu winim ia bilong em. Bihain yu wokabout i go ausait long varanda na go ap i go antap long mau popo diwai olsem bilak bokis na hangamap, i go inap san kam antap long het bilong yu na mun i go daun long baksait bilong yu.

Poro i no wanbel na laik brukim 6 peks long kolta tasol nogat kwik taim Kanage wispa gen long poro, meit! mani tok na 6 i stap long han bilong yu, karim i go long haus.

Poro givap olgeta. Mekim nau tromoi sipsip na misim Kanage sindaun baksait long PMV long taim yet, lek pas long as bilong Kanage na das kirap long baksait taiya.

Maddii Roth Kiunga

Kanage em bilong ples Kumbatop insait long WHP. Em i man bilong soim vidio long ol manmeri. Wanpela taim em i go raun long Wainda Bingo maket na em i bungim tupela yangpela meri. Na 3-pela i raun raun i stap olgeta kona long Wainda Bingo maket i bihain liklik 3-pela manmeri laik bruk nau.

Kanage i askim tupela meri, yutupela bilong wanem hap stret ya? Na tupela meri bekim Kanage olsem, sapos yu laik save long mitupela orait yu ken bihainim bikpela haiwe i kam daun long ples Yambolomapeta na save long mitupela. Em ples bilong mitupela save stap long en. Man Kanage ting em bai maritim tupela ya. Apinun olsem 7 kilok. Kanage isi tasol wokabout i go daun long haus bilong tupela meri ya. Na tupela meri lukim paps Kanage wokabout i kam klostu long haus bilong tupela na tupela i singautim ol manmeri olsem wanpela stilman laik stilim pik bilong mipela na em i kam i stap baksait long haus, kam lukim pes bilong em na yumi kotim em long neks moning. Man Kanage isi tasol sanap baksait long haus na em i tok Inglis olsem, two ladies don't trick me and misusing me up and down on the highway road. Man paps Kanage lusim tupela meri na em i go hait long bik bus. Neks moning

• I go moa long pes 26

CATCH THE ACTION!

SP CUP

OUR GAME

SP

KANAGE



I kam long pes 25

em i no moa toktok wantaim tupela meri gen.

Pundu Yatena
Baiyer River, WHP

Kanage i bilong ples Yifkindu. Na wanpela taim wanpela waitman husat i bin poroman na masta bilong em long taim yet, i kisim em na i go long Cairns long Australia. Taim tupela stap pinis long hap. Kanage i lukim planti samting we i nupela long em.

Tasol olgeta samting em i no bisi tumas. Tasol taim em lukim ol stori biling (sky scrapers) man em wok long tingting tasol long hau ol biling na amas tru bai ol i salim long Kina.

Tupela stap i go na masta bilong em rentim 15 room o flats long dispela sky scraper. Wanpela mun i go na Kanage go bek long Yifkindu, na em kilim long stori long wanem samting em lukim long Cairns. Na stori bilong em i go olsem. Man long Cairns mi lukim wanpela haus. Na haus ya i antap, na antap, na antap tru ya. Klostu tasim skai ya na i mas wan mita samting ya, na bihain ol salim na masta bilong mi

baim long taunsen, na taunsen, na taunsen na i mas 2 handret o 3 handret samting.

Willie Mosong
Nuku

Kanage i bin wanpela ti boi bilong Nuku lokol gavman kaunsel na wanpela taim, miting bilong ol kaunsel i kamap na Kanage i

kisim junia bilong em long helpim em long baterim ol bret. Tupela i wok i go na pekpek i kilim Kanage na em ron i go long tolet na planti wok i stap yet na klostu bai belo, olsem na Kanage hariap i go bek long wok. Na taim tupela bisi wok i stap junia i lukim sampela samting i pas long pointa bilong sinia bilong em na em i tok, sinia em wanem ya pas long finga ya? Na sinia hariap tru putim finga i go insait long maus, na spet wantaim na tok woi! yo! mama! Laki tru na mi no smelim pekpek ya na em trautilm olgeta kol saksak.

Willie Mosong
Nuku

Kanage lusim meri bilong em long ples biknem Sepik na go lokol turis long Kiunga insait long Westen provins. Wanpela wiken em bungim ol mangi Jtoks na kisim plen long go raun daun flai riva. So ol i go kem, painim pisin, huk insait long wanpela suwam ol i kolim pasis. Ok ol bisi stret nau tudak i kisim ol. Olgeta go bek long kem long wanem hap ol raun. Ol kuk kaikai waswas pinis nau, Kanage kisim tingting na tokim ol mangi long digim wesana wanwan na go insait. Bihain

karamapim ol yet gen wantaim wesana na lusim spes bilong tupela ai, maus na nus long kisim win isi isi long slip.

So plen i kamap na tulait bruk long skin. Kanage sikirap long huk, bikos planti pulings. Kanage tromoi lain (huk) na holim hap pising lain long left han na giaman sindaun isi long wesana. I no long taim toilet i kilim em. Tasol em les long lusim huk na go longwe. Bara em wokim sitings long hap na olgeta pis, peks, na kaps blo long laik, long hap.

Ol mangi slip faiv mitas baksait. Pising lain tu pis pulim na hariap tasol tromoi rait han kisim lip na wokim dispela, yu save. Tasol em i no tromoi hap i gat pekpek bikos, pis wok long pulim left han ya.

Sori tru mekim na lustingting kwik wan putim lip ya long maus na kaikai strong wantaim tit bilong em, na wokim wok bilong em long pulim pis. Kanage tromoi pis i go long wesana na lukim ken pis ya liklik stret. Kanage les long en, tanim na lukim olgeta mangi kirap pinis na wok long lukluk long olgeta muvmen em wokim pinisim. Taim em tanim na putim han long maus. Olgeta mangi dai wansait isi isi i stap.

Kanage tu tok pinis olsem saut bai kamap long wota fran tasol abrus, em go long Kiunga jenerol haus sik. Ol woklain wok long pamim tiup long nek wantaim ais wara inap fotin deis.

Taim Kanage kamaul long haus sik long en. Em giamanim ol mangi olsem, em long maus ya na yu ken bosim wanpela nes meri long haus sik na kaikaim maus wantaim em.

Maddi Roth
Kiunga

Paps Kanage bilong Hauwinda vilis insait long SHP. Tasol em save prenim wanpela meri Paka susa ya em gret 9 long Paka hai skol. Tasol tupela save hait na gris i stap.

Long wanpela Sarere em i go maket long Paka na ai bilong Kanage i go pas stret long skol meri na Kanage small tasol na meri ya tok mi kus olsem na mi laik i go long haus sik. Taim Kanage harim tasol bringim skol meri i go long haus sik.

Taim dokta askim na Kanage kirap na tok skol meri wari i go i go na em bagarap tru ya sekim em. Ol dokta kilim skin long lap.

Nelson Koyawa
Hauwinda

Kanage em mangi Waing long hap bilong Morobe. Wanpela taim Kanage wantaim meri na tupela pikinini man na meri i laik go long Sepik. Olsem na ol i kalap long Momase na ol i go kamap namel long blu si na bikpela win na ren i bagarapim ol.

Na ol manmeri i pret nogut tru long dispela win na ren. Olsem na Kanage kirap na tokim olgeta manmeri olsem. Yupela i noken pret. I am going to ask big Lord to helpim yumi.

O bikman, sapos yu wokim na win karim ol kago bilong mi i go em mi no wari, na sapos yu wokim na win i karim tupela pikinini bilong mi i go, em mi no wari. Tasol bikman mi laik tokim yu long dispela taim sapos yu wokim na win i karim meri bilong mi i go. O sori bikman bai yu lukim bikhet bilong Kanage bai nogut tru.

Komi Guraks
Lae

Kanage em bilong Pongia, Yalibu, Mendi, Sauten Hailan provins. Em i wanpela lain baga, i save laik waswas klostu, klostu. Wanpela gutpela Sarere moning em tokim tupela ankel bilong en, Hery na Beny.

Hery em hapkas mangi Sandaun, Aitape, Beny em ankel tru tru bilong Kanage.


Kanage wantaim tupela baga ankel ya tripela i kukim, siksti wokabout i go long wara Yaraporo. Kanage i stat long mekim stori long tokples bilong en. Ankel Hery i no klia liklik long wanem stori Kanage i mekim. Em kirap na askim Beny.

Ankel bilong Kanage i tokim em long inglis yu say what, I say what, he say what, baga Aitape i tokim ankel bilong Kanage, em laik waswas ya i tokim Kanage long wasim nau.

Kanage i kalap i go insait long wara na em i stat long bikmas. O o o o m m m mangi Aitape askim ankel bilong Kanage long sekim Kanage watpo na em i singaut krangi.

Kanage yet i kam ausait long wara na tokim ankel bilong em. Tokim mangi Sandaun, em i noken tingim olsem tupela drai kokonas i no pilim amamas long wanem, wanpela mangi Pangio ya em tekov i go insait olgeta i nogat we o i gat we long kam aut. Mi yet Kanage mi no klia nau. Em bai trouble.

Bata Ruan
Mendi



Stretim tok bilong Caspa Animo

Dia Edita,

PLIS givim mi wanpela hap spes olsem bai mi ken sapotim brata bilong yumi Leo Niawave bilong Wewak, pas bilong em long Jun 1, 2000 i bekim wanpela pas bilong Mista Caspa Animo bilong Aitape na pas i tok olsem, Pop, Bisop, Pater i no inap rausim sin bilong yumi.

Brata Animo, Jisas i kam daun pinis o nogat? Sapos Jisas i kam pinis, bilong wanem Jisas i dai? Sapos yu laik bai Jisas yet i harim wanwan sin bilong yu, bilong wanem Jisas i go bek long Heven kwik? Jisas i mas go bek long heven, em (Jisas) yet i ken opim dispela dua, God i pasim long taim tupela tum-buna bilong yumi (Adam na Eve) i pasim long pasin bilong sin o bikhet. Karim pen, dai na kirap bilong em (Jisas) dispela em i mak bilong God yet i marimari long yumi.

God papa i laik bai dispela wok bilong autim Gutnius na wok bilong marimari na fogiv i mas go het, olsem pikinini bilong God (em Jisas) i skulim na soim ol aposel pasin we God papa bilong em (Jisas) i laikim.

Brata Animo, bilong wanem

Jisas i kisim 12-pela aposel? Taim Jisas i wokabout yet long graun (Galili), Jisas i go raun na toktok tasol, nogat tru brata, em (Jisas) long san em i toktok long ol manmeri na long nait em save lainim na skulim ol 12-pela disaipel bilong em long mekim wok tu, i no long skul tasol.

Long dispela pasin, wok bilong kisim olgeta manmeri i mas go het. God i soim yumi (10) tenpela lo, bilong yumi luksave olsem bai yumi ken abrusim sin. Na sapos yumi i no abrusim, em yumi mekim sin pinis. Yumi i no inap long go long heven. So yumi lukim, God i laikim yumi tumas, pikinini bilong em, olsem em i salim wanpela pikinini bilong em (Jisas) bilong soim yumi ol kainkain rot bilong kisim laip bilong oltaim.

Oltaim Jisas i bihainim laik bilong papa bilong em na long dispela, Jisas i laik bai wok bilong papa bilong em bilong kisim olgeta manmeri i go long heven i mas go het inap long dispela graun i pinis. So yumi lukim Jisas i kisim 12-pela aposel. Em i skulim na soim ol kainkain wok bilong helpim yumi long go long heven. Jisas

i givim pawa long ol. Sapos yumi lukluk gut long baibel bilong yumi, yumi ken save i gat 7-pela bikpela rot bilong kisim grasia o laip bilong God.

Jisas yet i givim dispela pawa o strong long aposel bilong givim laip o grasia i go long manmeri (em yumi). Jisas i anointim ol aposel na ol aposel i anointim ol bisop na ol bisop i anointim ol pater. Dispela pawa bilong helpim yumi olgeta bilong kisim marimari bilong God, em i laip o grasia i mas go het, maski Jisas i no stap (long mak bilong bodi).

Jisas i tok, mi go tasol bai mi salim wanpela helpim, dispela helpim em Holi Spirit. Jisas i kamapim ol wok, na Holi Spirit i papa bilong dispela ol wok. Ol dispela wok em ol sakramen na i gat 7-pela tasol. Em i rot bilong kisim grasia o laip bilong God.

Yumi bagarapim o brukim wanpela bilong 7-pela bikpela rot bilong kisim grasia o laip bilong God, em yumi i no bihainim olgeta laik bilong God. Yumi mekim bikpela sin long God Holi Spirit.

Laki tru, Jisas i kamapim rot bilong konfesio na givim pawa

long Pop, Bisop na Pater long kisim ples bilong em, bilong harim na kaunselim na fogivim yumi. Laki moa, moa yet, Jisas i givim bodi na blut bilong em yet long mak bilong bret na wain, ol Pop na Bisop na Pater i kamapim gen na gen long Santu Misa long olgeta de. Em i we tru bilong kisim laip bilong oltaim. I nogat wanpela manmeri o pikinini long wol inap long kisim ples bilong Jisas o God papa o God Holi Spirit bilong senisim dispela pawa.

Jisas i no inap tru bihainim laik bilong yumi na brukim em yet long hap hap bilong inapim olgeta laik bilong wanwan sios i kamap nau. Jisas i no tok em bai brukim sios bilong em na kamapim moa moa sios. Husat i gat rait long raitim na senisim ol mining tru bilong tok i tru? Man bilong graun i kamapim tingting bilong senisim baibel bilong kirapim kongriksen bilong givim em mani na kamapim biknem bilong em yet. God i mas kam las a? Brata Caspa Animo yu bekim na mi bai mi harim. Tenkyu. God i blesim yu.

Andrew Frank Madang

Daunim prais bilong ol pikinini

Dia Edita,

Mi laik autim bel hevi bilong mi i go long Wantok niuspepa na pablik ol i ken lukim. Mi yet memba bilong Luteran sios mi noken komplem long arapela siping kampani. Luteran Siping em i no i kam long karim ol bisnis manmeri na ol pikinini. Lusip em i kam long nem bilong Luteran memba inap long daunim prais bilong skul mangi na liklik mangi ol i no save wok mani ol i kisim mani we na baim sip.

Rabaul, Lae K88 Kimbe, Lae K60 liklik pikinini K50. Dispela em antap inap sotim i go daun mi no komplem long bikmanmeri em stret yupela makim prais bilong baim tiket turangu skul pikinini wantaim liklik mangi ol i no wok mani mi laik askim yupela man bilong salim tiket bipo yupela i stap long skul na kisim mani tu olsem na baim tiket long bikpela mani long skul mangi.

Lusip i kam long nem

bilong Luteran manmeri pikinini man bilong bosim sip yupela i no marimari na sori long Luteran sios na nara-pela sois na apim fi i go antap long ol pikinini em i nogut. Matin Luta i no stretim rot bilong bisnis em i stretim sios bilong Jisas Kraus.

Kristen manmeri i stap sip tu kam long nem bilong kristen manmeri pikinini i no gutpela tumas apim fi bilong skul pikinini na pikinini i go antap yupela apim fi bilong sip i go antap em yupela wokim rot bilong birua i kam insait long opis na ples bilong salim tiket. Olsem na lukluk gut na salim tiket bilong ol pasindia mipela hamamas tru long nupela sip Manigulai kam long nem bilong ol kristen manmeri tasol nogat tanim bek kolim bisnis siping kampani. Em tasol yu kristen manmeri husat i laik sapotim o egensim rait tasol kam long Wantok niuspepa.

Elem Amut Naum Kimbe

Okapa rot bagarap tru

Dia Edita,

Mi wanpela man long Okapa insait long Gimi tasol nau mi stap long Mosbi na mi laik autim wari bilong mi stret long Wantok niuspepa.

Rot namel long Kuru maunten na i go daun long Gimi em bagarap olgeta na i hat long ol PMV i ron long dispela rot na hat long ol manmeri i kisim sevis.

PMV dropim pasindia long Homu na Kuru maunten na ol wokabout i go kamap long Gimi long traipela ova nait na taim ol i laik i kam long Goroka, wokabout i kam na kisim

PMV long sem ples Homu o Kuru maunten.

Okapa open memba Casten Maibawa plis yu rausim ai glas na opim ai bilong yu na lukluk long Gimi rot. Sapos yu givim baksait yet plis noken kempein i go insait long yia 2002.

Em tasol na husat man i laik sapotim o egensim bai mi lukluk long Wantok niuspepa.

David Sanebo Port Moresby

Sekim blut pastaim long marit

Dia Edita,

PLIS inap yu putim wari bilong mi insait long Wantok niuspepa na ol arapela i ken lukim na ridim.

Mi wanpela mangi long ples tasol mi harim long radio, lukim long TV na ridim long niuspepa olsem sik Aids i pulap long kantri bilong yumi. Na planti manmeri i kisim sik Aids na ol i dai pinis. Namba bilong ol manmeri i dai i go antap inap 2,342 samting. Ol saveman na ol saintis i hat tru long painim ol marasin bilong kilim sik Aids na ol manmeri i dai olsem pik na dok.

Olsem na wanem rot bai yumi i abrusim dispela sik nogut. Namba wan rot em yumi mas

tingim bikpela God pastaim, na lotu long em i ken helpim yumi na yumi ken stap gut long kantri bilong yumi PNG.

Namba tu rot, em ol yangpela manmeri i mas i go lukim dokta pastaim na bihain ol i ken marit.

Long wanem sik Aids i save kamap long pasin bilong ol manmeri i save pren na raun long dispela as tasol na sik Aids i kam insait.

Olsem na mi askim gavman bilong yumi long PNG i mas putim wanpela lo olsem. Taim ol yangpela manmeri i laik marit orait ol i mas go lukim dokta na sekim blut pastaim na bihain ol i ken marit.

Sapos gavman i no putim wanpela lo olsem, atiang kantri bilong yumi bai kamap olsem, wanpela kantri long Afrika na sik Aids bai kisim olgeta manmeri na pikinini na bai dai na graun bai stap nating. Mi gat bikpela wari bilong laip bilong man na mi rait i go long Wantok niuspepa na ol arapela i ken lukim na tingim tu.

Em tasol na husat brata o susa yu laik sapotim o egensim orait rait tasol i go long Wantok niuspepa na bai mi ken lukim.

Dickson M Mt Hagen

Pogo i helpim ol Is Sepik na Sandaun pipel

Dia Edita,

Mi wanpela mangi (Yifex) Nuku long Sandaun provins husat i save ron long Sepik haiwe olgeta taim na i save kisim taim long rot taim ka i pas na i save slip hangre nating namel long dispela Sepik haiwe.

Tru tumas i gat planti pipel bilong Sandaun long tupela distrik bilong Lumi na Nuku i save kisim helpim long developmen bilong tupela long dispela Sepik haiwe tasol.

Lumi na Nuku i bung long Wewak tasol na olgeta prodaks bilong ol i save i go long Wewak, na taim rot i

bagarap inap olsem 10-pela yia nau. Wokim na ol pipel bilong dispela tupela eria i kisim taim tru.

Olsem na nau mi laik tenkim yu tru Mista Pogo Honorable Minista bilong Woks. Na mi hop dispela K2 milion bilong yu bai i inapim tru wok long rot stat long Wewak i go inap long Mai rot bung.

Tenkyu tru Mista Pogo na papa God long heven i blesim yu na inapim yu long wok ministri bilong yu.

Villzie Chrezes Mosong Sandaun

Saut Wosera kaunselasela mas mekim wok

Dia Edita,

Mi wanpela mangi long ples Nangda, na nau mi i stap yet long ples.

Mi i gat bikpela wari tru long pipel bilong mi, long Saut Wosera, long sampela kain senis, olsem rot, bris, skul na aidpos bilong mipela.

Mi save i stap long ples na mi lukim ol kaunselasela i save raun nating long ples, na taun bilong yumi long Maprik na Wewak, i nogat wok bilong ol stret. Ating nesenel gavman i no save wokim baset bilong olgeta LLG long PNG, em i stret? Sapos i gat baset inap long mipela i senisim ples. I luk olsem, dispela save o namba yu kisim long save bilong yu, na pipel i no makim yu. Yu kisim dispela namba long save bilong yu, long kisim tu o tripela meri na wokim tu kina tasol, "laka". Sapos yu i no fit long lukautim pipel bilong yumi long ples orait, yu risain tasol. Plis traim senisim ples bilong yumi na pipel bilong yumi bai amamas liklik. Em tasol liklik wari bilong mi, na husat i laik egensim o sapotim mi, em welkam tasol.

Christopher Jalina South Wosera, East Sepik

Rait distrik menesa long Telefomin

Dia Edita,

Mi wanpela grasrut man long ples BKS long Telefomin distrik. Nau mi laik putim aut liklik wari bilong mi i go long Wantok niuspepa.

Long makim maus bilong ol pipel bilong Telefomin distrik. Mi toktok long Mista Nenes Wurin em wanpela rait edminista long Telefomin distrik. Em ken wokim planti senis insait long Telefomin long taim bilong en. Bipo ol

distrik menesa i no wankain olsem Mista Nenes Wurin.

Ol save paulim mipela na ol i no wok wankain olsem Nenes Wurin. So mipela laik Nenes Wurin mas i stap edminista long Telefomin distrik yet. Bikos em rait distrik menesa. Em tasol.

Fifin Iliin BKS, WSP

Sapos yu laik salim pas bilong yu i kam long dispela niuspepa. Salim i kam long dispela adres:

THE EDITOR
WANTOK NEWSPAPER
P O BOX 1982, BOROKO, NCD.

Oksapmin laikim gutpela lida

Dia Edita,

Mi wanpela grasrut long ples BKS. Mi save harim hevi long ples na nau mi laik putim aut dispela wari i go long wanpela niuspepa.

Plis ol pipel bilong Oksapmin, yia 2002 nesenel ileksen i kam klostu. Yupela mas pasim toktok na wanbel na makim wanpela man tasol. Bikos yumi save hat tumas long tupela top-up skul na olgeta arapela komyniti wok long ples. Plis yumi i noken longlong na paul olsem ol bebi. Yumi man na meri olsem na votim rait man long yia 2002 nesenel ileksen. Olsem toktok tasol mi tok na save stap long yumi wanwan.

Em tasol God blesim yumi.

Andrew Iliin West Sepik

Peter Barter raitman

Dia Edita,

Mi gat sampela tingting i laik autim long publik na tu ol pipel bilong Madang, olsem ol pipel bilong Madang i noken ai pas tumas, olsem mi yet mi no bilong Madang, mi bilong Simbu provins.

Tingting na lukluk bilong mi i olsem, mi lukim Peter Barter em i wanpela raitman tru ol pipel bilong Madang i noken ai pas long en, ol i mas opim ai na lukluk long sevis em i save givim.

Olsem long ples we i nogat rot bilong ka o bot em (Peter Barter) i yusim elikopta na sip bilong em long helpim na bringim sevis i kam long yupela. Dispela stori mipela ol

PNG i lukim long niuspepa na harim long radio tu, na mi tingim em wanpela raitman we ol arapela politisen, Jim Kas, ol pipel bilong Madang i mas opim ai bilong ol na lukim.

Yupela ol pipel bilong Madang i mas lukluk, maski bratasusa o wanblut, wantok tru sapos em i no fit olsem Misat Barter orait lus tingting long em. Sapos Mista Barter i stap long Simbu em bai wanpela man i no inap salensim em.

Na tu yumi ol manmeri na pipel bilong PNG yumi nidim kain man olsem Mista Peter Barter long bringim sevis tru long ol manmeri

insait long bus ples long olgeta provins long PNG.

Sapos PNG yumi i gat presiden sistem bilong vot, Pais Wingti, Sir Michael, Sir Julius, Sir Rabbie na ol arapela bai kaikai das bilong Peter Barter.

Mi askim yupela pipel bilong Madang, husat em raitman bilong Madang na tu Momase?

Em tasol husat man o meri i laik egensim o sapatim plis yu welkam tasol, bai mi amamas long lukim pas bilong yu.

**John M. Aina
Port Moresby**

Gavman lusim mani long bisnis haus

Dia Edita,

Mi laik autim tingting bilong mi long PNG. Mi lukim gavman haus long Waigani.

Em bikipela haus bilong PNG gavman. Tasol olsem wanem na dispela haus em i stap nating? Long dispela as gavman em i save lusim mani long bisnis haus na em i no lukautim mani bilong PNG.

Orait husat manmeri wok long dipatmen yu mas save dispela wok em wok bilong gavman, na gavman em husat na yu wok long pilai mabol gem.

Wan wan dipatmen yu raun olsem pamuk meri na sot win long gavman haus.

Na mi lukim gavman em lusim bikipela mani i go long bisnis lain, na dispela em i no gutpela pasin bilong gavman.

Na wan wan dipatmen i mas i go bek long sentrel gavman opis long Waigani na lukautim samting bilong Gavman.

Dispela toksave i go long papa bilong kantri, Praim Minista Sir Mekere Morauta.

**Ben Kenori
Mosbi**

Stretim Tinputz na Salu rot

Dia Edita,

PLIS yu givim mi dispela taim long lukaut long public long wanem samting i wok long pasim ol sevis insait long Tinputz na Selau eria. Mi laik komplek long dispela rot bilong mipela we i bagarap nogut tru gen long dispela lain bilong ren.

Ol pipel bilong Tinputz na Selau na tu ol arapela man i win dispela rot ol i no hamamas tru long wanem dispela bagarap bilong rot i wok long pasim tru ol sevis long wan wan eria. Ol sumatin tu i save painim hat tru long kam bek bihain long ol holid bikos i nogat planti ka i wok long ron.

Las wik taim mipela wok long kam long taim ka i kalap long traipela hol wara namel long rot na i pas olgeta. Ol draiva ol i no amamas tru bikos ol ka bilong ol i wok long bagarap nambaut.

Mipela i no save nau long wanem taim bai dispela rot i orait na mipela i no save husat bai helpim long wokim dispela rot. Dispela bagarap bilong rot i wok long holim up ol wok kamap long ailan tu.

Nau ol pipel i nidim helpim bilong gavman. Mi ken tingim bek long taim bilong ileksen long 1997 dispela rot em i wanpela samting ol memba nau i stap ol i bin promisisim ol pipel ol i wokim. Tasol taim ol i kam pinis long Mosbi ol i lustingting olgeta pinis.

Long lukluk bilong mi long wok kamap i wok long kamap long ailan em i wok long kamap long kam bilong ol Ausaid. Olsem wanem na Ausaid i wok long kamapim ol dispela wok taim ol gavman bilong yumi i wok long lukluk nating. Yumi mas sem long dispela nau ol lida.

Nau ol pipel i laik bai gat senis i kamap long dispela rot tru long gavman. Noken hait bihain long ol Ausaid.

Sapos nogat samting i kamap bai dispela rot i bagarap moa yet na bai stop sampela wok kamap long ailan na bai ol pipel i nogat konfidens long gavman na ol lida.

**Brian Kikira
Tinputz, Bouganville**

Robert Nagle yu stap we Mul, Baiyer, Lumusa painim yu

Dia Edita,

Mi wanpela mangi Kolo Kyaimanda i insait long Lumusa distrik long WHP tasol nau mi stap long wanpela liklik ples Saut Polapeta. Mi laik putim bel hevi bilong mi i go long memba bilong Mul, Baiyer, Lumusa open Robert Nagle.

Klostu long 2002 na mi no lukim wanpela han mak bilong yu long Mul, Baiyer, Lumusa distrik. Mi laik autim bel hevi bilong ol Lumusa pipel i nogat gutpela rot long Baiyer, Lumusa na Kyaimanda rot i bagarap i nogat gutpela aidpost.

I nogat gutpela skul, olgeta samting i bagarap planti manmeri i dai pinis long pait bilong lain Kolo yet, olsem na mipela ol pipel bilong Baiyer, Lumusa, Kyaimanda laikim sevis olsem rot, bris, skul na aidpost. Olsem na yu memba Robert Nagle noken stap planti taim long Mosbi tasol. Taim mipela votim yu long 1997 ileksen na yu go long palamen, mipela i no lukim wanpela sevis i kam long han bilong yu na nau yia 2000 i kamap. Yu kisim memba long vot bilong mipela ol Baiyer, Lumusa pipel orait lusim Mosbi na kam givim sevis long mipela. Wanem taim bai yu givim sevis long ol manmeri bilong Baiyer, Lumusa na Kyaimanda.

**Jopa Supa
South Polapeta, WHP**

Stretim tok bilong Steven Holland

Dia Edita,

PLIS givim mi hap spes bilong Wantok niuspepa, olsem bai mi bekim wanpela pas bilong turanga brata ya, Steven Holland long Wantok niuspepa long Me 4, 2000, i toktok long askim memba bilong Aitape Lumi, Eddy Saweni na yusim mani bilong RAPF na baim olgeta olpela (lapun) kaunsela bilong Siau lokol gavman (Aitape) na Wape lokol gavman (Lumi).

Brata bilong mi, bai yumi larim o tokorait long wanpela memba bilong yumi bilong Sandaun long kamapim kain tingting olsem?

Ating yumi bikman bilong Sandaun kamapim kain tingting bilong bagarapim publik mani bilong pipel. Na i luk stupid long tromoi publik mani i go long pekpek na lukim stret long ai bilong yumi olsem tupela lapun taun bilong bipo i go bagarap na rabis stret. I nogat gutpela senis i kamap. Yumi i gat bikipela wari o nogat, brata Steven?

Ol memba bilong Aitape bipo na bilong Lumi bipo ol i yusim tu o nogat? Sapos ol i gaf, watpo Aitape na Lumi i go bagarap nau na i gat planti wari nau.

Olsem tu long Nuku, i nogat senis yet. Na bilong wanem Andrew Kumbakor i yusim publik mani long helpim wanwan man (ol lapun kaunsela). Em i olsem bilong kamapim biknem bilong em yet na Sandaun provins i nogat.

Nuku pipel tu i laikim sevis na senis, ol tu i laik lukim gutpela samting i kamap i no long lukim minista bilong gavman i kamapim stupid tingting bilong em.

Sampela memba bilong yumi, olsem Eddy Saweni i traim hat long painim sampela kain mani olsem RAPF na arapela mani moa na bungim inap long mak, we bai ol i ken kisim gutpela kontrakta long wokim na pinisim gut rot. Namba wan tingting bilong yumi Aitape, Lumi na Nuku, yumi laikim gutpela rot sistem. Bikos, mipela pipel i yusim gutpela rot bilong senisim taun na ples bilong yumi na i no memba bilong yumi, nogat. Wok bilong em tru, bilong tokim gavman wanem wari yumi i gat.

Brata, moabeta yumi mas sanap na wok bung wantaim memba bilong yumi, Eddy Saweni long traim strong long kirapim na senisim tupela lapun taun bilong bipo, Aitape na Lumi i go het.

Tingim, Aitape taun, nau i gat bikipela hevi o wari i stap na memba bilong yumi Eddy Saweni i painim mani long stretim. Dispela em i wanpela wari i ken stopim developmen na ron bilong Aitape. Brata, yu laik bekim plis mi laik long lukim God i blesim yu na famili bilong yu.

**Andreas Frank
Lumi**

Dispela tok salens i go long eks-memba Mista Fliex Tapineng

Dia Edita,

INAP yupela givim mi long wanpela spes na nau mi putim aut dispela wari i go long Wantok niuspela.

Mi laik tokim yupela ol pipel bilong Oksapmin. Mi ken tokim yupela wankain olsem ol bebi tingting. Yupela i gat long en. Yupela i gat sotpela tingting tasol. Na yupela i no inap tingting long bihain taim bilong yupela. Plis dispela kain ol tingting yupela i gat long en ya. Traim na senisim o lusim.

Plis ol pipel bilong Oksapmin. Hau na yupela laik sanapim o votim gen dispela eks-memba bilong yupela Mista Fliex Tapineng. Em i bin stap long haus palamen inap long 10-pela yia na em i no wokim o em i no kisim ol sevis i kam insait long Telefomin

distrik. Hau na yupela Oksapmin laik sapatim o votim ol dispela kain eks-memba olsem ol bek bensa o bilasim nating haus palamen long Mosbi. Plis ol pipel bilong Oksapmin. Traim na yusim gut het bilong yupela na makim wanpela rait man long yia 2002 nesanel ileksen. Ating luk olsem Mista Fliex Tapineng mas developim Oksapmin long 10-pela yia bilong en. Nau na yupela laik sanapim o votim em gen. Bikos Fliex Tapineng i developim Oksapmin long 10-pela yia bilong en.

Ating em tasol na God bles.

Plis husat brata na susa i no wanbel o yu wanbel orait welkam na rait long Wantok niuspepa. Bai mi amamas long lukim.

**Apte Dopell
WSP**

Saut Wosera kaunsela mas mekim wok

Dia Edita,

Mi wanpela mangi long ples Nangda, na nau mi i stap yet long ples.

Mi i gat bikipela wari tru long pipel bilong mi, long Saut Wosera, long sampela kain senis, olsem rot, bris, skul na aidpost bilong mipela.

Mi save i stap long ples na mi lukim ol kaunsela i save raun nating long ples, na taun bilong yumi long Maprik na Wewak, i nogat wok bilong ol stret. Ating nesanel gavman i no save wokim baset bilong olgeta LLG long PNG, em i stret? Sapos i gat baset inap long

mipela i senisim ples. I luk olsem, dispela save o namba yu kisim long save bilong yu, na pipel i no makim yu. Yu kisim dispela namba long save bilong yu, long kisim tu o tripela meri na wokim tu kina tasol, "laka". Sapos yu i no fit long lukautim pipel bilong yumi long ples orait, yu risain tasol. Plis traim senisim ples bilong yumi na pipel bilong yumi bai amamas liklik. Em tasol liklik wari bilong mi, na husat i laik egensim o sapatim mi, em welkam tasol.

**Christopher Jalina
South Wosera, East Sepik**

Jim Kas na George Wan nogat maus long palamen

Dia Edita,

Mi wanpela maus man bilong Bundi mi i kam long Mosbi na mi i go long miting bilong Nesenel Gavman long palamen. Foapela taim olgeta mi go lukim ol dispela miting na mi lukim Gavana bilong Madang Jim Kas i stap isi tasol na nogat maus long toktok na mi lukim i no stret.

Mi wantaim ol pipel bilong mi i pasim vot long 1997 Nesenel Ileksen na Gavana em win. Wanem taim bai em na memba bilong Usino Bundi George Wan bai bringim sampela developmen long Bundi. Nau yet nogat wanpela hanmak bilong tupela.

Mipela ol Bundi pipel nau bai brukim boda na i go stap insait long Simbu Gavman. Dispela bai kamap bipo long 2002 ileksen. Nau mipela tok strong i go long Gavana bilong Chimbu Pater Louis Ambane long pait strong long palamen long kisim ol Bundi pipel i go insait long Chimbu provins.

Sapos yu husat man laik sapat o egensim dispela toktok orait, rait i kam long Wantok niuspepa na mi lukim. Tenkyu.

**Maik Karisogo
Pot Mosbi**

Sensus 2000 wokmanmeri mas wok gut

Dia Edita,

DISPELA em namba wan taim bilong mi long rait, mi laik autim wari bilong mi long wok bilong sensus 2000. Sapos sampela wokmanmeri bilong sensus 2000 i lukim orait ol i ken tokim bosman bilong sensus 2000 bai i mas kauntim ol manmeri gut.

Mi no laik raitim planti stori moa, tasol mi yet mi bilong Hailans na mi save long paul wok bilong ol manmeri, tasol i no ol sensus 2000 wok manmeri. Ol manmeri i save paulim wok bilong gavman na long wok bilong sensus tu.

Hia em planti paul wok i save kamap, eksambol, mi stap long Mosbi nau, bai mi givim nem bilong mi long hia (Mosbi) tasol long ples Simbu, ol lain bilong mi bai putim o givim nem bilong mi tu long hap, em olsem.

Narapela em ol man dai o ol susa i go marit long arapela hap. Em nem bilong ol bai stap o ol lain bilong ol bai raitim nem bilong ol tu

i stap.

Nau mi laik askim gavman na dairekta bilong sensus long painim sampela gutpela rot long kauntim ol manmeri, nogut samting tru bai yumi i no inap 4 milion o moa long 4 o 5 milion manmeri.

Antap long Hailans dispela paul samting bai i stap ol lida na manmeri bai ting long yusim giaman nem long kisim vot.

Dispela sensus 2000 awenes i stap longpela taim nau na mi apil long gavman, sensus dairekta na ol wokmanmeri na ol manmeri long PNG. Long wok bung wantaim long karim aut wok bilong sensus na yumi noken mekim giaman na givim giaman nem bilong maunten, wara, diwai, bus ol animol na ol manmeri i dai pinis, plis tingim na givim nem bilong mantru. Tenkyu.

**John A M
Port Moresby**

WOK BISNIS
MANDE IGO FRAIDE
8.am Igo 5.pm apinun

WANTOK
KLASIFAIID TELIPON: **325 2500**

ADVATAISIN SEILS
Mini Aiori: ext 214 Water D.Edward :ext 218
John Iagata: ext 217

PABLIK NOTIS

Pablik Notis

PNG - German Gavaman Koporesen na Katolik SIOS

I laik save sapos yu bin kisim trening long volcational skul long PNG
Yu ken winning K100 sapos yu kam long mipela.

Mipela i laik save long wanem kain wok yu bin mekim long bihain yu bin kisim save
long **Vokesenol Trening Centa**.

Yu ken kisim fri tiket sapos yu kam givim tingting bilong yu long wanem wok yu bin
mekim bihain long yu skul pinis long **Vokesenol Trening Centa**.

Yu ken ken kam na painim mipela long givim tingting bilong yu long ol dispela ples:

Mosbi **Lae** **Rabaul/Kokopo** **Bulolo**

Del long kam em: 10/07/2000 Igo Inap 28/07/2000

Lukluk long ol notis bod long ol taun o harim long toksave i kam long redio.
Mipela i mekim laki dro em ol **German Donor GTZ** i sponsarim na tupela ten (20)
manmeri i ken winim K100.

Lukluk long niuspepa sapos yu winim dispela prais.

PABLIK TENDA



PNG WATERBOARD

PABLIK TENDA

TENDER NO. TCWB 03/00

**WOKIM 2 X L54 STAF HAUS LONG MADANG
PROVINS**

PNG Waterboard em Komesel Stetutori Atoriti aninit long
Nesenel Gavman bilong PNG. Em i papa long kamapim
na salim klinpela na gutpela wara saplai na seweris sevis
long ol kastoma long 11-pela Distrik insait long PNG. PNG
Waterboard nau i gat 300 wokmanmeri.

PNG Waterboard i askim long ol rait PNG o hap PNG bild-
ing Kontraktas long wokim tupela L54 haus bilong ol wok-
man long nupela Panim Water Treatment Plant long Beon,
Madang provins. Yu ken kisim ol pepa bilong tenda na
konstraksen droing long Madang Waterboard opis.
K150.00 em non rifanebel fi. Ol interes lain ausait long
Madang provins i laik aplai long dispela tenda i ken toktok
wantaim PNG Waterboard Teknikel Sevis Divisen long
telepon namba: 3256866 o salim fax long namba:
3256836 long kisim moa toksave.

**Askim long: Tau Momo o Benny Bobola long
Olgeta tenda aplikesen i mas go long:**

**PNG Waterboard Tender Box
PO Box 2779
Boroko, NCD 111.
Tender No. TCWB 03/00**

Tenda i pas long Fraide 14 Julai, 2000 long 1500 (3.00pm)

WANTOK

Niuspepa bilong yumi ol Papua Niugini Stret!

**NOKEN LUS TINGTING LONG
BAIM WANPELA NAU!!**

**70¢
tasol!**

Julai, Isiu 2000 bilong

PNG

BUSINESS

bai kamaut klostu nau.

LUKAUT LONG EN!!



PNG WATERBOARD

PABLIK TENDA

TENDER NO. TCWB 11/00

**WOKIM 1 X H65/97 STAF HAUS LONG WEWAK,
IS SEPIK PROVINS**

PNG Waterboard em Komesel Stetutori Atoriti aninit long
Nesenel Gavman bilong PNG. Em i papa long kamapim
na salim klinpela na gutpela wara saplai na seweris sevis
long ol kastoma long 11-pela Distrik insait long PNG. PNG
Waterboard nau i gat 300 wokmanmeri.

PNG Waterboard i askim long ol rait PNG o hap PNG bild-
ing Kontraktas long wokim H65/97 haus bilong ol wokman
long Seksen G. Lot 3, Wewak Hill, Wewak Is Sepik
provins. Yu ken kisim ol pepa bilong tenda na konstraksen
droing long Wewak Waterboard opis. K150.00 em non
rifanebel fi. Ol interes lain ausait long Wewak provins i laik
aplai long dispela tenda i ken toktok wantaim PNG
Waterboard Teknikel Sevis Divisen long telepon namba:
3256866 o salim fax long namba: 3256836 long kisim moa
toksave.

**Askim long: Tau Momo o Benny Bobola long
Olgeta tenda aplikesen i mas go long:**

**PNG Waterboard Tender Box
PO Box 2779
Boroko, NCD 111.
Tender No. TCWB 11/00**

Tenda i pas long Fraide 14 Julai, 2000 long 1500 (3.00pm)

Pablik sevans bal statim gen vollbal

PS VOLIBAL RIPOT

TINGTING bilong kirapim gen NCD Pablik Sevans Volibal competition i wok long pulim planti dipatmen na statutori bodi.

Dispela kompetisen em ol i tingting long statim long Julai 4 long Sir John Guise stadium, Waigani.

Volibal kompetisen bilong Pablik Sevans i no bin stat las yia, na ol i no salim wanpela tim bilong volibal i go long Australasian Pabliks Sevans Gems long Melbourne.

Long 1998 Australasian Gems, PNG i winim gol medal.

Komesel menesa bilong PNG Spots Komisn na wanpela strongpela sapota bilong volibal, John Paliau i tok em i amamas tru long lukim ol planti lain i soim laik long putim tim long dispela yia.

"I gat bikpela laik tru long statim en dispela kompetisen," Paliau i tok.

Ol lain i kamap long namba wan miting las wik em Nesenel Parliament, NCDC, Ombudsmen, Pangtel, POSF, NAQIA na PNG Spots Komisn.

Namba bilong ol tim i go antap taim ol dipatmen olsem NBC, Foren Afeas, Helt, Elkorn, Telikom, Fire Sevis, Housing

Komisn, Central, Maining na Petroleum, Lands na Judiseri Sevis.

Dispela kompetisen bai kamap long mixed divisen, mens divisen na wimens divisen.

I gat lo i karamapim husat i ken resis we ol wokman na meri bilong ol tasol. Ol pikinini i ken painim arapela gem long pilai.

Interim komiti em John Paliau siaman, Gordon Cooper deputi siaman, Norah Lavett - sekretari-tresera, na ol arapela komiti em Bernard Alu na John Moia.

Wanwan tim bai baim K200 na wanwan pilai em K10. Bai i gat K2 fi long olgeta nait.

Disabel Gems pulim 200 spotman meri

DISABEL SPOT RIPOT

MOA long 200 disabel spots man meri bai kamap long bikpela gem bilong ol long Nesenel Spots Institut long goroka. Dispela gem ya bai kamap long Ogas 6-12.

Kodineta bilong Disebel Spots long kantri, Sophie Kuasie i tok olsem 10-pela senta bai salim tim. Ol senta em Pot Mosbi, Rabaul, Alouta, Wewak, Manus, Lae, Mt Hagen, Aitape, Vanimo na Goroka

Port Moresby bai salim 60 spotsman meri, Goroka 70, Aitape 20, Rabaul 15, Wewak 10, Manus 5, Lae 21, Alotau 3, Mt Hagen 10 na Vanimo 10.

Goroka yet i gat tupela tim. Wanpela bai kam yet long Mt Sion we 50 spotman meri bai s tap long em na arapela em long Goroka raun yet we i gat 20 spotman na meri.

Mendi na Kundiawa i no memba bilong PNG Disebel Asoseisen tasol ol i salim tim las yia. Na i luk olsem em bai salim gen long dispela yia.

Em i gat bilip olsem Kavieng bai salim yet wanpela tim.


Ol spot bai kamap long disebel gems em atletik, swimming, wheelchair basketball, archery, dats, goalball, wheelchair race, slalom (obstacle race), powerlifting na weightlifting.

Kuasie i tok olgeta senta bai baim fi bilong ol yet. Wanwan spotsman bai mas baim K50 na dispela em bilong haus slip na kaikai. Haus slip em K20 na kaikai em K30.

Kompetisen fi bilong wanwan memba em K5 na husat i no memba bai baim K10 long resis.

Olgeta mani i mas go long Sophie Kuasie bilong PNG Spot Komisn taim ol i kamap long NSI.

Sapos wanem senta i gat tingting i mas ringim kik Ms Kuasie long 325 1991. De bilong ol rejistresen bai pas long Julai 31.



• Em laik lukluk long bal na i no luksave olsem em i krosim ap bilong pilai na go autsakt pinis. Dispela eksen save kamap long olgeta wiken long Bisini soka fild. Foto: ISSAC IKUAVI.

Taurama bai traim strong egensim Telikom

RAGBI UNION RIPOT

1RPIR Taurama Bareks husat i wok long kamapim nem long ragbi union bai bungim wanpela strongpela tim Telikom long dispela wiken long Bava Park.

Ol boi ami ya i bin winim wanpela gem egensim Finpac, dro wantaim Wanderers na i bin kamapim strongpela salens egensim ol biknem tim olsem Defence, Harlequins na Brothers.

Gem namel long Brothers, 1RPIR i bin strong long 15-15 i go long las minut na ol Brothers i skoa na win.

Dispela tim, 1RPIR i nogat ol biknem pilai tasol ol bai putim kamap wanpela strongpela gem egensim Telikom. Ol boi Taurama i gat ol pilai olsem Sidney Westly, George Laut na Joe Ben long salensim ol biknem olsem Peter Senat, John Kabua na Geoffrey Puipui. Dispela ol pilai bilong Telikom i gat planti eksperiens tru long provinsal na tu intansenel level.

Na long bekro David Pidik, Peter Tita, Terence Kede, Joel Meserum na Bernard Auri bai kamapim gutpela gem stret.

Pidik na Kede i wok long

kamapim gutpela gem bihain long mau. Ol i save kisim bal na winim planti graun long helpim tim i go fowat.

1RPIR bai no inap surik long Telikom na i tingting long holim strong tru dispela salens egensim ol.


Na long beklain bilong Telikom, Asi Vele Tola, Chris Tebarang, Jonathan Chakumai, Steven Tilip na Apisolom Kaili i gat planti eksperiens tru tasol ol bai kisim gutpela salens i kam long ol nupela pilai olsem Patrick Waluka na Ben Tape.

Long arapela pilai, Defence bai tingting long winim Harlequins. Harlequins i wok long winim olgeta gem long namba wan raun i kam inap nau na ol bai i no inap givim sans long Defence.

Defence i gat ol pilai olsem Able Tore, John Larry, Salla Pomat, Aaron Mial, Kosen Boino na Andy Vele

Ol Harlequins i gat ol pilai olsem Ian Liveras, Jonathan Kairu, Kevin Rooney, Richard Pangkatana, Ian Leklek na Eremas Simba.

Insait logn arapela gem, University husat i kisim taim long Telikom bai autim olgeta hevi bilong em long Brothers. Finpac bai givim sampela samting nupela long ol boi Royals.



• MINISTA bilong Fores na memba bilong Not Bogenvil, Michael Oglo, i bin raun las wiken long Not Solomon Alians long givim sampela helpim mani i go long ol pipel.

Em i bin baim planti tropi, sil, bal na net na givim i go long ol warwan eria insait long lektoret bilong em long ranim rural spots kompetisen. Long piksa em i givim shil i go long slaman bilong Pelts Spots Asolesen Francis Pullat long Pis Rekonllesan selebresen long Gagan viles, Not Bougenvil.

Kampani askim PNG Spot Komisn long skelim gem

PNG SPOT KOMISIN RIPOT

TUPELA bikpela kampani, Coca Cola na Trukai, i askim PNG Spots Komisn long skelim program, Pikinini Spots na Yut Spots sapos ol i laikim moa mani long ranim program long sampela taim gen.

Nesenel maketing menesa bilong Trukai Indastri, Neville Whitecross i tok olsem kampani bilong em i no stapim sponsasip tasol askim PNG Spots Komisn long skelim na lukluk bek long program sapos ol i laikim mani.

"Trukai i no stapim sponsasip, nogat, mipela askim nesenei kodineta Scott Vavine long skelim na lukluk bek long program

"Mipela i no inap givim mani olgeta taim, tasol mipela i ken helpim long sapotim provinsal gems we ol lain i sindaun long dispela kos i ken yusim save bilong ol long en," Whitecross i tok.

Mista Vavine i tokaut olsem sponsasip bilong Trukai na PNG Spots Komisn long Yut Spots bai pinis long dispela yia.

"Mipela kam long pinis bilong dispela 5-yia sponsasip wantaim Trukai. Sapos mipela laik karim aut program, orait PNG Spots Komisn na Trukai i ken sindaun gen na paitim toktok long sponsasip.

Na wanikain tu long Coca Cola. Wantok i bin traim long kisim toktok bilong jenerei menesa bilong Coca Cola long Lae, Paul Dubb long dispela stori tasol nogat.

Mani go pas long Coca Cola Pikinini Sports program, John Hou i tokaut olsem Coca Cola i stap yet olsem sponsa.

Dispela sofdring kampani i tromoi olsem K300,000 long sapotim dispela program bilong Pikinini Spots. Trukai i givim klostu long K250,000 na dispela em wanpela bikpela mani stret i kam long kampani long sapotim spots.

Las wik i gat sampela tok win olsem Coca Cola na Trukai bai stapim sponsasip wantaim PNG Spots Komisn. Toktok i kamap ya em olsem ol bai i no inap givim mani long sapotim dispela ol spots program.

Coca Cola i sapotim PNG Spots Federation long salim 500m botol coke long kisim mani na salim PNG tim i go long Sidni

2000 Gems we bai kamap long mun Septemba. Trukai i kisim ples bilong Pepsi Cola long sapotim Fan Ran. Dispela fan ran ya bai kamap long Julai 23.

Eksekutiv dairekta bilong PNG Spots Komisn John Kambuou i tokaut olsem opis bilong em nau i toktok wantaim tupela kampani long traim stap yet olsem sponsa bilong ol spots program.

Sapos tupela kampani i les long sponsa, PNG Spots Komisn bai stapim olgeta program bilong em.

PNG Spots Komisn i no save kisim bikpela helpim i kam long gavman. Olsem na em i save strong long ol kampani olsem Coca Cola na Trukai long givim sapot i kam, kag ol program bilong em



Wiken Spot Dro

PORT MORESBY NETBALL ASSOCIATION DRAW

Saturday, July 8, 2000.

Juniors Week Ten

U10 A - 8am

Table with 2 columns: Match ID and Teams. Includes matches like C1 Chevron P. vs BB Kings, C2 L. Telstars vs LB Mermaids, etc.

U13 A - 8.30am

Table with 2 columns: Match ID and Teams. Includes matches like C1 CP Rebels vs Chevron P., C2 LB Mermaids vs St Theresa, etc.

U13 B

Table with 2 columns: Match ID and Teams. Includes matches like C5 Hagara vs St Peters, C6 Ted Diro vs TST Kempa, etc.

U13 D - 9.00am

Table with 2 columns: Match ID and Teams. Includes matches like C10 Rakaone vs Boreboa, C11 Bavaroko vs Tatana Pri, etc.

U13 E

Table with 2 columns: Match ID and Teams. Includes matches like C13 CP Sparrows vs Holy Rosary, C14 Pari vs Butuka, etc.

U15 A

Table with 2 columns: Match ID and Teams. Includes matches like C1 TST Kempa vs Kila Kila Pri, C2 L. Telstars vs June Valley, etc.

U15 B

Table with 2 columns: Match ID and Teams. Includes matches like C6 June Valley vs CP Rebels, C7 St Pauls vs Wardstrip, etc.

U15 C - 10.00am

Table with 2 columns: Match ID and Teams. Includes matches like C10 Philip Aravure vs Tatana Pri, C11 Tokarara Pri vs Bavaroko, etc.

U15 D

Table with 2 columns: Match ID and Teams. Includes matches like C6 Bavaroko vs Tokarara Pri, C7 Pari vs LB Mermaids, etc.

U15 E

Table with 2 columns: Match ID and Teams. Includes matches like C10 BB Kings vs Holy Rosary, C11 CP Sparrows vs St Michaels, etc.

U17 A - 11.00am

Table with 2 columns: Match ID and Teams. Includes matches like C1 Kila Kila Sec vs CP Rebels, C3 LB Mermaids vs Badihagwa, etc.

U21 A - 12.00pm

Table with 2 columns: Match ID and Teams. Includes matches like C1 Sogari vs Luvoni, C3 LB Mermaids vs Chevron P., etc.

C1 1.00pm Paramana vs Rakaone

C1 2.00pm Luvoni vs L. Telstars

Bye TST Kempa

Division One - Court Two

Table with 2 columns: Match ID and Teams. Includes matches like 11.00am TST Kempa vs CP Rebels, 12.30pm Rakaone vs L. Telstars, etc.

Division Two - Court Three

Table with 2 columns: Match ID and Teams. Includes matches like 01.00pm Angels vs CP Sparrows, 02.00pm LB Mermaids vs TST Kempa, etc.

Division Three - Court Four

Table with 2 columns: Match ID and Teams. Includes matches like 01.00pm PNGBC Kirovs vs Luvoni, 02.00pm CP Sparrows vs Imuty Lele, etc.

Division Four - Court 5

Table with 2 columns: Match ID and Teams. Includes matches like 01.00pm Logohu vs Chevron P., 02.00pm Mase vs Nabuaton, etc.

Division Five - Court Six

Table with 2 columns: Match ID and Teams. Includes matches like 01.00pm Imuty Lele vs Aroma Coast, 02.00pm Koki Knights vs Waigani Tyres, etc.

Division Six - Court Seven

Table with 2 columns: Match ID and Teams. Includes matches like 01.00pm Pewalla vs Aust H. Com, 02.00pm Hall Sound vs Paiga Waina, etc.

Division Seven - Court Eight

Table with 2 columns: Match ID and Teams. Includes matches like 01.00pm Kila Kila Sec vs Vakari Warriors, 02.00pm Downer Lady Bird vs Toba Souths, etc.

Division Eight - Court Nine

Table with 2 columns: Match ID and Teams. Includes matches like 02.00pm Holy Rosary vs ABO Warriors, 01.00pm Toba Souths vs Downer Lady Birds, etc.

Bye Wanderers

MT HAGEN SOCCER ASSOCIATION WEEKEND DRAW

Saturday July 8, 2000.

Table with 3 columns: Time, Match ID, and Teams. Includes matches like 0800am U19 HICI vs Pascole, 0900am U19 Momads vs McRema Tarangau, etc.

Sunday July 9, 2000.

Table with 3 columns: Time, Match ID, and Teams. Includes matches like 0800am U19 PNGBC vs Kalam, 0900am U19 Lae Biscuit BFC vs Blue Kumula, etc.

1600pm L Lae Biscuit BFC vs Blue Kumula

SP CUP 2000

ROUND FIVE RESULTS

Table with 2 columns: Match ID and Results. Includes matches like Rabaul Gurias 22 defeated Simbu Warriors 10, Lae Bombers 12 defeated Waghi Tumbo 0, etc.

Club P W L D F - A Pts

Table with 2 columns: Club and Statistics. Includes Enga Mioks 5 5 - - 93-65 10, Rabaul Gurias 4 3 1 - 66-67 6, etc.

Round Six Draw (Sun, July 9, 2000)

Table with 2 columns: Match ID and Teams. Includes Simbu Warriors vs Lae Bombers (KWA), Goroka Lahanis vs Rabaul Gurias (KPO), etc.

Bye Vipers

KIUNGA LEAGUE A GRADE POINTS TABLE AS OF SUNDAY 27/2000

Table with 2 columns: Club and Statistics. Includes Raiders 10 7 - 3 184 128 14, Norths 10 5 - 5 175 140 10, etc.

KOIARI RUGBY LEAGUE DRAW

Round: 2/4 (9)

Date: Sunday July 9, 2000.

Over: Sogeri Iarowari

Table with 2 columns: Match ID and Teams. Includes 11.00 B Crystal Eels vs Trek Warriors, 12.00 B Hooks Tigers vs Sirinumu Ops, etc.

Results for last weekend

Table with 2 columns: Match ID and Results. Includes B Tigers 7 defeat Warriors 4, B Eels 8 defeat Pukpuks 6, etc.

KOIARI RUGBY LEAGUE POINTS TABLE As of 2/7/2000 round 2/3

A Grade

Table with 2 columns: Club and Statistics. Includes Sogeri Choice 8 6 2 - 86 53 14, IBS Pukpuks 8 5 - 3 77 66 10, etc.

B Grade

Table with 2 columns: Club and Statistics. Includes Crystal Eels 7 6 - 1 54 28 12, Hooks Tigers 7 4 1 2 31 22 9, etc.

Key * One outstanding match yet to play. Next coming up 3/2000 newsletter: teams crucial roundups. Your co-operation and support is very much needed for the good of our league.

THE 2000 LAE COCA COLA CORPORATE TOUCH DRAW - ROUND 2

11/7/00

Table with 2 columns: Match ID and Teams. Includes F1 Coca Cola vs Boroko Motors, F2 Bellak Chemicals vs PNG Motors, etc.

12/7/00

Table with 2 columns: Match ID and Teams. Includes 5.45 Toba Motors vs Truckit, 6.35 Herbalife vs Goodman Fielders, etc.

PORT MORESBY RUGBY FOOTBALL LEAGUE INC

COMPETITION POINTS TABLE AND MATCH RESULTS

Round 14

Date: July 1-2, 2000.

Grade A

Table with 2 columns: Club and Statistics. Includes Souths 14 11 2 1 24, Brothers 14 10 1 3 23x, Paga 14 11 0 3 20x, etc.

x Denotes points awarded on technical grounds

^ Denotes points deducted on technical grounds

MATCH RESULTS

A Grade

Round 14

July 1-2, 2000.

Table with 2 columns: Match ID and Results. Includes Royals 20 forfeited Gerehu United 0, Tarangau 26 defeated Hawks 12, etc.

NATIONAL CAPITAL DISTRICT VOLLEYBALL ASSOCIATION DRAW

Venue: Sir John Guise Indoor Hall

Date: Saturday July 8, 2000.

Court 1

Table with 2 columns: Match ID and Teams. Includes 08.30 U-Mi-Yet vs Telikom WAR, 10.00 Mixtures vs Vallima WA, etc.

Court 2

Table with 2 columns: Match ID and Teams. Includes 08.30 Mixtures vs Vallima MAR, 10.00 Scorpions vs NCDC MA, etc.

Court 3

Table with 2 columns: Match ID and Teams. Includes 08.30 Scorpions vs NCDC WAR, 10.00 Raukele vs Hoppers WAR, etc.

COCA COLA LAE CORPORATE TOUCH POINTS TABLE - TUESDAY

Table with 2 columns: Club and Statistics. Includes Goodman Fielders 7 4 2 1 38 33 5 16, NG Tablebirds 7 1 6 - 22 43 21- 9, etc.

POINTS TABLE - WEDNESDAY

Table with 2 columns: Club and Statistics. Includes Lae City Council 8 - 1 5 -1 22 53 31- 8, Ela Motors 8 1 2 5 1 - 47 46, etc.

Boroko Motors 2 8 - 7 1 - - 56 34

Table with 2 columns: Club and Statistics. Includes C/Cola Amati 8 1 3 4 - 1 25 48 23- 13, A/Biscuits 8 1 3 3 2 - 49 33 16 16, etc.

PORT MORESBY SOCCER ASSOCIATION

Saturday 8th July, 2000

Biaini One (1)

Table with 2 columns: Match ID and Teams. Includes 08:00 Youth Babaka vs Guria, 09:20 D2 Dolos vs Duau, etc.

Biaini Two (2)

Table with 2 columns: Match ID and Teams. Includes 08:00 D2 Mungkas vs Naniu, 09:20 W2 Madgauns vs Waigani Heights, etc.

University Oval

Table with 2 columns: Match ID and Teams. Includes 08:00 D4 ANZ University vs IBS PS United, 09:20 D4 Rapatona vs LBC Defence, etc.

Sunday 9th July, 2000

Biaini One (1)

Table with 2 columns: Match ID and Teams. Includes 08:00 D2 Wanzasi vs Njeco, 09:20 W2 Rapatona vs SP Brewery, etc.

Biaini Two (2)

Table with 2 columns: Match ID and Teams. Includes 08:00 D2 Murat vs Eda Ranu, 09:20 W2 Orogen vs Murat, etc.

University Oval

Table with 2 columns: Match ID and Teams. Includes 08:00 D4 Babaka vs Guria, 09:20 Youth Cosmos vs Tawala, etc.

Bye: Bao Mitas (D1), Guria (W1), HLB Pom United (W2), Monitor Kayak (D2), Asum (D3).

Note: Blue Kumula youth division has been suspended.

LAHI SOCCER ASSOCIATION SEASON PROPER WEEK 7 DRAWS (WASHOUTS)

Sila

Sat 08/07/2000

Table with 2 columns: Time and Fixtures. Includes 0800 U19-1 Elcome vs Poasum, 0900 U19-1 Momase vs Lae Biscuit, etc.

Sun 09/07/2000

Table with 2 columns: Time and Fixtures. Includes 0800 W2 KA Midnorth vs Lae Biscuit, 0900 W2 Poasum vs Asiawo, etc.



ZENAG - Gutpela kiau



WANTOK SPOT



• Piksa i soim Enga Mioks pilala i dabolim pilala bilong Goroka Lahanis long inta siti gem las Sande long Goroka. Mioks win 7-6.

Eagles bai holim namba wan inta siti gem

SP KAP RIPO

MT HAGEN bai holim SP Kap inta siti resis namba wan taim long dispela yia taim asples tim, Eagles i bungim Waghi Tumbe.

Operesen menesa bilong PNGRFL Peter Barnanga i tok PNGRFL givim dispela gem i go long Mt Hagen bihain long ples pilai na ol arapela ripot bilong ol i gutpela.

Klostu namel bilong 2000 sisen, PNGRFL i tokaut olsem klostu olsem 21 pesen bilong ol sapota i wok long kamap na sapotim tim. Las yia dispela kain sapot i no gat ya.

Simbu Warriors bai bungim Lae Bombers long Kundiawa. Dispela gem sapos long kamap long Lae tasol ren i wok long bagarapim olsem na ol i surikim i go long bik-taun bilong Simbu.

Rabaul Guria bai salensim Goroka Lahanis long Kokopo. Dispela gem ya em olsem gren fainel las yia, na tupela tim wantaim bai kaikai tit stret long bekim gol bilong ol.

Las wik, Guria i holim namba wan gem long Kokopo we ol i winim Simbu Warriors 22-10.

"Mipela laik holim dispela gem long olgeta hap long givim sans long olgeta pipel long lukim dispela nesenel kompetisen, SP Kap," Mista Barnanga i tok.

"Tasol mipela bai skelim olgeta samting pastaim bipo mipela i ken givim graun i go long ol senta.

Planti ol tim i no holim gem long asples bikos ples pilai bilong ol i no gutpela long laik bilong ol PNGRFL. Tasol nau olgeta samting i stret we

senis i kamap long dro na ol i ken larim ol gem i kamap.

Bihain long dispela wiken, Mendi Muruks tasol nau bai i no holim gem long Mendi. Ol Muruks bai go bungim Enga Mioks long Wabag. Dispela bai lukim Raymond Karl bai salensim ol wantok bilong em.

Siaman bilong PNGRFL John Numapo i tok dispela 21 pesen ya i gutpela tru bikos planti ol sapota na pipel i bihain ol tim bilong ol long wanem hap ol i pilai ya.

"Mi ting planti ol sapota i bihain tim na dispela em i gutpela long lukim," Numapo i tok olsem.

Em i tok dispela yia em Wol Kap bai kamap, na ol pipel long PNG bai bihain dispela samting we ol pilai i wok long tren hat long traim grisim ol selekta long winim spot insait long Kumul tim.

Solomon Ailans i no inap kam

.... nogat balus pundaun long Henderson ples balus

HENRY MORABANG i raitim

WOK redi bilong Papua Niugini Anda 18 wimens soka tim long Wol Kap kwalifaia long mun Epril neks yia i no bihainim gut plen bilong nesenel soka bodi, Papua Niugini Futbol Asosiesen (PNGFA).

Mausman bilong ol meri long PNGFA eksekutiv level, Misis Kathy Davani i tokim Wantok olsem PNG i laik salensim tru Anda 18 tim bilong Solomon Ailans tasol nau hevi i bagarapim dispela plen.

Dispela salens ya em long redi tim bilong tupela kantri wantaim, PNG na Solomon Ailan, long Wol Anda 18 soka kwalifaia bai kamap long Nu Silan neks Epril.

Misis Davani i tok PNG tim i lukluk fowat long dispela salens tasol nau moning, Solomon Ailan Futbol Federesen (SIFF) i tokim em olsem tim bai i no inap lusim Honiara bikos Air Niugini i stapim olgeta balus bilong em. Ol ara-

pela balus kampani, Qantas na Air Pacific tu i stap balus taim dispela nupela pait i kamap long Mande.

Air Niugini i stapim balus bihain tasol long nupela pait i kamap long Mande namel long tupela rebel grup, Isatabu Fridom Muvmen bilong Gudalcanal na Malaita Eagle Force bilong Malaita.

Ripot i kamap long opis bilong SIFF i tok tupela paitman bilong Isatabu Fridom Muvmen i dai pinis olsem na SIFF i stapim tim long lusim kantri.

Misis Davani i tok PNG i redi gut long holim dispela salens tasol nau ol i mas wet na makim nupela taim. PNG i laik stat redi nau na i no larim olgeta samting i go long las minit na bihain ol bai kanselim.

Misis Davani i tok ol pilai bilong PNG bai kamap long tupela senta, Pot Mosbi Skuls Soka na Lahi. Tupela senta tasol long kantri i gat junia wimens soka kompetisen insait long kantri.

PORT MORESBY RUGBY FOOTBALL LEAGUE INC

Round 15 - Lloyd Robson Oval
Saturday, July 8, 2000.

09.30	B	Waliai vs Post Puma	S. Farisa	Kairi/Lesson
10.45	B	Kone Tigers vs Royals	T. Kairi	Farisa/Kera
12.00	A	Souths vs Gerehu United	J. Kaupa	Kairi/Lesson
01.30	A	Waliai vs Post Puma	V. Kera	Sarufa/Kaupa
03.00	A	Kone Tigers vs Royals	Sarufa	Kairi/Lesson

PRL Ground 2

09.30	C	Paga vs Tarangau	Haiverava	Iniga/Muri
10.45	C	Brothers vs Defence	J. Iniga	Hicks/Samson
12.00	C	Waliai vs Post Puma	B. Muri	Hicks/samson
01.30	B	Paga vs Tarangau	L. Samson	Muri/Iniga

Sunday, July 9, 2000.

Lloyd Robson Oval

09.30	B	Brothers vs Defence	H. Sipa	Iniga/Hicks
10.45	A	Hawks vs Magani	P. Gul	Muri/Samson
12.00	A	Brothers vs Defence	G. Opi	Iniga/Sipa
01.30	A	Paga vs Tarangau	S. Fareho	Muri/Samson
03.00	A	Dobo Warriors vs West	T. Kuni	Kora/Sipa

PRL Ground 2

09.30	C	Hawks vs Magani	J. Akrepa	Farau/Hute
10.45	C	Kone Tigers vs Royals	B. Farau	Akrepa/Hute
12.00	B	Hawks vs Magani	U. Hute	Farau/Akrepa

PRL Ground 3

09.30	C	Souths vs Gerehu United	M. Buka	Lesson/Kora
10.45	C	Dobo Warriors vs West	S. Lesson	Buka/Kora
12.00	B	Souths vs Gerehu United	P. Kora	Buka/Farisa
01.30	B	Dobo Warriors vs West	S. Farisa	Lesson/Kora

Em i Gutpela Em i Tuna Em i bilong PNG stret...


PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tim.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



2000 NATIONAL CENSUS



count me in!...plan for me.



9th - 15th JULY





National Statistical Office



Why Count you?

The 2000 National Census will be conducted next month, 9th to 15th July 2000. The census officials, interviewers and supervisors will be sent throughout PNG to count every person, both citizens and non-citizens.

The interviewers will be asking every head of household questions from the census form to obtain information about each individual in the house.

The census questions have been extensively tested with full consultation with users of the census information. The census questions are fine tuned to source the kind of information policy makers and government departments need for informed planning. The PNG government approved the census form and the 28 questions that are going to be used in the census interview.

The 28 questions on the Census Form cover the following major topics.

- Questions 1 to 7 Personal characteristics
- Questions 8 to 10 Migration
- Questions 11 to 13 Education and training
- Questions 14 Literacy
- Questions 15 to 19 Economic activity
- Questions 20 to 23 Fertility and mortality
- Questions 24 to 25 Household agriculture and economic activities
- Question 26 to 28 Housing

The 2000 National Census is proud to present to the public these questions which will be used during the enumeration period. This is a census that belongs to everyone who lives in this country, and it is their right to know before hand, the kind of questions they will be asked in this most important national statistical data collection.

The questions are presented in three main languages used in PNG, English, Tokpisin and Motu so that they are accessible to every literate person living in the country.

The National Statistical Office, the official government agency mandated to conduct the 2000 National Census is appealing to every one to cooperate and give their utmost support when the census workers come to your area.

2000 NATIONAL CENSUS FORM

FOR ALL PERSONS

- 1 What is the name of each person including visitors who slept here on the night of Sunday 9th July?
- 2 What is the person's relationship to the head of household?
- 3 Is the person male or female?
- 4 What is the person's date of birth or age in years?
- 5 What is the person's present marital status?
- 6 What church/religion does the person belong to?
- 7 Is the person's own mother still alive?
- 8 Where was the person born?
- 9 How long has the person lived in this district /town?
- 10 What is the person's citizenship?

CONTINUE ONLY FOR PERSONS AGED 5 YEARS OR MORE

- 11 Is the person attending any formal schooling now?
- 12 What is the highest formal educational grade completed?

CONTINUE ONLY FOR PERSONS AGED 10 YEARS OR MORE

- 13 Has the person completed a certificate, diploma or a university degree, or any other educational qualification since leaving school?
- 14 Which languages can the person read and write with understanding?
• English • Tok Pisin • Motu • Tok Ples
- 15 In the last seven days, has the person done any of the following:
• Gardening/fishing for money
• Gardening/fishing for own use only
• Business (any type) with paid help
• Business (any type) without paid help
• Helping in family business without pay
• Wage job
• None
- 16 a) What kind of work did the person do in the last seven days? (Describe kind of work or occupation, eg. plumber, street seller, kaukau farmer, car mechanic ect.

b) What are the main tasks/duties done in that work? (Describe kind of tasks or duties done in the work stated in Q16 (a). eg. mending tap, selling betelnut, weeding garden, fixing engine.
- 17 What kind of business is done at the place where the person works? (Describe business by activity, eg. house building, air transport, selling betelnut, ect)

- 18 Has the person actively sought any kind of work in the last four weeks?

- 19 What was the person doing mostly in the last seven days?
• Housework
• Studying
• Waiting to start a new job
• Looking for work
• Not working because
- Too young
- Too old, retired
- Sick
• Permanently Disabled
• Other describe

CONTINUE ONLY FOR ALL CITIZEN WOMEN AGED 15 YEARS OR MORE

- 20 How many children have you given birth to?
- 21 How many of your own children are living in this house?
- 22 How many of your own children are living elsewhere?
- 23 How many of your own children are dead?

TO THE HEAD OF HOUSEHOLD ASK THE FOLLOWING QUESTIONS

- 24 Does this household grow/raise any of the following for
1. Cash 2. Own use 3. None

• Cocoa • Coffee • Rubber • Oil Palm • Coconut • Betelnut
• Pigs • Poultry • Others.
- 25 Does this house get any money from the following
1. Yes 2. No

• Selling food crops at market place/road side
• Selling cooked food at market/road side
• Selling things they make eg. carvings, bilums, mats, ect
• Running PMV
• Hiring boats
• Running a store
• Others
- 26 Do you own this house?
1. Yes 2. No
- 27 If rented, who does the person rent the house from?

• National Housing Corporation
• Semi Government (eg. PNGBC, ELCOM, TELIKOM, ect)
• Other government (Provincial, LLG, District, ect)
• Other/Private (eg TST, STC, Real Estate, Wantoks, ect)
• Not rented
- 28 How many rooms are there in this house?
(Excludes kitchen, bathroom or store room)



National Statistical Office



**Bilong Wanem
Kaunim Yu?**

Long neks mun Julai, de 9 i go long 15, kaunim bilong 2000 Nesenel Populisen Sensus bai i kamap. Ol sensus wok manmeri bai i go long olgeta hap bilong Papua Niugini long dispela taim long kaunim olgeta manmeri na plikinini. Sensus tu bai kaunim ol manmeri bilong narapela kantri husat i kam stap Insait long PNG.

Ol wok manmeri bilong sensus bai askim het bilong wan wan haus ol sensus kwesten i stap long sensus fom. Dispela askim long ol het bilong haus i mas kamap long kisim na bungim ol infomesin bilong 2000 Nesenel Sensus.

Dispela ol sensus kwesten i bin kam aut bihain long planti tes na toktok. Ol gutpela tingting tu i bin kam long ol gavman dipatment husat bai yusim ol infomesin bilong sensus. Ol dispela sensus kwesten i sut stret long ol kain infomesin ol gavman dipatmen na ol kain kain levof bilong gavman bai yusim bilong plenim wok developmen bilong kantri.

Gavman bilong PNG i bin givim tok orait bilong en long Sensus Fom na dispela 28 kwesten.

Dispela ol 28 kwesten long Sensus Fom i kam aninit long dispela ol bikpela het tok.

- Kwesten 1 i go 7 Laip bilong wanwan man/meri
- Kwesten 8 i go 10 Raun o wokabaut bilong man/meri
- Kwesten 11 i go 13 Edukesen na troning
- Kwesten 14 Save bilong rit na rait
- Kwesten 15 i go 19 Ekonomik o bisnis ektiviti
- Kwesten 20 i go 23 Kamapim pikinini na famili (helt)
- Kwesten 24 i go 25 Wok agrikalsa bilong famili na ekonomik ektiviti
- Kwesten 26 i go 28 Haus

Bikpela amamas i kam long 2000 Nesenel Sensus long putim aut long pablik ol dispela sensus kwesten we ol sensus wok manmeri bai yusim long taim bilong sensus. Dispela sensus em sensus bilong olgeta pipel long dispela kantri, na em rait bilong ol long save long ol dispela kwesten pastaim. Dispela ol kwesten em bilong askim na kisim sampela ol bikpela infomesin bilong helpim developmen bilong kantri.

Dispela ol sensus kwesten i kam aut long tripela tokples, Inglis, Tok Pisin na Motu bai olgeta manmeri husat inap long rit na rait long ol dispela tokples i ken klia long en.

Nesenel Statistikol Opis, wanpela opis bilong gavman i gat pawa long ronim 2000 Nesenel Sensus i singaut i go long olgeta manmeri long wok bung na givim gutpela sapat taim ol sensus wok manmeri i kam long eria bilong yu.

2000 NESENEL SENSUS FOM

BILONG OLGETA MANMERI

- 1 Wanem nem bilong wanwan man/meri na visita i bin slip long dispela haus long nait bilong namba 9 de bilong mun Julai?
- 2 Dispela man/meri, em i gat wanem kain relesensip bilong en long het bilong haus?
- 3 Dispela ol pipel yu toktok long en, ol i man o meri?
- 4 Wanem de, mun, yia dispela man/meri mama bilong en i bin karim em?
- 5 Dispela man/meri, em i marit?
- 6 Wanem lotu bilong dispela man/meri?
- 7 Mama tru bilong dispela man/meri, em i stap yet o em i dai pinis?
- 8 Dispela man/meri, mama bilong en i bin karim em long wanem hap?
- 9 Hamas yia, dispela man/meri i stap pinis long dispela hap?
- 10 Dispela man/meri wanem em asples kantri bilong en?

ASKIM OL DISPELA KWESTEN LONG OL MAN/MERI HUSAT I GAT 5-PELA KRISMAS O MOA

- 11 Dispela man/meri em i stap long skul nau?
- 12 Dispela man/meri em i bin pinisim wanem gret long skul?

ASKIM OL DISPELA KWESTEN LONG OL MANMERI HUSAT I GAT 10-PELA KRISMAS O MOA

- 13 Dispela man/meri, em i bin pinisim kos bilong wanpela setifiket, diploma o yuniversity digri o ol arapela kain skul nabaut, taim em i bin lusim skul?
- 14 Wanem tokples dispela man/meri, em i gat save long raitim na ritim?
- 15 Sevenpela de i go pinis, dispela man/meri em i bin mekim sampela bilong ol dispela samting?
 - Wok gaden/painim pis long salim
 - Wok gaden/painim pis long kaikai long haus
 - Wok bisnis i gat pe
 - Wok bisnis i nogat pe
 - Helpim famili binis wantaim nogat pe
 - Wok fotnait

- 16 a) Wanem kain liklik wok tru dispela man/meri, em i bin mekim long 7-pela de i go pinis?

(plama, salim kaikai na klos long rot, kaukau fama, moto mekenik, welda---samting olsem.

(b) Wanem kain liklik wok tru dispela man/meri, em i mekim long wok ples bilong en?
(wokim haus, salim buai, fiksime enjin bilong kar---kain samting olsem)

- 17 Long ples dispela man/meri save wok long en, wanem kain wok bisnis i stap?

(salim buai, petrol sevis stesin, supamakot, seken klos maket)

- 18 Long 4-pela wik i go pinis, dispela man/meri em i bin traim long painim sampela kain wok nabaut?

- 19 Wanem samting stret em dispela man/meri em i bin mekim long 7-pela de i go pinis?

ASKIM KWESTEN 20-23 LONG OL ASPLES PNG MERI HUSAT I GAT 15 KRISMAS O MOA

- 20 Hamas pikinini yu yet karim pinis?
- 21 Hamas pikinini bilong yu tru, ol i stap long dispela haus?
- 22 Hamas pikinini bilong yu tru, ol i stap long narapela ples?
- 23 Hamas pikinini bilong yu tru i bin dai pinis?

ASKIM KWESTEN 24-28 LONG HET BILONG DISPELA HAUS?

- 24 Yupela save groim o lukautim sampela bilong ol dispela samting long

1. mani 2. Yusim long haus 3. Nogat

• Kakao • Kofi • Raba • Wel Pam • Kokonat • Buai • Pik • Kakaruk

- 25 Yupela ol lain long dispela haus save kisim mani long dispela samting?

1. Yes 2. Nogat

• Salim kaikai long maket/rot
• Salim samting ol yet i mekim (Eksampel: kaving, bilum, man)
• PMV bisnis
• Hairim bot
• Tred stoa bisnis


- 26 Dispela haus em bilong yu stret?

1. Yes 2. Nogat

- 27 Sapos dispela man/meri rentim haus, em i rentim long husat?

• Nesenel Housing Kopresen
• ELCOM, TELIKOM, PNGBC
• Provinsal Gavman, Lokal Level Gavman, Distrik
• Praivet (Eksampel: TST, STC, Real Estate, Wantok)

- 28 Hamas rum i stap long dispela haus?
(Noken kaunim haus kuk, rum bilong waswas na stua rum)



2000 NESENEL SENSES FOM

RUMA TAUDIA IBOUNAI

- 1 Ruma taudia bona vadivadi taudia ladadia be daika inai rumai dekenai idia mahuta Sande hanua boi 9 Julai?
- 2 Inai taunimanima ena hevaravara ruma biaguna dekenai be dahaka?
- 3 Inai taunimanima be tau eiava hahine?
- 4 Inai taunimanima ena vara dinana eiava ena lagani be hida?
- 5 Inai taunimanima be ia headava eiava lasi?
- 6 Inai taunimanima ena dubu be dahaka?
- 7 Oi emu sinana ia mauri noho?
- 8 Inai taunimanima be edeseni ia vara?
- 9 Inai taunimanima be lagani hida ia noho inai gabuai?
- 10 Inai taunimanima be edena tanobada amo ia mai?

BEMA INAI TAUNIMANIMA ENA LAGANI BE IMA IA ABIA EIAVANA HANAI NEGANAI HENU HENANADAI OI NANADAI LAIA

- 11 Inai taunimanima be hari ia sikuli danu?
 - 12 Inai taunimanima ena sikuli maka be edeseni ia doko?
- ### BEMA INA TAUNIMANIMA ENA LAGANI BE GWAUTA IA ABIA EIAVA IA HANAI NEGANAI HENU HENANADAI OI HENANADAI
- 13 Bema inai taunimanima ena sikuli ia haorea murinai be pepa ta ia haorea. Hegeregere setifiket, diploma, eiava yunivesiti digiri?
 - 14 Inai taunimanima be edena gado ia duhaia diba bona ia torea diba?
 - 15 Inai taunimanima dina hitu lalonai be inai gaukara ta ia karaia?
 - 16 a. Inai taunimanima dina seveni lalonai be dahaka gaukara ia karaia? (Inai gaukara toana oi gwaurai, hegeregere ranu paipa ia karaia, eiava dala badinai ia hoihoi eiava motuka karaia guakaradia)

b. Inai gaukara lalonai be dahaka gaukara badana ia karaia? (Inai gaukara toana oi gwaurai oi atoa henanadai (16 a) dekenai

hegeregere ranu paipa oi karaia, buatau oi hoihoi laia, uma gabu oi goevaia eiava motuka engin oi gaukara laia)

- 17 Inai taunimanima ia gaukara gabunai be dahaka bisnesi idia haheava? (Bisnesi gaukara bona dahaka gaukaradia, hegeregere ruma karaia, roho peleinidia karaia buatau hoihoi lai)

OI LAO HENANADAI 20

- 18 Inai hari pura wiki lalonai be gaukara stat tahuu danu?
- 19 Inai dina hitu lalonai, inai taunimanima be dahaka gaukara badana ia karaia?

INAI TANOBADA (PNG) KEKENIDIA/HAHINEDIA SIBODIA DAIKA BE EDIA LAGANI 15 EIAVA IA HANAIA NEGANAI, HENANADAI (20-23) OI HENANDAI LAIA

- 20 Oi emu natuna be hida oi havara dia?
- 21 Oi emu natuna korikori be hida inai ruma dekenai idia noho?
- 22 Oi emu natuna be hida gabu idavidau dekenai idia noho?
- 23 Oi emu natuna korikori be he hida idia mase?

INAI HENANADAI BE RUMA TAUDIA OI HENANADAI LAI HENIDIA

- 24 Inai ruma taudia be inai henuna dekenai hetore gaudia haidia daun idia havaraia eiava naria?
1. Moni 2. Sibomu oi heubu laia 3. Lasi
- 25 Inai ruma taudia be moni haida idia abia inai henuai hetore gaukaradia amo?
1. lo 2. Lasi
- 26 Inai be oi emu ruma?
1. lo 2. Lasi (Bema lasi neganai be oi lao henanadai 28)
- 27 Inai ruma ena dava na be daika dekenai oi henia noho?
- 28 Inai ruma lalonai daiutu be hida?
(Daiutu numera na oi torea, kisini, digu ruma eiava kohu habou gabuna be duahia lasi)

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.